

# HAUV PAUS

## Hauv Paus, Zaj 1

**Thawj zag piav txog Tswv Ntuj tsim ntuj tsim teb.**

**1 : 1 - 31 + 2 : 1 - 4.**

**1** 1 Thaum chiv lub keeb, Tswv Ntuj tsim lub ntuj thiab lub ntiaj teb,  
2 mas lub ntiaj teb tseem tsis tau tsheej ntiaj teb thiab tsis muaj dab tsi nyob hauv li. Qhov tsaus ntuj nti npog lub qhov ntuj dub nciab. Tswv Ntuj nthwv cua kiv nplawm ntws saum nplaim dej.

3 Tswv Ntuj hais tias :

"Kom muaj qhov pom kev." Ces txawm muaj qhov pom kev tuaj.

4 Tswv Ntuj pom tias qhov pom kev ntawd zoo. Tswv Ntuj cais qhov pom kev ntawm qhov tsaus ntuj. 5 Tswv Ntuj hu qhov pom kev ua "nruab hnub" thiab hu qhov tsaus ntuj ua "hmo ntuj." Txawm muaj tsaus ntuj thiab muaj kaj ntug : yog thawj hnub. 6 Tswv Ntuj hais tias : "Kom muaj ib lub ntuj ntsuab nyob hauv nruab nrab cov dej thiab kom nws quas cov dej ntawm cov dej". Ces txawm muaj li ntawd tuaj.

7 Tswv Ntuj ua lub ntuj ntsuab los quas cov dej nyob hauv qab ntuj ntsuab ntawm cov dej nyob saum qaum ntuj ntsuab.

8 Tswv Ntuj hu lub ntuj ntsuab ua "ntuj." Txawm muaj tsaus ntuj thiab muaj kaj ntug : yog hnub ob.

9 Tswv Ntuj hais tias :

"Kom cov dej uas nyob hauv qab lub ntuj ntsuab sib sau los ua ib pawg xwb, thiab kom av qhuav tshwm los." Ces txawm muaj li ntawd tuaj.

10 Tswv Ntuj hu cov av qhuav ua "ntiaj teb" thiab hu cov dej ua "hiav txwv." Tswv Ntuj pom tias qhov ntawd zoo.

11 Tswv Ntuj hais tias :

"Kom lub ntiaj teb tuaj nroj tsuag ntsuab

xiab : kom muaj nroj tsuag txawj muaj noob, thiab kom muaj ntoo txi txiv nyias txi nyias hom txiv, nyias muaj nyias hom noob." Ces txawm muaj li ntawd tuaj.

12 Ntiaj teb tuaj nroj tsuag ntsuab xiab : tej nroj tsuag nyias txawj txi nyias hom noob thiab tej ntoo nyias txawj txi nyias hom txiv, nyias muaj nyias hom noob. Tswv Ntuj pom hais tias qhov ntawd zoo.

13 Txawm muaj tsaus ntuj thiab muaj kaj ntug : yog hnub peb.

14 Tswv Ntuj hais tias :

"Kom muaj tej lub ci ci nyob saum lub ntuj ntsuab saud, cais nruab hnub thiab hmo ntuj, thiab cia ua tej lub cim xam hnub xam nyoog thiab suav hnub suav xyoo, 15 kom tej lub ci ci nyob saum lub ntuj ntsuab ua kom ntiaj teb pom kev." Ces txawm muaj li ntawd tuaj. 16 Tswv Ntuj ua ob lub ci ci loj dua cov, lub ci ci loj yog lub kav nruab hnub, lub ci ci me yog lub kav hmo ntuj, thiab cov hnub qub. 17 Tswv Ntuj muab lawv txawb rau saum lub ntuj ntsuab saud kom ntiaj teb pom kev, 18 cia kav nruab hnub thiab hmo ntuj, thiab cia cais qhov pom kev ntawm qhov tsaus ntuj. Tswv Ntuj pom tias qhov ntawd zoo. 19 Txawm muaj tsaus ntuj thiab muaj kaj ntug : yog hnub plaub.

20 Tswv Ntuj hais tias :

"Kom muaj tej tsiaj muaj sia npau xi nyob hauv cov dej, thiab kom muaj noog ya saum npoo ntiaj teb, saum ib nta ntuj ntsuab." Ces txawm muaj li ntawd tuaj.

21 Tswv Ntuj tsim cov nab hiav txwv loj loj thiab tas puas tsav yam tsiaj muaj sia uas txawj ntab hauv dej, coob coob npau xi nyias muaj raws nyias hom, thiab tsim cov noog muaj tis, nyias muaj raws nyias hom. Tswv Ntuj pom tias qhov ntawd zoo. 22 Tswv Ntuj foom lus zoo rau

lawv tias :

"Nej yeej meem tsim noob, yeej meem huam vam mus nyob puv cov dej hauv hiav txwv, kom cov noog yeej meem huam vam mus puv ntiaj teb."

23 Txawm muaj tsaus ntuj thiab muaj kaj ntug : yog hnub tsib.

24 Tswv Ntuj hais tias :

"Kom lub ntiaj teb txawj muaj tej yam tsiaj muaj sia, nyias muaj raws nyias hom : tsiaj nyeg, kab ntsaum, tsiaj qus, nyias muaj raws nyias hom." Ces txawm muaj li ntawd tuaj.

25 Tswv Ntuj ua tej tsiaj qus kom nyias muaj nyias hom, tej tsiaj nyeg kom nyias muaj nyias hom, thiab tas txhua yam kab ntsaum kom nyias muaj nyias hom. Tswv Ntuj pom tias qhov ntawd zoo.

26 Tswv Ntuj hais tias :

"Peb yuav ua tib neeg raws li peb tus duab, kom zoo li peb me ntsis. Kom lawv ua tswv kav cov ntses nyob hauv hiav txwv, cov noog ya saum ntuj, cov tsiaj nyeg, tas txhua yam tsiaj qus thiab txhua yam kab ntsaum nkag hauv av.

27 Ces Tswv Ntuj tsim tib neeg raws li nws tus duab. Yog raws li Tswv Ntuj tus duab, mas nws thiaj tau tsim tib neeg. Nws tsim nkawd ua txiv neej thiab ua poj niam. 28 Tswv Ntuj foom lus zoo rau nkawd thiab hais rau nkawd tias :

"Neb yeej meem tsim noob, yeej meem huam vam mus puv ntiaj teb thiab tswj ntiaj teb. Neb kav cov ntses nyob hauv hiav txwv, cov noog ya saum ntuj thiab tas puas tsav yam tsiaj uas nkag hauv av."

29 Tswv Ntuj hais tias :

"Kuv muab tas puas tsav yam nroj tsuag muaj noob uas tuaj nyob saum npoo av, kuv muab tas puas tsav yam ntoo txi txiv thiab muaj noob rau neb : tej ntawd yuav yog neb tej txhiam laj txhiam xws.

30 Kuv muab tas txhua yam nroj ntsuab

rau cov tsiaj qus, cov noog ya saum ntuj, tas txhua yam nkag hauv av thiab ciaj sia, kuv muab rau lawv ua txhiam xws noj." Ces txawm muaj li ntawd tuaj.

31 Tswv Ntuj ntsia tas txhua yam nws tau ua : txhua yam ntawd zoo kawg. Txawm muaj tsaus ntuj thiab muaj kaj ntug : yog hnub rau.

**2** 1 Lub ntuj thiab lub ntiaj teb yog tsim los zoo li no, thiab tas txhua yam nyob rau hauv. 2 Tswv Ntuj ua nws txoj num tiav tas rau hnub xya. Ces hnub xya nws thiaj so, vim nws ua nws txoj num tiav tas. 3 Tswv Ntuj foom lus zoo rau hnub xya thiab muab hnub xya ua hnub ntshiab, vim nws ua nws txoj num tsim ntuj tsim teb tiav tas ces hnub ntawd nws so.

4a Zaj kwv huam piav txog lub ntuj thiab lub ntiaj teb, thaum ntuj tsim teb raug, mas yog zoo li saum no.

### **Lwm zaj piav txog Tswv Ntuj tsim ntuj tsim teb. Lub vaj Es Dees.**

**2 : 5 - 25.**

4b Thaum lub caij HUAB TAIS Tswv Ntuj tsim lub ntiaj teb thiab lub ntuj, 5 tseem tsis tau muaj ib tug me yub ntoo, ib tug nroj tsuag tuaj li, vim HUAB TAIS Tswv Ntuj tseem tsis tau ua kom los nag rau ntiaj teb, thiab tseem tsis tau muaj tib neeg los cog tej av. 6 Tab sis muaj dej txhawv hauv av los ywg tas nrho daim npoo av.

7 HUAB TAIS Tswv Ntuj muab ib thooj av nplaum los puab ua tib neeg. HUAB TAIS Tswv Ntuj tshuab pa rau hauv tib neeg qhov ntswg, ces tib neeg ciaj ua ib tug muaj sia.

8 HUAB TAIS Tswv Ntuj cog tau ib lub vaj nyob Es Dees, nyob sab hnub tuaj.

Nws muab tus txiv neej uas nws tau puab tso rau hauv lub vaj. 9 HUAB TAIS Tswv Ntuj ua kom txhua yam ntoo uas zoo saib thiab zoo noj tuaj hauv lub vaj thaj av. Tus ntoo muaj txoj sia tuaj nyob hauv nruab nrab lub vaj, thiab tus ntoo uas paub qhov zoo qhov phem. 10 Ib tug dej txhawv hauv Es Dees ntws mus ywg lub vaj. Tus dej ntawd ncau ua plaub ceq. 11 Thawj tus dej, hu ua Dej Pis Soos. Nws chev hla thoob lub teb chaws Has Vis Las uas muaj kub. 12 Hom kub teb chaws ntawd yog tseem kub. Kuj muaj ib hom txab ntoo zoo thiab muaj hom pob zeb dub muaj nqis nyob ntawd.

13 Tus dej ob hu ua Dej Ntsis Hoos. Nws chev ncig lub teb chaws Kus Saws.

14 Tus dej peb hu ua Dej Tis Nkis : nws ntws nyob As Xws teb sab hnub tuaj. Tus dej plaub yog tus Dej Aws Fas Tes.

15 HUAB TAIS Tswv Ntuj coj tus txiv neej mus nyob hauv lub vaj Es Dees kom nws cog lub vaj thiab saib lub vaj.

16 HUAB TAIS Tswv Ntuj qhia tus txiv neej li no :

"Koj noj tau cov txiv txi ntawm tas txhua tsob ntoo hauv lub vaj no tib si. 17 Tiam sis cov txiv txi ntawm tus ntoo paub qhov zoo thiab qhov phem, mas koj txhob noj. Yog koj noj hnub twg, mas hnub ntawd koj yuav tuag."

18 HUAB TAIS Tswv Ntuj hais tias : "Cia txiv neej nyob ib leeg mas tsis zoo. Kuv yuav ua ib tug pab nws kom phim nws."

19 HUAB TAIS Tswv Ntuj thiab muab av los puab tas puas tsav yam tsiaj quj thiab tas puas tsav yam noog ya saum ntuj. Nws coj los rau tus txiv neej xyuas saib nws yuav tis npe li cas rau. Txhua yam tsiaj yuav muaj lub npe raws li tus txiv neej tis rau. 20 Tus txiv neej tis npe rau tas txhua hom tsiaj nyeg, rau cov

noog ya saum ntuj, thiab rau tas txhua hom tsiaj quj, tiam sis nws nrhiav tsis tau ib tug pab nws thiab phim nws.

21 HUAB TAIS Tswv Ntuj tso ib tug dab ntub hlob laum tus txiv neej, ces nws tsaug zog lawm. Tswv Ntuj rho nws ib tug tav tawm los, nws rov kaw lub qhov zoo li qub. 22 HUAB TAIS Tswv Ntuj muab tus tav uas nws rho ntawm tus txiv neej los puab ua ib tug poj niam. Tswv Ntuj coj los rau tus txiv neej saib. 23 Tus txiv neej nqua suab hlo tias :

"Zaum no, tus no yog tseem txha ntawm kuv txha thiab tseem nqaij ntawm kuv nqaij tiag ! Tus no yuav hu ua 'poj niam,' vim tus no tawm ntawm txiv neej los !"

24 Vim li no txiv neej thiaj tso niam tso txiv tseg, mus npuab nws tus poj niam, ces nkawd ua ib lub cev nqaij xwb.

25 Thaum ntawd, tus txiv neej thiab tus poj niam nkawd ob leeg nyob liab qab, tiam sis nkawd ib leeg tsis txaj muag rau ib leeg.

### **Neeg poob rau kev txhaum.**

**3 : 1 - 24.**

**3** 1 Tus nab yog tus ntse tshaj tas txhua hom tsiaj HUAB TAIS Tswv Ntuj tau tsim los nyob nruab nrag. Nab hais rau tus poj niam tias :

"Li ntawd, Tswv Ntuj hais tias : Neb yuav tsis txhob noj txhua yam txiv ntoo hauv lub vaj no puas yog ?"

2 Tus poj niam teb rau tus nab tias :

"Wb noj tau cov txiv txi saum cov ntoo hauv lub vaj no tib si. 3 Tsuas tshwj cov txiv txi saum tsob ntoo nyob hauv nruab nrab lub vaj, mas Tswv Ntuj hais tias : "Neb tsis txhob noj, tsis txhob kov, yog neb noj neb kov, mas neb yuav tuag."

4 Tus nab teb ntua tus poj niam tias :

"Tsis muaj li ntawd ib zaug ! Neb yuav

## Hauv Paus, Zaj 3

tsis tuag. 5 Vim Tswv Ntuj paub tias, hnuv twg neb noj ces neb qhov muag yuav qhib, neb yuav zoo li tej tus tswv ntuj uas paub qhov zoo thiab qhov phem." 6 Tus poj niam pom hais tias tus ntoo ntawd yeej zoo noj thiab zoo saib kawg, thiab yog tus ntoo uas yus ntshaw noj kom yus paub qhov zoo thiab qhov phem. Nws de zoj lub txiv ntawm tus ntoo los noj. Nws kuj cev rau nws tus txiv uas nrog nws nyob, ces tus txiv kuj noj thiab.

7 Ces nkawd ob leeg qhov muag qhib plho, nkawd paub hais tias nkawd liab qab. Nkawd thiaj muab nplooj ncuav pias los ua tiab npua.

8 Thaum cua tuaj ntxiag, nkawd hnov HUAB TAIS Tswv Ntuj rhais ruam ncig lub vaj. Tus txiv neej thiab nws tus poj niam khiav tsiv nraim HUAB TAIS Tswv Ntuj hauv cov ntoo nyob hauv lub vaj.

9 HUAB TAIS Tswv Ntuj hu tus txiv neej hais tias :

"Koj nyob qhov twg ?"

10 Tus txiv neej teb tias :

"Kuv hnov koj rhais ruam hauv lub vaj. Kuv ntshai vim kuv liab qab, kuv thiaj khiav tsiv nraim."

11 Tswv Ntuj rov hais ntxiv tias :

"Leej twg qhia koj tias koj liab qab ? Yog koj noj lub txiv uas kuv txwv tsis pub noj lawm puas yog ?"

12 Tus txiv neej teb tias :

"Yog tus poj niam uas koj tso nyob ze kuv, muab lub txiv rau kuv, ces kuv thiaj noj !"

13 HUAB TAIS Tswv Ntuj hais rau tus poj niam tias :

"Koj ua dab tsi li ntawd ?"

Tus poj niam teb tias :

"Yog niag nab ntxias kuv, kuv thiaj noj."

14 Ces HUAB TAIS Tswv Ntuj hais rau tus nab hais tias :

"Vim koj tau ua li ntawd, koj tkoj hmoov

yuav phem tshaj ib tsoom tsiaj nyeg thiab tsiaj qus. Koj yuav xuas koj lub plab mus kev, thiab koj yuav niaj hnuv noj av tas koj sim neej. 15 Kuv yuav ua kom muaj kev ciaj caub ntawm koj thiab tus poj niam, ntawm koj caj ces thiab nws caj ces. Nws yuav tsuj koj taub hau, koj yuav tom nws luj taws."

16 Tswv Ntuj hais rau tus poj niam hais tias :

"Kuv yuav ua kom koj muaj mob ntau thaum koj xeeb tub xeeb ki. Koj yuav tau mob tau ntsaj, koj thiaj yug tau me tub me nyuam. Tsis kav, koj tseem yuav ntshaw koj tus txiv, tiam sis nws yuav tswj koj."

17 Tswv Ntuj hais rau tus txiv neej hais tias :

"Vim koj tau mloog koj tus poj niam lus, koj thiaj noj lub txiv kuv txwv tsis kheev noj, av thiaj raug foom phem vim koj ! Koj yuav siv zog khwv tas koj lub neej koj thiaj tau noj. 18 Av yuav tuaj pos tuaj nrhab rau koj, thiab koj yuav noj tej nroj tsuag uas tuaj hauv nruab teb.

19 Koj ntsej muag yuav tawm hws lug koj thiaj tau noj, mus txog hnuv koj rov mus ua av, vim koj yog av puab. Koj yog av luaj ces koj yuav rov mus ua av luaj."

20 Tus txiv neej tis npe rau nws poj niam hu ua Es Vas, vim nws yog ib tsoom neeg muaj tkoj sia leej niam.

21 HUAB TAIS Tswv Ntuj muab tawv los ua tsoos rau tus txiv neej thiab nws poj niam hnav. 22 Thiab HUAB TAIS Tswv Ntuj hais tias :

"Zaum no tib neeg zoo li peb lawm, nws paub qhov phem thiab qhov zoo. Yuav tsis pub kom nws cev tes mus de tau tsob txiv muaj tkoj sia los noj ntxiv, tsam nws muaj tkoj sia nyob mus li."

23 HUAB TAIS Tswv Ntuj thiaj tshem neeg tawm hauv lub vaj Es Dees, kom neeg mus cog cov av uas muab los puab

nws. 24 Tswv Ntuj ntiab tib neeg tawm, nws tso ib co Tshiab Kes Lus Npis zov lub vaj Es Dees.

Tswv Ntuj tsa ib rab ntaj nplaim taws thaiv txoj kev mus txog tus ntoo muaj txoj sia.

**Kas Ees thiab As Npes.**

**4 : 1 - 16.**

**4** 1 As Das paub nws poj niam. Ces tus poj niam xeeb tub thiab Yug tau Kas Ees. Nws hais tias :

"Kuv tau ib tug tub ntawm HUAB TAIS los."

2 Nws kuj Yug tau As Npes, yog Kas Ees tus kwv. As Npes hlob, nws ua ib tug tub

yug tsiaj hos Kas Ees ua liaj ua teb.

3 Ntev tom qab, Kas Ees txawm muab nws cov qoob los txi rau HUAB TAIS.

4 Hos As Npes, nws kuj muab thawj tus me nyuam uas nws cov tsiaj Yug tau, los txi Ntuj. Nws tseem muab lawv cov roj los txi huv tib si. HUAB TAIS zoo siab rau As Npes, ces nws txais As Npes cov txim. 5 Tab sis HUAB TAIS tsis zoo

siab rau Kas Ees thiab tsis txais Kas Ees cov txim, ces Kas Ees npau taws thiab ua ntsej muag dub nciab.

6 HUAB TAIS hais rau Kas Ees tias: "Vim li cas koj thiaj npau taws thiab ua ntsej muag dub nciab li ko ? 7 Yog koj txiav siab ua zoo mas koj Yuav rov tsaius koj lub ntsej muag. Hos yog koj tsaius txiav siab ua zoo ces kev txhaum nyob rawv ntawm koj qhov rooj, xws li tus tsiaj nyas nrhw Yuav tom koj. Yog koj xav yeej, mas koj tseem Yuav yeej tau txoj kev txhaum."

8 Tab sis muaj ib zaug, Kas Ees hais rau nws tus kwv As Npes tias :

"Wb mus yos."

Thaum nkawd mus nrug deb ntawm zos

lawm, Kas Ees txawm dhia rhees mos ntiag nws tus kwv, muab tus kwv tua.

9 HUAB TAIS nug Kas Ees hais tias : "Koj tus kwv As Npes nyob qhov twg ?" Kas Ees teb tias :

"Kuv tsis paub. Kuv puas yog tus zov rawv kuv tus kwv ?"

10 HUAB TAIS rov hais tias :

"Koj tau ua dab tsi ? Koj sim mloog saib, koj tus kwv cov ntshav quaj qw hauv av tuaj rau kuv ! 11 Zaum no koj Yuav tau hmoov phem thiab koj Yuav raug ntiab tawm hauv thaj av zoo uas tau rua ncauj cug koj tus kwv cov ntshav. 12 Yog koj ua teb, av Yuav tsis txi qoob rau koj lawm. Koj Yuav ua neeg loj leeb ncig ntiaj teb."

13 Kas Ees hais rau HUAB TAIS tias :

"Kuv lub txim hnyav dhau, kuv ris tsis taus. 14 Ntsia saib, hnub no koj muab kuv ntiab tawm hauv thaj av zoo no mus, kuv Yuav tsum mus tsiv nraim deb ntawm koj lub ntsej muag, thiab kuv Yuav ua neeg loj leeb ncig ntiaj teb. Ntshai thawj tus neeg tuaj ntsib kuv Yuav muab kuv tua xwb !"

15 HUAB TAIS teb tias :

"Yog leej twg tua Kas Ees mas Yuav muaj tus ua pauj rau nws xya zaus."

Ces HUAB TAIS ntaus ib lub cim rau Kas Ees kom thawj tug neeg ntsib nws txhob muab nws tua. 16 Kas Ees thiaj txav mus deb ntawm HUAB TAIS xub ntiag. Nws mus nyob lub teb chaws Nos Daws, nyob ntawm lub vaj Es Dees, sab hnub tuaj.

**Kas Ees caj ces. 4 : 17 - 24.**

17 Kas Ees paub nws poj niam, ces nws poj niam xeeb tub thiab Yug tau Hes Nov. Kas Ees txhim ib lub nroog, nws tis npe rau lub nroog raws nws tus tub hu ua Hes

Nov. 18 Hes Nov yug tau Is Lav. Is Lav yug tau Mes Hus Yas Ees. Mes Hus Yas Ees yug tau Mes Thus Sas Ees. Mes Thus Sas Ees yug Las Mev. 19 Las Mev yuav ob tug poj niam. Tus niam hlob hu ua As Dav, tus niam yau hu ua Xis Las. 20 As Dav yug tau Yas Npas, uas yog cov neeg nyob tsev tsam phooj thiab yug tsiaj tus yawg koob. 21 Nws tus kwv hu ua Yus Npas, yog cov neeg uas txawj qoj nkauj nog ncas thiab txawj tshuab raj tus yawg koob. 22 Xis Las yug tau Tus Npas Kas Ees. Nws yog tus xub muab tooj dub thiab muab hlau coj los nchuav ua toob xib. Tus Npas Kas Ees muaj ib tug muam hu ua Nas As Mas. 23 Las Mev hais rau nws ob tug poj niam tias :

"As Dav thiab Xis las, Las Mev ob tug poj niad, neb mloog kuv lub suab mog, neb mloog qhov kuv hais mog. Kuv tau tua ib tug txiv neej vim nws ua mob kuv, tua ib tug tub hluas vim nws ntaus kuv. 24 Yog luag twb ua pauj Kas Ees xya zaus, mas luag yuav ua pauj Las Mev xya caum xya zaus."

**Xes Thes thiab nws caj ces.**

**4 : 25 - 26.**

25 As Das paub nws poj niam, ces nws poj niam yug tau ib tug tub ntxiv, thiab tis nws npe hu ua Xes Thes, nws hais tias : "Tswv Ntuj pub dua ib tug tub rau kuv los sawv As Npes chaw, vim Kas Ees muab nws tua lawm."

26 Xes Thes kuj yug tau ib tug tub, hu ua Es Nos. Nws yog thawj tus neeg pib teev HUAB TAIS lub npe.

**Cov yawg koob thaum dej tsis tau nyab ntiaj teb. 5 : 1 - 32.**

**5** 1 Ntawm no yog phau ntawv qhia

txog As Das caj ces : Hnub uas Tswv Ntuj tsim tau As Das, nws tsim kom As Das muaj ntsis zoo li Tswv Ntuj. 2 Nws tsim tau txiv neej thiab poj niam, nws foom hmoov zoo rau nkawd. Hnub uas nws tsim nkawd, nws muab lub npe hu ua "Tib Neeg" rau nkawd.

3 Thaum As Das muaj ib puas peb caug xyoo, nws yug tau ib tug tub muaj ntsis zoo li nws thiab, zoo li nws tus duab. Nws tis npe rau hu ua Xes Thes.

4 Thaum As Das yug tau Xes Thes lawm, nws tseem ua neej nyob yim pua xyoo. Nws yug tau tub tau ntxhais. 5 Tas nrho As Das lub neej ntev txog cuaj pua peb caug xyoo, nws mam tuag.

6 Thaum Xes Thes muaj ib puas thiab tsib xyoos, nws yug tau Es Nos.

7 Thaum Xes Thes yug Es Nos lawm, nws tseem nyob yim pua thiab xya xyoo ntxiv, nws yug tau tub thiab tau ntxhais.

8 Tas nrho Xes Thes lub neej ntev txog cuaj pua kaum ob xyoos, nws mam tuag.

9 Thaum Es Nos muaj cuaj caum xyoo, nws yug tau Kes Naas. 10 Thaum Es Nos yug Kes Naas lawm, nws tseem nyob yim pua kaum tsib xyoos ntxiv. Nws yug tau tub thiab yug tau ntxhais. 11 Tas nrho Es Nos lub neej ntev txog cuaj pua tsib xyoos, nws mam tuag.

12 Thaum Kes Naas muaj xya caum xyoo, nws yug tau Mas Has Las Les Ees.

13 Thaum Kes Naas yug Mas Has Las Les Ees lawm, Kes Naas tseem nyob yim pua plaub caug xyoo ntxiv. Nws yug tau tub thiab tau ntxhais.

14 Tas nrho Kes Naas lub neej ntev txog cuaj pua kaum xyoo, nws mam tuag.

15 Thaum Mas Has Las Les Ees muaj rau caum tsib xyoos, nws yug tau Yes Les. 16 Thaum Mas Has Las Les Ees yug tau Yes Les lawm, Mas Has Las Les Ees tseem nyob yim pua peb caug xyoo

ntxiv. Nws yug tau tub thiab tau ntxhais.  
 17 Tas nrho Mas Has Las Les Ees lub neej ntev txog yim pua cuaj caum tsib xyoos, nws mam tuag.  
 18 Thaum Yes Les muaj ib puas rau caum ob xyoos, nws yug tau Hes Nov.  
 19 Thaum Yes Les yug tau Hes Nov lawm, Yes Les tseem nyob yim pua xyoo ntxiv. Nws yug tau tub thiab tau ntxhais.  
 20 Tas nrho Yes Les lub neej ntev txog cuaj pua rau caum ob xyoos, nws mam tuag. 21 Thaum Hes Nov muaj rau caum tsib xyoos, nws yug tau Mas Thus Xas Les. 22 Thaum Hes Nov yug tau Mas Thus Xas Les lawm, Hes Nov tseem nyob peb puas xyoo ntxiv. Nws yug tau tub thiab tau ntxhais. 23 Tas nrho Hes Nov lub neej ntev txog peb puas rau caum tsib xyoos. 24 Hes Nov nrog nraim Tswv Ntuj, ces nws cia li ploj lawm xwb, vim Tswv Ntuj tuaj coj nws lawm.  
 25 Thaum Mas Thus Xas Les muaj ib puas yim caum xya xyoo, nws yug tau Las Mev. 26 Thaum Mas Thus Xas Les yug tau Las Mev lawm, Mas Thus Xas Les tseem nyob xya pua yim caum ob xyoos ntxiv. Nws yug tau tub thiab tau ntxhais.  
 27 Tas nrho Mas Thus Xas Les lub neej ntev txog cuaj pua rau caum cuaj xyoos, nws mam tuag. 28 Thaum Las Mev muaj ib puas yim caum ob xyoos, nws yug tau ib tug tub. 29 Nws muab tis npe hu ua Nos Hes, nws hais tias :  
 "Tus no yuav nplij peb lub siab nyob hauv peb tej hauj lwm thiab peb tej kev khwv, yog kev nplij siab tawm hauv thaj av uas HUAB TAIS tau tsawm lus phem rau los."  
 30 Thaum Nos Hes yug lawm, Las Mev tseem nyob tsib puas cuaj caum tsib xyoos ntxiv. Nws yug tau tub thiab tau ntxhais. 31 Tas nrho Las Mev lub neej ntev txog xya pua xya caum xya xyoo, nws mam tuag. 32 Thaum Nos Hes muaj tsib puas xyoo, nws yug tau Xees, Has, thiab Zas Fes.

**Ntiaj teb neeg ua phem.**  
**6 : 1 - 12.**

**6** 1 Thaum tib neeg pib coob tuaj nyob hauv ntiaj teb lawm, thiab tib neeg yug tau ntxhais coob lawm, 2 mas Tswv Ntuj cov tub pom hais tias tib neeg cov ntxhais zoo ntxim lawv siab, ces lawv mus yuav tas nrho cov uas lawv nyiam coj los ua poj niam.  
 3 HUAB TAIS hais tias :  
 "Kuv lub tswv yim yuav tsis nyob hauv tib neeg, yog vim tib neeg yog ib lub cev nqaij. Vim nws yog ib lub cev nqaij, mas nws lub neej yuav ntev ib puas nees nkaum xyoo xwb."  
 4 Thaum ntawd, cov neeg Nes Fis Lis twb nyob lawm, (lawv kuj tseem nyob yav tom qab ntxiv thiab), yog lub sij hawm uas Tswv Ntuj cov tub yuav tib neeg cov ntxhais coj los yug me nyuam rau lawv, ces thiaj tau cov neeg muaj peev xwm thiab muaj koob meej nto lug txheej thaud. 5 HUAB TAIS pom hais tias nyob ntiaj teb, neeg siab phem tas nrho, thiab neeg lub siab tsuas xav qhov phem tas hnub xwb. 6 HUAB TAIS khuv xim hais tias nws tau tsim neeg los nyob ntiaj teb. HUAB TAIS tu siab.  
 7 Ces HUAB TAIS hais tias :  
 "Kuv yuav muab cov neeg uas kuv tau tsim ntawd rhuav kom ploj tas saum daim npoo av, tsis hais neeg, los tsiaj nyeg, kab ntsaum los noog ya saum ntuj huv tib si, vim kuv khuv xim tias kuv tau tsim lawv los."  
 8 Tiam sis Nos Hes yog ib tug neeg zoo xis HUAB TAIS siab. 9 Ntawm no yog

Nos Hes zaj kwv huam : Nos Hes yog ib tug neeg ncaj dua tas tsoom neeg ua neej nyob lub sij hawm ntawd, thiab nws nrog Tswv Ntuj sib raug zoo.

10 Nos Hes Yug tau peb tug tub, Xees, Has thiab Zas Fes. 11 Lub ntiaj teb ua phenem zuj zus rau Tswv Ntuj thiab muaj kev ua nruj ua tsiv ntau zuj zus.

12 Tswv Ntuj pom tias ntiaj teb phenem thiab qias kawg nkaus, vim txhua tus neeg uas muaj lub cev nqaij coj tus yeeb yam phenem nyob ntiaj teb.

**Dej nyab ntiaj teb.**

**6 : 13 - 22 + 7 : 1 - 24.**

13 Tswv Ntuj hais rau Nos Hes tias : "Lub caij uas txhua tus muaj lub cev nqaij yuav ploj mus los txog lawm. Kuv tau txiav li ntawd, vim lub ntiaj teb muaj kev phenem ntau dhau los ntawm neeg los, ces kuv yuav muab lawv rhuav kom ploj ntais hauv ntiaj teb mus. 14 Koj yuav xuas ntoo xwb cob txua ib lub nkoy. Koj yuav muab tauj los xov thiab muab roj hmab los leem sab hauv sab nraud rau. 15 Koj yuav txua raws li no : qhov ntev yog peb puas tshim, qhov dav yog tsib caug tshim, qhov siab yog peb caug tshim. 16 Koj yuav ua ib lub ruv rau lub nkoy kom siab li ib tshim tshaj saud. Koj yuav ua lub qhov rooj rau ntawm ib sab, thiab koj yuav ua kom muaj txheej ib, txheej ob thiab txheej peb. 17 Ntawm kuv mas kuv yuav ua kom dej loj loj los nyab lub ntiaj teb, kom txhua yam muaj txoj sia hauv lub qab ntuj ploj tas mus : tas puas tsav yam nyob hauv ntiaj teb yuav tsum tuag kom tas mus. 18 Tiam sis kuv yuav nrog koj cog lus. Koj yuav nkag mus lawm hauv lub nkoy, koj thiab koj cov tub, koj poj niam thiab koj cov tub cov poj niam nrog koj. 19 Tas puas

tsav yam muaj txoj sia, tas puas tsav yam muaj lub cev nqaij, koj yuav muab kom tau ib hom ob tug nrog koj mus lawm hauv lub nkoy kom txuag lawv txoj sia : yuav tsum yog ib tug maum thiab ib tug txiv. 20 Ib hom ib nkawg ntawm cov noog, ib hom ib nkawg ntawm cov tsiaj nyeg, ib hom ib nkawg ntawm tej kab ntsaum nkag hauv av yuav nrog koj nkag mus kom txuag lawv txoj sia. 21 Ntawm koj, mas koj yuav tsum nrhiav tas puas tsav yam zoo noj coj los khaws cia kom ntau, ces thiaj li yuav muaj txhiam xws noj rau koj thiab rau lawv."

22 Nos Hes ua raws li ntawd : tas puas tsav yam uas Tswv Ntuj kom ua, mas nws cia li ua.

**7 1 HUAB TAIS hais rau Nos Hes tias :**

"Koj nkag mus hauv lub nkoy, koj thiab tas nrho koj tsev neeg, vim nyob hauv tiam neeg no, kuv tsuas pom koj ib leeg xwb thiaj li ncaj ncees. 2 Ntawm tas nrho cov tsiaj huv, koj yuav khaws xya nkawm, tus txiv nrog tus maum, ntawm cov tsiaj tsis huv, koj yuav khaws ib nkawg, ib tug txiv thiab ib tug maum.

3 Hos cov noog ya saum ntuj, koj khaws xya nkawm, ib tug lau nrog tus poj, kom tau ua noob rau ntiaj teb.

4 Tshuav xya hnub ntxiv xwb kuv yuav tso nag los nyab ntiaj teb plaub caug hnub plaub caug hmo, kuv yuav rhuav tas puas tsav yam kuv tau tsim los kom ploj ntais saum daim npoo av mus."

5 Nos Hes ua tas puas tsav yam raws li HUAB TAIS kom nws ua. 6 Nos Hes muaj rau pua xyoo thaum dej nag los nyab ntiaj teb.

7 Nos Hes, nrog nws cov tub, nws poj niam thiab cov tub cov poj niam, lawv nkag mus hauv lub nkoy kom dim ntawm

dej. 8 Hos cov tsiaj huv thiab cov tsiaj tsis huv, cov noog thiab cov kab nkag hauv av, 9 muaj ib Yam ib nkawg nkag rau hauv Nos Hes lub nkoy, muaj ib tug maum ib tug txiv, raws li Tswv Ntuj tau hais rau Nos Hes.

10 Thaum dhau xya hnub lawm, ces dej nag nyab ntiaj teb.

11 Thaum Nos Hes muaj rau pua xyoo txwm nkaus, lub ob hlis, hnub tim kaum xya, hnub ntawd, txhua tus dej txhaww phwj hauv tiv txwv tuaj, hos cov qhov rooj thaiv dej saum ntuj qhib plho rau dej nchuav nthwv sis laub sis lug nqes los.

12 Nag los tsaus nti tau plaub caug hnub thiab plaub caug hmo rau ntiaj teb.

13 Hnub ntawd kiag, Nos Hes thiab nws cov tub, Xees, thiab Has, thiab Zas Fes, nrog Nos Hes poj niam thiab nws cov tub peb tug poj niam, lawv nkag hauv lub nkoy. 14 Txhua hom tsiaj qus, tsiaj nyeg, kab nkag hauv av, txhua Yam tsiaj ya saum ntuj, txhua hom noog, txhua Yam muaj tis nrog Nos Hes nkag mus rau hauv nws lub nkoy. 15 Cov nyob ze ntawm Nos Hes muaj ib hom ib nkawg ntawm txhua Yam tsiaj muaj lub cev nqaij thiab muaj txoj sia ua pa.

16 Txhua nkawm muaj lub cev nqaij nkag hauv nkoy ntawd muaj ib tug txiv nrog ib tug maum raws li Tswv Ntuj tau hais.

Ces HUAB TAIS kaw nkaus lub qhov rooj nkoy lawv Nos Hes qab.

17 Los nag tsaus nti nyab ntiaj teb tau plaub caug hnub, cov dej nce tuaj, ces dej tshoom lub nkoy rau saum nplaim dej.

18 Cov dej puv zui zus thiab ntaw zui zus tuaj, ua kom lub nkoy ntab yeev rau saum nplaim dej. 19 Cov dej nce tuaj puv ntiaj teb, ces cov roob siab tshaj nyob hauv lub qab ntuj txawm ploj hauv qab deg tas. 20 Dej tseem nce kaum tsib tshim siab

tshaj cov ncov roob, thiab nyab cov roob tas huv tib si.

21 Ces txhua Yam muaj lub cev nqaij txawj ua zog nyob hauv ntiaj teb tuag tas huv si : me noog, me tsiaj nyeg tsiaj qus, tas puas tsav Yam muaj sia npau xi nyob hauv av, thiab tas ib tsoom tib neeg huv tib si. 22 Tas puas tsav Yam ua pa ntawm qhov ntswg, los yog tas puas tsav Yam nyob saum nruab nqhuab tuag tas.

23 Tas puas tsav Yam muaj sia nyob saum npoo av, tsis hais tib neeg los tsiaj txhu, tej kab thiab tej noog saum ntuj, sawv daws ploj hauv ntiaj teb tas huv si, tsuas tshuav Nos Hes thiab puas tsav Yam uas nrog nws nyob hauv nkoy xwb. 24 Dej puv tuaj nyab ntiaj teb tau ib puas tsib caug hnub txwm nkaus.

#### **Dej rov nqig. 8 : 1 - 14.**

**8** 1 Tiam sis Tswv Ntuj nco ntsoov txog Nos Hes thiab tas cov tsiaj qus thiab tsiaj nyeg uas nrog Nos Hes nyob hauv lub nkoy, Tswv Ntuj tso ib nthwv cua tuaj tshuab lub ntiaj teb, ces cov dej thiaj nqig tas. 2 Cov dej txhawv hauv tiv txwv txhaws tas, hos cov qhov rooj thaiv dej saum ntuj kuj kaw tas huv tib si. Ces nag tsis tau kev poob los rau ntiaj teb ntxiv lawm.

3 Dej thiaj li nqig zui zus hauv ntiaj teb. Dej siv ib puas tsib caug hnub thiaj mam nqig tas. 4 Ces thaum lub xya hli, hnub tim kaum xya hauv lub hli, lub nkoy los khuam rau saum cov ncov roob As Las Las.

5 Dej nqig mus txog lub kaum hli, ces hnub tim ib lub kaum hli cov ncov roob mam li tshwm tuaj. 6 Nos Hes tos plaub caug hnub, ces nws qhib lub qhov rai uas nws tau ua rau ntawm lub nkoy, 7 nws tso tus uab lag tawm mus. Uab lag ya mus

ya los, tos kom dej qhuav hauv ntiaj teb tso. 8 Ces Nos Hes tso tus nquab tawm ntawm nws mus xyuas saib dej puas tau nquab hauv av.

9 Tiam sis tus nquab nrhiav tsis tau chaw tsaws li, ces nquab ya rov los rau ntawm lub nkoy, vim dej tseem nyab cov av hauv ntiaj teb thoob plaws. Nos Hes thiab li xyab tes mus txais tus nquab thiab coj nquab los nrog nws nyob hauv lub nkoy. 10 Nws tos tau xya hnub ntxiv, nws rov qab tso tus nquab tawm ntawm lub nkoy mus dua. 11 Thaum tsaus ntuj, nquab ya rov los, ntawm nws kaus ncauj muaj ib tug ntsis txiv ntoo roj uas tus nquab nyuam qhuav de tshiab tshiab. Ces Nos Hes paub tias dej nqig lawm. 12 Nws rov tos tau xya hnub ntxiv, nws mam rov tso tus nquab tawm mus dua. Tus nquab tsis rov los ntxiv lawm. 13 Thaum Nos Hes muaj rau pua ib xyoos, lub ib hlis, xiab ib, dej qhuav tas hauv ntiaj teb lawm. Nos Hes yaws lub ruv npog lub nkoy, nws ntsia pom av tab tom pib qhuav. 14 Lub ob hlis, hnub tim nees nkaum xya, ntiaj teb qhuav tas lawm.

**Nos Hes tawm hauv nkoy los.**

**8 : 15 - 22.**

15 Ces Tswv Ntuj hais rau Nos Hes tias :

16 "Koj tawm hauv nkoy los, koj thiab koj poj niam, nrog koj cov tub thiab koj cov tub cov poj niam. 17 Nej yuav coj tas puas tsav yam tsiaj muaj sia muaj lub cev nqaij nrog nej tawm los: cov noog, cov tsiaj txhu, tas puas tsav yam txawj nkag uas nkag hauv av huv tib si, kom txhua yam coob mus puv ntiaj teb, kom txhua yam tsim noob thiab huam vam puv hauv ntiaj teb."

18 Ces Nos Hes tawm hauv nkoy los,

nrog nws cov tub thiab nws poj niam thiab nws cov tub thiab lawv cov poj niam. 19 Thiab txhua yam tsiaj, txhua yam txawj nkag, txhua yam noog, txhua yam txawj ua zog nyob hauv ntiaj teb, sawv daws tawm hauv nkoy los, nyias raws nyias npoj nyias pawg. 20 Ces Nos Hes tsa ib lub thaj txi Huab Tais. Nws muab txhua yam tsiaj huv thiab txhua yam noog huv los hlawv txi Ntuj saum lub thaj. 21 Thaum Huab Tais hnov cov pa ncho tsw qab, Huab Tais hais hauv nws nruab siab tias :

"Txawm tias yog tim tib neeg, los kuv yuav tsis foom phem rau av ib zaug ntxiv lawm, vim tias neeg lub siab yeej xeeb tau phem puag thaum yau los. Thiab kuv yuav tsis ua kom txhua yam muaj sia tu noob li kuv tau ua no ib zaug ntxiv." 22 Tsuav yog tseem muaj lub ntiaj teb, mas yuav muaj caij cog qoob thiab caij sau qoob, yuav muaj txias thiab muaj kub, yuav muaj caij sov caij no, yuav muaj nruab hnub thiab muaj hmo ntuj mus li."

**Tswv Ntuj nrog Nos Hes cog lus.  
9 : 1 - 17.**

**9** 1 Tswv Ntuj foom hmoov zoo rau Nos Hes thiab rau nws cov tub, nws hais rau lawv tias :

"Nej yeej meem tsim noob, kav tsij huam vam mus puv lub ntiaj teb. 2 Tas puas tsav yam tsiaj hauv ntiaj teb, puas tsav yam noog ya saum ntuj, puas tsav yam tsiaj nkag hauv av thiab puas tsav yam ntses hauv hiav txwv, sawv daws yuav hwm nej thiab ntshai nej. Lawv nyob hauv nej lub xib teg tas huv si. 3 Txhua yam txawj ua zog thiab muaj sia yog txhiam xws rau nej noj. Kuv tseem muab cov nroj ntsuab rau nej siv thiab txhua tsav puas yam tas tib si rau nej siv.

4 Tshuav ib qho xwb : Nej yuav tsis txhob noj nqaij nrog nws txoj sia, uas yog cov ntshav. 5 Vim hais tias, kuv yuav nug txog nej txhua tus cov ntshav, kuv yuav nug ntawm tsiaj thiab ntawm neeg, yuav nug ib tug txog lwm tus cov ntshav, kuv yuav nug txog tib neeg txoj sia. 6 Leej twg txo tib neeg txoj sia, yuav raug tib neeg txo nws txoj sia. Vim hais tias Tswv Ntuj tau tsim neeg los zoo xws li nws tus ntsuj duab. 7 Ntawm nej, mas nej yeej meem tsim noob, yeej meem huam vam coob puv ntiaj teb thiab kav ntiaj teb."

8 Tswv Ntuj hais li no rau Nos Hes thiab rau nws cov tub :

9 "Ntawm no, kuv nrog nej cog lus cia, nrog nej thiab nej caj ces puag tom qab, 10 nrog txhua yam uas muaj txoj sia nyob, nrog cov noog, cov tsiaj nyeg, nrog txhua tsav txhua hom tsiaj hauv ntiaj teb uas tawm hauv lub nkoy los, cog lus. 11 Kuv cog lus rau nej tias : Tas puas tsav yam muaj sia yuav tsis raug dej nyab rhuav siav kom tu noob ib zaug ntxiv. Yuav tsis muaj dej los nyab ntiaj teb thiab rhuav ntiaj teb ib zaug ntxiv."

12 Tswv Ntuj hais tias :

"Lub cim no yuav qhia rau cov tiam neeg tom ntej paub tias kuv tau nrog nej thiab tas puas tsav yam muaj sia uas nrog nej muaj sia cog lus. 13 Kuv ua zaj sawv rau saum cov huab ; nws yuav ua lub cim nco txog tias kuv thiab lub ntiaj teb tau cog lus cia lawm.

14 Thaum kuv sau cov huab los ncaj rau saum lub ntiaj teb thiab pom zaj sawv saum cov huab, 15 ces kuv yuav nco dheev txog kuv cov lus cog rau nej thiab rau tas puas tsav yam muaj lub cev nqaij, ces dej yuav tsis hlob thiab tsis nyab tas puas tsav yam muaj sia ib zaug ntxiv.

16 Thaum muaj zaj sawv saum cov huab,

kuv yuav pom thiab yuav nco txog tias Tswv Ntuj nrog txhua tsav puas yam muaj lub cev nqaij nyob ntiaj teb tau cog lus cia ib txhis mus li."

17 Tswv Ntuj hais rau Nos Hes tias : "Qhov ntawd yog lub cim qhia tias kuv tau nrog txhua yam muaj lub cev nqaij nyob ntiaj teb cog lus lawm."

### **Nos Hes cov tub. 9 : 18 - 28**

18 Nos Hes cov tub uas tawm hauv nkoy los yog Xees, Has, thiab Zas Fes. Has yog Kas Nas Has txiv. 19 Peb tug no yog Nos Hes peb tug tub. Lawv yog cov tsim noob los mus nyob puv ntiaj teb. 20 Nos Hes yog ib tug neeg ua liaj ua teb noj, yog thawj tug xub pib cog hmab txiv cawv. 21 Nws haus cawv ces nws qaung cawv. Nws muab ris tsho hle, nws pw lab qab hauv nws lub tsev ntaub.

22 Has, uas yog Kas Nas Has txiv, pom nws txiv liab qab, ces nws mus hais qhia nws ob tug tij laug nraum zoov. 23 Tiam sis Xees thiab Zas Fes nkawd muab lub tsho loj kwv saum nkawd xub pwg, ces nkawd thaub qab mus muab lawv txiv vov, nkawd tsis tig ntsej muag ntsia nkawd txiv liab qab. 24 Thaum Nos Hes zoo cawv lawm, nws hnov txog tias nws tus tub ntxawg tau ua li ntawd rau nws, 25 ces nws foom tias :

"Kom Kas Nas Has hmoov phem, nws yuav ua nws ob tug kwv tij tus qhev uas qis tshaj plaws."

26 Nws tseem hais li no ntxiv :

"Kom kuv tus HUAB TAIS Tswv Ntuj muab koob hmoov zoo rau Xees, cia Kas Nas Has ua nws qhev. 27 Kom Tswv Ntuj pub chaw dav rau Zas Fes, thiab cia Zas Fes nyob hauv Xees cov tsev tsam phooj, cia Kas Nas Has ua nws qhev."

28 Thaum dej nyab ntiaj teb tas, Nos Hes

tseem nyob peb puas tsib caug xyoo ntxiv. Nos Hes lub neej ntev txog cuaj puas tsib caug xyoo. Ces nws tuag.

**Nos Hes cov tub mus nyob thoob ntiaj teb. 10 : 1 - 32.**

**10** 1 Ntawm no yog Nos Hes cov tub, Xees, Has thiab Zas Fes lawv cov caj ces. Lawv tau yug tub yug kiv txij thaum dej nyab ntiaj teb tas.

2 Zas Fes cov tub : Nkos Mes, Mas Nkos, Mas Dais, Yas Vas, Tus Npas, Mos Ses, thiab Tis Las. 3 Nkos Mes cov tub : As Kes Nas, Lis Fas, thiab Tos Nkas Mas. 4 Yas Vas cov tub : Es Lis Sas, Tas Xis, Kis Tis, thiab Los Das Nis. 5 Cov no yog cov uas tau ua neej nyob taug ntug dej. Lawv yog Zas Fes cov tub, nyias muaj nyias teb chaws nyob, nyias muaj nyias hom lus, nyias muaj nyias lub xeem thiab nyias haiv neeg.

6 Has cov tub : Kus Saws, Mis Khas Yees, Pus, thiab Kas Nas Has. 7 Kus Saws cov tub : Xes Npas Has Vis Las, Xas Tas, Las Mas, Xas Tes Kas. Las Mas cov tub : Ses Npas, thiab Des Das.

8 Kus Saws yug tau Nis Los uas nws yog thawj tus neeg kav teb chaws muaj peevee xwm nyob hauv lub qab ntuj. 9 Nws kuj yog ib tug tub tua nqaij muaj peevee xwm nyob ntawm HUAB TAIS xub ntiag. Vim li ntawd luag thiaj piv txoj lus tias : "Puav tam li Nis Los uas yog ib tug tub tua nqaij muaj peevee xwm nyob ntawm HUAB TAIS xub ntiag." 10 Cov nroog tseem ceeb nyob hauv nws lub tuam teb chaws yog cov nroog Nas Npes, Es Les thiab As Kas uas nyob tas nrho hauv lub teb chaws Sis Nes As. 11 As Xws tawm hauv lub teb chaws ntawd los thiab nws tsim cov nroog Nis Nis Vas, Les Hos Npos Tis, Kas Las, 12 thiab Les Xees

uas yog lub tuam ceeb, nyob nruab nrab ntawm Nis Nis Vas thiab Kas Las. 13 Mis Khas Yees yug tau cov haiv neeg Lus Dos, As Nas Mis, Les Has Npis, Nas Fas Tus, 14 Pas Rhos, Kas Xas Lus, thiab Kas Fas Tos, uas yog cov haiv neeg Fis Lis Tis lub keeb.

15 Kas Nas Has yug tau Xis Doos, yog tus tub hlob, thiab Hes Tes, 16 thiab cov neeg Zes Npus Xis, cov neeg As Mos, cov neeg Ntsis Nkas Sis, 17 cov neeg His Vis, cov neeg As Kis Tis, cov neeg Xis Nis, 18 cov neeg As Vas Dis, cov neeg Xes Mas Lis, thiab cov neeg Has Mas Tis. Tom qab no, cov haiv neeg Kas Nas Has tau tawg mus nyob ntaw qhov. 19 Cov neeg Kas Nas Has tus ciamb teb yog txij ntawm Xis Doos ncaj rau Zes Las, mus rau Nkas Xas, thiab mus rau Xos Dos Mas, Nkos Mos Las, As Mas, Xes Npuas Yees, thiab mus txog ntua rau Les Sas.

20 Cov no yog Has cov tub, raws li lawv cov xeem thiab lawv cov lus, raws li lawv cov teb chaws thiab lawv cov haiv neeg. 21 Xees kuj muaj ib cov tub thiab. Nws yog Es Npes cov tub tus yawg koob, thiab yog Zas Fes tus tij laug hlob.

22 Xees cov tub : Es Las, As Xws, As Pas Xas, Lus Dis, thiab As Las. 23 As Las cov tub : Us, Hus, Ntses Tes thiab Mas. 24 As Pas Xas yug tau Ses Las ; Ses Las yug tau Es Npes. 25 Es Npes yug tau ob tug tub : thawj tug hu ua Pes Les, nws ua neej nyob rau lub caij uas ntiaj teb tawg tas. Nws tus kwv hu ua Yos Tas. 26 Yos Tas yug tau As Mos Das, Ses Les, Has Xas Mas Ves, Zes Las, 27 Has Dos Las, Us Xas, Dis Las, 28 Os Npas, As Npis Mas, Ses Npas, 29 Os Fis, Has Vis Las, thiab Zos Npas. Cov no yog Yos Tas cov tub.

30 Lawv lub teb chaws yog txij Mes Sas mus rau Xes Fas, yog ib lub teb chaws ua

pov roob nyob sab hnub tuaj.  
 31 Cov no yog Xees cov tub, raws lawv cov xeem, lawv cov lus, lawv cov teb chaws, thiab lawv cov haiv neeg.  
 32 Cov saum no yog Nos Hes cov tub cov tsev neeg, raws lawv caj ces, lawv haiv neeg. Neeg tawm ntawm cov haiv neeg no los mus nyob thoob hauv ntiaj teb tom qab dej nyab ntiaj teb dhau tas.

**Tus pej thuam Npas Npes.**

**11 : 1 - 9.**

**11** 1 Thaum ntawd, tas ntiaj teb sawv daws hais ib xeem lus xwb thiab siv ib cov lus xwb. 2 Thaum lawv tsiv sab toob fab los mus, lawv los txog ib lub tiaj nyob hauv teb chaws Sis Nes As, ces lawv los nyob ntawd.

3 Lawv sib hu tias :

"Tuaj peb puab thwv cib, peb muab ci hauv hluav taws !"

Ces lawv siv cov thwv cib ntawd los ua pob zeb txhim tsev thiab siv roj hmab dub los leem. 4 Lawv hais tias :

"Tuaj peb txhim ib lub nroog rau peb thiab ib tug pej thuam kom lub ntsis siab siab mus txog saum ntuj, ces peb lub npe yuav nrov thiab peb thiab li tsis sib tawg mus nyob thoob ntiaj teb."

5 HUAB TAIS nqes los xyuas lub nroog thiab tus pej thuam uas neeg tau tsa sawv.

6 Ces HUAB TAIS hais tias :

"Ntsia saib, lawv yog ib haiv neeg thiab hais ib xeem lus xwb, ces lawv muaj peev xwm kawg, qhov no tsuas yog qhov lawv nyuam qhuav pib ua xwb, txij no mus yog lawv xav ua dab tsi thaum twg ces yuav tsis muaj ib yam uas lawv yuav ua tsis tau lawm. 7 Mus, peb sim nqes mus xyuas saib. Peb yuav ua kom lawv hais lus tsis sib to taub, ces lawv yuav tsis sib haum ntxiv lawm."

8 HUAB TAIS ua kom lawv sib tawg mus nyob thoob ntiaj teb ces lawv tso tseg tsis txhim lub nroog ntxiv. 9 Vim li ntawd thiab hu ua pej thuam Npas Npes, vim yog nyob ntawd, HUAB TAIS ua kom ntiaj teb neeg hais lus tsis sib to taub, thiab yog nyob ntawd, HUAB TAIS ua kom neeg tawg mus nyob thoob ntiaj teb.

**Xees thiab Xees caj ces.**

**11 : 10 - 26.**

10 Cov nram no yog Xees caj ces : Thaum dej nyab ntiaj teb tas tau ob xyoos lawm, mas Xees muaj ib puas xyoo, ces nws yug As Pas Xas.

11 Thaum As Pas Xas yug lawm, Xees tseem nyob tsib puas xyoo ntxiv, nws yug tau tub tau ntxhais. 12 Thaum As Pas Xas muaj peb caug tsib xyoo, nws yug Ses Las. 13 Thaum Ses Las yug los lawm, As Pas Xas tseem nyob plaub puas peb xyoo ntxiv, nws yug tau tub tau ntxhais. 14 Thaum Ses Las muaj peb caug xyoo, nws yug Es Npes.

15 Thaum Es Npes yug lawm, Ses Las tseem nyob plaub puas peb xyoo ntxiv, nws yug tau tub tau ntxhais. 16 Thaum Es Npes muaj peb caug plaub xyoo, nws yug Pes Les. 17 Thaum Pes Les yug lawm, Es Npes tseem nyob plaub puas peb caug xyoo ntxiv, nws yug tau tub tau ntxhais. 18 Thaum Pes Les muaj peb caug xyoo, nws yug Les Us. 19 Thaum Les Us yug lawm, Pes Les tseem nyob ob puas cuaj xyoo ntxiv, nws yug tau tub tau ntxhais.

20 Thaum Les Us muaj peb caug ob xyoo, nws yug Xis Lws. 21 Thaum Xis Lws yug los, Les Us tseem nyob ob puas xyoo, nws yug tau tub tau ntxhais. 22 Thaum Xis Lws muaj peb caug xyoo, nws yug Nas Hos. 23 Thaum Nas Hos

yug los lawm, Xis Lws tseem nyob ob puas xyoo ntxiv, nws yug tau tub tau ntxhais. 24 Thaum Nas Hos muaj nees nkaum cuaj xyoos, nws yug Tes Las. 25 Thaum Tes Las yus los lawm, Nas Hos nyob ib puas kaum cuaj xyoo ntxiv, nws yug tau tub tau ntxhais. 26 Thaum Tes Las muaj xya caum xyoo, nws yug Has Nplas, Nas Hos, thiab Has Laas.

**Has Nplas txiv. 11 : 27 - 32.**

27 Tes Las caj ces yog zoo li no : Tes Las yug tau Has Nplas, Nas Hos, thiab Has Laas. Has Laas yug tau Los.

28 Has Laas tuag nyob ntawm nws txiv Tes Las xub ntiag, nyob hauv lub teb chaws nws yug, uas yog Uj, nyob Kas Ntes teb. 29 Has Nplas thiab Nas Hos nkawd yuav poj niam. Has Nplas poj niam hu ua Xas Lais. Nas Hos poj niam hu ua Mis Las Kas, yog Has Laas tus ntxhais. Has Laas yog Mis Las Kas thiab Yis Xas Kas nkawd txiv. 30 Xas Lais tsis muaj me nyuam, nws yug tsis tau tub ki. 31 Tes Las coj nws tus tub Has Nplas, nws tus xeeb ntxwv Los uas yog Has Laas tus tub, thiab nws tus nyab Xas Lais uas yog Has Nplas poj niam, nws coj lawv tawm hauv cov Kas Ntes lub teb chaws Uj mus, lawv yuav tsiv mus nyob Kas Nas Has teb. Tiam sis nws tsiv los txog Has Laas teb, ces nws cia li nyob ntawd lawm. 32 Tes Las ua neej nyob txog ob puas tsib xyoos, ces nws tuag nyob Has Laas.

**Tswv Ntuj hu Has Nplas.**

**12 : 1 - 9.**

**12** 1 HUAB TAIS hais rau Has Nplas tias :

"Tso koj lub teb chaws tseg, tso koj tsev

neeg, koj tej txheeb ze thiab koj txiv lub vaj tse tseg, koj mus nyob lub teb chaws uas kuv yuav qhia rau koj.

2 Kuv yuav tsa koj ua ib haiv neeg loj, kuv yuav foom hmoov zoo rau koj, thiab kuv yuav ua kom koj lub npe nto moo loj. Koj yuav nqa txoj hmoov zoo rau txhua leej txhua tus. 3 Kuv yuav foom hmoov zoo rau cov neeg uas foom hmoov zoo rau koj, kuv yuav foom hmoov phem rau cov uas foom phem rau koj. Tas txhua haiv neeg nyob ntiaj teb yuav muab koj lub npe los sib foom hmoov zoo."

4 Has Nplas sawv kev mus raws li HUAB TAIS kom nws mus. Los kuj nrog nws mus thiab. Thaum Has Nplas tsiv hauv Has Laas teb mus, nws muaj xya caum tsib xyoos. 5 Has Nplas coj nws poj niam Xas Lais, thiab nws tus kwv tus tub hu ua Los nrog nws mus. Nws sau tas nws lub cuab tam uas nws tau tsim, thiab tas nws cov tub txib tub txuas uas nws tau muas los nyob Has Laas nrog nws mus. Lawv sawv kev mus, ces lawv tuaj txog lub teb chaws Kas Nas Has. 6 Has Nplas hla ntau lub teb chaws, nws thiaj mus txog thaj chaw ntshiab hu ua Xis Kes, ntawm qhov chaw uas muaj tus ntoo Ntseej nyob Mos Les. Thaum ntawd, cov neeg Kas Nas Has nyob hauv lub teb chaws.

7 HUAB TAIS tawm los rau Has Nplas pom, HUAB TAIS hais rau nws tias : "Kuv yuav muab lub teb chaws no rau koj tsoom xeeb ntxwv nyob."

Ces Has Nplas txhim ib lub thaj txi HUAB TAIS nyob ntawd, vim HUAB TAIS tawm los rau nws pom nyob ntawd.

8 Has Nplas hla mus rau pem roob, nyob ntawm Npes Thes sab hnub tuaj. Nws tsa nws lub tsev tsam phooj rau ntawd, Npes Thes nyob sab hnub poob, hos Ais nyob sab hnub tuaj. Nyob ntawd nws kuj tsa ib

lub thaj txi HUAB TAIS thiab teev HUAB TAIS lub npe. 9 Ces Has Nplas maj mam tsiv ib thaj chaw dhau ib thaj, mus txog lub teb chaws Nes Zes.

**Has Nplas mus nyob Hais Nkws Tos teb. 12 : 10 - 20.**

10 Thaum ntawd lub teb chaws tshaib plab, ces Has Nplas thiaj nqes mus nyob rau Hais Nkws Tos teb, vim kev tshaib plab loj kawg nyob hauv lub teb chaws.

11 Thaum nws yuav hla mus hauv Hais Nkws Tos teb, nws hais rau nws poj niam Xas Lais tias :

"Kuv paub tias koj yog ib tug poj niam zoo nkauj. 12 Yog li ntshai tsam thaum cov Hais Nkws Tos pom koj ces lawv yuav hais tias : "Yog nws poj niam," ces lawv yuav muab kuv tua thiab tseg koj txoj sia nyob. 13 Kuv thov koj, koj yuav tsum hais tias koj yog kuv tus muam no, kom lawv thiaj ua zoo rau kuv vim koj, thiab lawv thiaj tseg kuv txoj sia vim lawv saib koj."

14 Txawm muaj raws li ntawd : thaum Has Nplas mus txog Hais Nkws Tos teb, cov neeg Hais Nkws Tos pom tias tus poj niam ntawd zoo nkauj kawg. 15 Huab tais Fas Las Oos cov tub rog pom, lawv mus qhuas rau Fas Las Oos. Ces Fas Las Oos tso neeg tuaj coj tus poj niam mus nyob hauv nws lub vaj loog. 16 Fas Las Oos ua zoo heev rau Has Nplas vim tus poj niam. Nws pub yaj, pub nyuj, pub txiv luj, pub tub qhe ntxhais qhev, pub maum luj, pub thauj rau Has Nplas.

17 Tiam sis HUAB TAIS tso xwv txheej thiab kev txom nyem ntau yam los raug Fas Las Oos thiab nws tsev neeg vim Xas Lais uas yog Has Nplas tus poj niam.

18 Fas Las Oos thiaj li hu Has Nplas mus, thiab nws hais tias :

"Koj ua dab tsi li ntawd rau kuv ? Vim li cas koj thiaj tsis qhia kuv hais tias yog koj poj niam ? 19 Vim li cas koj thiaj hais rau kuv tias: "Nws yog kuv tus muam," kuv thiaj li tau coj nws los yuav ua poj niam lawm ? Nws yog koj poj niam, koj cia li coj nws mus thiab koj khiav mus kom deb !"

20 Fas Las Oos tso neeg xa Has Nplas rov los mus rau ntawm ciamb teb, nws thiab nws poj niam thiab tas puas tsav yam uas nws muaj.

**Has Nplas thiab Los sib ncaim.**

**13 : 1 - 18.**

**13** 1 Has Nplas tawm Hais Nkws Tos teb mus, nws coj nws poj niam thiab nws lub cuab tam tas huv si. Nws kuj coj Los nrog lawv rov mus nyob rau Nes Zes. 2 Has Nplas nplua nuj kawg, nws muaj tsiaj txhu, muaj nyiaj thiab muaj kub ntau. 3 Nws maj mam tshais chaw mus. Nws rov qab mus txog Npes Thes, ntawm thaj chaw uas thaud nws tau tsa tsev tsam phooj, nyob nruab nrab ntawm Npes Thes thiab Ais, 4 nyob ntawm qhov chaw uas yav nram ntej, nws tau txhim ib lub thaj txi Ntuj. Nyob ntawd, Has Nplas rov hu txog HUAB TAIS lub npe.

5 Los, uas nws nrog Has Nplas, nws kuj muaj yaj muaj nyuj thiab muaj tsev tsam phooj. 6 Lub teb chaws tsis txaus sawv daws tsa tsev, vim nkawd muaj cuab yeej cuab tam ntau dhau ces tsis tau kev rau sawv daws nyob ua ke ntxiv. 7 Has Nplas cov tub zov tsiaj thiab Los cov tub zov tsiaj tau sib ceg ib cuam. Lub caij ntawd cov neeg Kas Nas Has thiab cov neeg Pes Lis Xis nyob hauv lub teb chaws. 8 Vim li ntawd Has Nplas thiab hais rau Los tias:

"Wb tsis txhob muaj kev tsis sib haum xeeb. Kuv cov tub zov tsiaj thiab koj cov tub zov tsiaj los yuav tsis txhob muaj kev tsis sib haum xeeb, vim wb yog ob kww tij. 9 Tas nrho lub teb chaws twb qhib lug rau ntawm koj hauv ntej, puas yog ? Koj ncaim kuv mus mog. Yog koj mus sab laug ces kuv yuav mus sab xis ; yog koj mus sab xis, ces kuv yuav mus sab laug."

10 Los tsa muag ntsia, nws pom lub tiaj Yos Las Das yog ib lub tiaj muaj dej nyob ze qhov txhia chaw thiab dav dav mus txog ncuia rau As Xos, zoo li HUAB TAIS lub vaj, thiab zoo li teb chaws Hais Nkws Tos. Thaum ntawd, HUAB TAIS tsis tau rhoav Xos Dos Mas thiab Nkos Mos Las. 11 Los xaiv lub tiaj Yos Las Das huv si rau nws. Ces nws muab xub ke mus rau sab hnub tuaj. Nkawd thiab sib ncaim li ntawd. 12 Has Nplas nyob hauv lub teb chaws Kas Nas Has, hos Los mus nyob hauv cov nroog hauv lub Tiaj. Los tsa nws cov tsev tsam phooj mus txog Xos Dos Mas. 13 Cov neeg Xos Dos Mas yog ib co neeg phen tas nrho, thiab lawv ua txhaum rau HUAB TAIS.

14 Thaum Los ncaim mus lawm, HUAB TAIS hais rau Has Nplas tias : "Tsa qhov muag ntsia, txij ntawm qhov koj nyob ko mus rau sab pej thiab sab naj, mus rau toob fab thiab xib fab. 15 Tas nrho lub teb chaws uas koj pom ntawd, kuv yuav muab rau koj thiab rau koj tsoom xeeb zeeb ntxwv nyob mus li. 16 Kuv yuav ua kom koj cov xeeb ntxwv coob npaum li cov plua av nyob ntiaj teb. Yog leej twg suav txheeb cov plua av hauv ntiaj teb mas nws thiaj yuav suav txheeb koj cov xeeb zeeb xeeb ntxwv. 17 Koj sawv, koj mus ncig kom txhua thaj av qhov ntev thiab qhov dav, vim kuv yuav muab pub rau koj."

18 Ces Has Nplas tshais nws cov tsev tsam phooj, nws tsiv mus nyob ze cov nntoo Ntseej ntawm Mas Nples, uas nyob Hes Nploos. Nyob ntawd nws txhim ib lub thaj txi HUAB TAIS.

**Plaub tug vaj sawv rog. Los raug lawv ntes. 14 : 1 - 16.**

**14** 1 Thaum ntawd, As Las Fes uas yog tus vaj nyob Sis Nes As, As Lis Yos uas yog tus vaj nyob Es Las Xas, Kes Dos Laus Mes uas yog tus vaj nyob Es Las, thiab Tis Das uas yog tus vaj nyob Nkaus Yis, 2 lawv tuaj ib tog ua rog rau Npes Las uas yog tus vaj nyob Xos Dos Mas, rau Npis Sas uas yog tus vaj nyob Nkos Mos Las, rau Sis Nas Npos uas yog tus vaj nyob As Das Mas, rau Ses Mes Npes uas yog tus vaj nyob Xes Npaus Yis, thiab rau tus vaj nyob Npes Las uas yog Xos As.

3 Tsib tug hais tom qab no sib koom zog nyob hauv lub hav tiaj Xis Dis uas yog lub Hiav Txwv Ntsev. 4 Cov Kes Dos Laus Mes kav lawv tau kaum ob xyoos, tiam sis xyoo kaum peb lawv sawv ntxeev siab. 5 Xyoo kaum plaub Kes Dos Laus Mes thiab cov vaj uas nrog nws koom siab tuaj txog. Lawv ntaus yeej cov Les Fais nyob As Tes Los Kas Nas Yis, cov Xus Xis nyob Has, cov Es Mis nyob hauv lub tiaj Kis Yas Tas Yis, 6 thiab cov Hos Lis nyob saum cov roob Xes Is mus rau Es Pas Las uas nyob ntawm ntug teb chaws suab puam. 7 Ces lawv tig rov qab mus txog tus Kaus Dej Txiat Txim uas nyob Kas Des. Lawv los ntaus tau lub teb chaws As Mas Les Xis tas nrho thiab ntaus yeej cov As Mos uas nyob Has Xas Xoos Tas Mas. 8 Ces tus vaj Xos Dos Mas, tus vaj Nkos Mos Las, tus vaj As Das Mas, tus vaj Xes Npus Yis,

thiab t us vaj Npes Las (los yog Xos As), sawv tuaj mus ntaus rog hauv lub hav Xis Dis, 9 lawv koom ntaus tus vaj Kes Dos Laus Mes uas nyob Es Las, tus vaj Tis Das uas nyob Nkaus Yis, tus vaj As Las Fes uas nyob Sis Nes As, thiab tus vaj As Lis Yos uas nyob Es Las Xas, lawv plaub leeg sawv tiv tsib leeg. 10 Nyob hauv lub hav Xis Dis muaj qhov roj hmab dub, ces thaum cov vaj Xos Dos Mas thiab Nkos Mos Las khiav, lawv poob rau hauv cov qhov ntawd lawm, cov seem khiav mus nkaum nyob pem roob. 11 Tog yeej rog lwg Xos Dos Mas thiab Nkos Mos Las tej toob xib, tej txhiam xwm noj haus nqa mus tas huv si. 12 Lawv kuj ntes Los uas yog Has Nplas tus kwv tus tub uas nws nyob Xos Dos Mas, thiab lwg nws lub cuab tam tas huv si lawm, lawv mam rov mus. 13 Muaj ib tug neeg khiav dim mus hais qhia Has Nplas uas yog neeg Hes Nplaws. Has Nplas nyob ze tus As Mos Mas Nples cov Ntoo Ntseej. Mas Les yog Es Kos thiab As Nes nkawd kwv tij. Lawv nrog Has Nplas tuaj ib tog.

14 Thaum Has Nplas hnov tias nws tus tub xeeb ntxwv raug luag ntes lawm, nws sau nws cov tub rog thiab cov swm neeg tau peb puas kaum yim leej. Nws coj lawv caum luag qab mus txog Daas. 15 Has Nplas muab nws cov neeg faib, ces thaum tsaus ntuj lawm, nws mam li ntaus. Lawv ntaus yeej. Nws caum cov neeg tua Los mus txog Hos Npas, uas nyob pem qaum Das Mas. 16 Nws txeeb tau tas puas tsav yam rov qab. Nws coj nws tus tub Los thiab Los tej cuab yeej cuab tam, cov poj niam thiab cov neeg tas nrho rov los.

**Has Nplas ntsib Mes Kis Xes Des.  
14 : 17 - 24.**

17 Thaum Has Nplas mus ntaus yeej Kes Dos Laus Mes lawm, Has Nplas nrog cov vaj uas tuaj nws tog tab tom rov los, ces tus vaj Xos Dos Mas tuaj ntsib nws hauv lub hav Sas Ves (uas hu ua Vaj Ntxwv lub Hav).

18 Mes Kis Xes Des, uas yog tus vaj nyob Xas Les nqa ncuav mov thiab cawv tuaj. Nws yog tus Tswv Ntuj nyob siab tus leej choj. 19 Nws hais cov lus foom hmoov no rau Has Nplas :

"Thov kom tus Tswv Ntuj nyob siab uas tsim lub ntuj thiab lub ntiaj teb, foom hmoov zoo rau Has Nplas. 20 Thov kom tus Tswv Ntuj nyob siab nto koob meej, vim nws muab koj cov yeeb ncuab tso rau hauv koj lub xib teg lawm."

Ces Has Nplas muab ib feem kaum ntawm tas puas tsav yam nws muaj, pub rau Mes Kis Xes Des. 21 Tus vaj Xos Dos Mas hais rau Has Nplas tias :

"Koj muab cov neeg rau kuv, koj yuav tej cuab yeej cuab tam tib si mus ua koj tug."

22 Tiam sis Has Nplas teb rau tus vaj Xos Dos Mas tias :

"Kuv tsa tes cog lus rau tus Tswv Ntuj Nyob Siab uas tsim lub ntuj lub teb tias 23 kuv tsis yuav ib txoj xov los ib txoj hlua khau los ib yam dab tsi uas yog koj tug li, ces koj yuav hais tsis tau tias 'kuv tau ua kom Has Nplas nplua nuj tuaj.'

24 Kuv tsis yuav dab tsi rau kuv li. Kuv tsuas yuav tej yam noj rau kuv cov tub txib tau noj thiab yam puav ua dej siab rau cov neeg uas nrog kuv, xws li As Nes, Es Kos, thiab Mas Nples. Lawv yuav tsum tau txais ib qho nqe zog ua lawv tug."

**HUAB TAIS nrog Has Nplas cog  
lus. 15 : 1 - 21**

**15** 1 Thaum tej xwm no dhau tas

- lawm, HUAB TAIS yees tawm los hais rau kuv tso."  
 lus rau Has Nplas hnov li no :  
 "Koj txhob ntshai mog, Has Nplas! Kuv yog daim leem phiaj thaiv koj. koj yuav txais koob haum loj kawg."
- 2 Has Nplas teb tias :  
 "HUAB TAIS Tswv Ntuj, koj yuav muab dab tsi pub rau kuv ? Kuv twb yuav dua, kuv tsis muaj tub muaj kiv..."
- 3 Has Nplas hais ntxiv tias :  
 "Koj tsis pub kom kuv muaj ib tsob noob li ces ib tug qhev uas yug hauv kuv tsev yuav los txais kuv lub cuab tam."
- 4 HUAB TAIS lo lus tseem nrov tuaj rau Has Nplas tias :  
 "Tus ntawd yuav tsis yog tus los txais koj lub cuab tam, tus yuav txais koj lub cuab tam yog koj ib tug tub uas yog tseem koj roj ntsha tiag."
- 5 HUAB TAIS coj Has Nplas mus nraum zoov thiab hais rau nws tias :  
 "Koj tsa muag ntsia saum ntuj thiab suav cov hnub qub saib koj suav puas txheeb."  
 Ces nws hais tias :  
 "Koj cov xeeb ntxwv yuav coob npaum li ntawd."
- 6 Has Nplas ntseeg HUAB TAIS, ces HUAB TAIS muab Has Nplas lub siab ntseeg suav ua kev ncaj rau Has Nplas.
- 7 HUAB TAIS hais rau nws tias :  
 "Kuv yog tus HUAB TAIS uas tau kom koj tawm hauv lub teb chaws Uj uas nyob Kas Ntes los mus nyob lub teb chaws uas kuv yuav muab rau koj, ua koj tug."
- 8 Has Nplas teb tias :  
 "HUAB TAIS Tswv Ntuj, dab tsi thiaj yuav qhia rau kuv paub tias kuv tau lub teb chaws ua kuv tug ?"
- 9 HUAB TAIS hais rau nws tias :  
 "Koj mus coj ib tug xyuas nyuj muaj peb xyoos, ib tug nkauj tthis muaj peb xyoos, ib tug txiv yaj muaj peb xyoos, ib tug poj nquab thiab ib tug me nyuam nquab los  
 10 Has Nplas coj cov tsiaj raws li hais rau HUAB TAIS. Nws muab cov tsiaj phua nruab nrab, nws muab ib sab teeb rau sab xis ib sab teeb rau sab laug, tiam sis nws tsis phua cov noog. 11 Dav nyuj ya ntxiag los noj cov tsiaj, tab sis Has Nplas nplawm kom dav ya.  
 12 Thaum lub hnub tab tom poob qho, Has Nplas ib ce tsaug tas, thiab muaj ib qho ntshai loj kawg los laum Has Nplas.  
 13 Ces HUAB TAIS hais rau nws tias :  
 "Kuv qhia rau koj paub tseeb tias koj tsoom tub ki yuav mus ua qhua nyob ib lub teb chaws uas tsis yog lawv lub. Lawv yuav ua qhev nyob ntawd thiab yuav raug luag quab yuam lawv plaub puas xyoo. 14 Tiam sis kuv yuav muab txim rau haiv neeg uas quab yuam lawv, ces tom qab ntawd lawv yuav dim los thiab yuav nqa cuab yeej cuab tam ntau nrog lawv los. 15 Ntawm koj, mas koj yuav tau mus nrog koj cov yawg koob nyob kaj lug, koj yuav nyob laus nkoos koj mam mus zwm av. 16 Lawv yuav nyob plaub tiam neeg, lawv mam li rov los nyob ntawm no, vim yav nram ntej ntawd, cov neeg As Mos txoj kev phem tseem phem tsis tau txaus."  
 17 Thaum lub hnub poob qho lawm thiab tsaus ntuj lawm, ces muaj ib lub qhov txos ncho pa lug thiab ib teg tsau cig cig los hla ntawm cov sab nqaij kis nruab nrab. 18 Hnub ntawd, HUAB TAIS nrog Has Nplas cog lus li no :  
 "Kuv muab lub teb chaws no rau koj tsoom xeeb ntxwv nyob, txij tus dej nyob Hais Nkws Tos teb mus txog ntua tus Dej Loj, tus dej Aws Fas Tes. 19 Yog lub teb chaws uas cov Kes Nis, cov Kes Nis Xis, cov Kas Moos, 20 cov His Tis, cov Pes Lis Xis, cov Les Fais, 21 cov As Mos, cov Kas Nas Has, cov Ntsis Nkas Sis,

thiab cov Yes Npus Xis nyob."

**Is Mas Es yug los. 16 : 1 - 16.**

**16** 1 Xas Lais uas yog Has Nplas poj niam yug tsis tau me nyuam rau Has Nplas. Xas Lais muaj ib tug ntxhais txib, yug ib tug ntxhais Hais Nkws Tos hu ua As Nkas. 2 Xas Lais hais rau Has Nplas tias : "Koj twb pom tias HUAB TAIS tsis pub kuv muaj me nyuam li. Ua li mas koj mus yuav kuv tus ntxhais txib. Tej zaum nws yog tus yuav muab me nyuam rau kuv."

Ces Has Nplas mloog Xas Lais hais.

3 Thaum Has Nplas los nyob tau kaum xyoo hauv Kas Nas Has teb lawm, mas nws poj niam Xas Lais muab nws tus ntxhais txib Hais Nkws Tos cob rau Has Nplas, kom nws tus txiv yuav ua poj niam. 4 Has Nplas mus ntsib As Nkas ces As Nkas xeeb tub. Thaum As Nkas pom tias nws xeeb tub lawm, ces nws tsis hwm Xas Lais ua nws tus tswv ntxiv.

5 Xas Lais thiaj hais rau Has Nplas tias : "Nws ua saib tsis taus kuv li ntawd los yog tim koj kom ua. Twb yog kuv muab kuv tus ntxhais txib cob rau hauv koj xub ntiag, cas txij thaum nws pom tias nws xeeb tub lawd, nws cia li tsis hwm kuv ntxiv. Cia Tswv Ntuj txiav txim rau kuv thiab rau koj."

6 Has Nplas hais rau Xas Lais tias :

"Koj tus ntxhais txib nyob hauv koj lub xib teg, koj yuav ua li cas rau nws los nyob ntawm koj siab xav."

Xas Lais thiaj ua nruj ua tsiv rau As Nkas, ces As Nkas khiav. 7 HUAB TAIS tus Tshiab mus ntsib As Nkas ze ntawm ib lub qhov dej txhawv nyob hauv tiaj suab puam, yog lub qhov dej uas nyob ntawm txoj kev mus rau lub zos Suj.

8 HUAB TAIS tus Tshiab nug tias : "As Nkas, Xas Lais tus ntxhais txib, koj los qhov twg los thiab koj yuav mus qhov twg ?"

As Nkas teb tias :

"Yog kuv khiav kuv tus tswv Xas Lais."

9 HUAB TAIS tus Tshiab hais rau As Nkas tias :

"Koj rov qab mus nrog koj tus tswv nyob, koj mloog nws lus mog."

10 HUAB TAIS tus Tshiab hais tias : "Kuv yuav ua kom koj cov xeeb ntxwv coob coob tsis muaj leej twg suav tau."

11 HUAB TAIS tus Tshiab hais rau As Nkas tias :

"Koj cev xeeb tub lawm, koj yuav yug ib tug tub, koj yuav tis nws npe hu ua Is Mas Es, vim HUAB TAIS hnov koj lub suab quaj lawm. 12 Nws yuav yog ib tug neeg zoo nkaus li ib tug lui quis, nws yuav tsa tes ntaus sawv daws thiab sawv daws yuav tsa tes ntaus nws. Nws yuav ua neej tsis haum nws tsoom kwv tsoom tij."

13 As Nkas tis npe rau HUAB TAIS uas tau nrog nws hais lus hu li no:

"Koj yog Es Los Is."

Vim nws hais tias :

"Ua cas thaum nws tawm los rau kuv pom tas lawm, kuv tseem muaj txoj sia thiab tseem pom thaj chaw no ntxiv ?"

14 Vim li ntawd lub qhov dej ntawd thiaj siav npe hu ua Las Hais Los Is, nyob nruab nrab ntawm Kes Des thiab Npes Les. 15 As Nkas yug tau ib tug tub rau Has Nplas. Has Nplas tis npe rau tus tub uas As Nkas yug hu ua Is Mas Es.

16 Has Nplas muaj yim caum rau xyoo thaum As Nkas yug Is Mas Es rau nws.

**Tswv Ntuj lo lus cog thiab lub cim txiav. 17 : 1 - 27.**

**17** 1 Thaum Has Nplas muaj cuaj

caum cuaj xyoos, HUAB TAIS yees tawm los hais rau nws tias : hnub lawm, mas nej yuav ua lub cim txiav tawv rau txhua tus, yuav ua li no mus tiam dhau tiam, rau txhua tus uas Yug hauv nej tsev, rau tus uas nej muab nyiaj muas ntawm luag los huv tib si. 13 Nej yuav ua lub cim txiav tawv rau tus uas Yug hauv tsev thiab tus uas nej muab nyiaj muas los huv si. Nej yuav khaws kuv lo lus kuv nrog nej cog nyob hauv nej cev nqaij tas mus ib txhis. 14 Tus uas tsis tau txais lub cim txiav tawv, tus tub uas luag tsis tau txiav nws daim tawv noov, tus ntawd yuav raug tshem tawm hauv nws tsev neeg mus, vim nws tau hla lo lus kuv nrog nej cog lawm."

"Koj yuav ua txiv rau ntau haiv neeg. 5 Luag yuav tsis hu koj ua Has Nplas ntxiv. Koj yuav hu ua Has Nplas Has, vim kuv muab koj los ua txiv rau ntau haiv neeg. 6 Kuv yuav ua kom koj huam vam. Ntau haiv neeg yuav tawm hauv koj los, thiab ntau tus vaj yuav sawv hauv koj los. 7 Kuv yuav nrog koj cog lus thiab nrog haiv neeg uas tawm hauv koj cog lus; kuv lo lus cog yuav nyob mus li txheej dhau txheej tiam dhau tiam. Kuv yuav ua koj tus Tswv Ntuj thiab ua haiv neeg uas tawm hauv koj los tus Tswv Ntuj.

8 Kuv yuav muab lub teb chaws uas koj nyob no rau koj thiab rau haiv neeg uas tawm hauv koj los. Kuv yuav muab tas nrho lub teb chaws Kas Nas Has rau nej ua nej tug mus li tsis muaj caij kawg, thiab kuv yuav ua nej tus Tswv Ntuj."

9 Tswv Ntuj hais rau Has Nplas Has tias : "Ntawm koj mas koj yuav ua raws li kuv lo lus uas kuv nrog koj cog, koj thiab haiv neeg uas tawm hauv koj los, nej yuav ua raws li ntawd mus tiam dhau tiam. 10 Kuv lo lus uas nrog koj cog, thiab nrog koj caj ces cog, thiab nej yuav tsum ua raws nrail, mas muaj li no: Tas nrho nej cov tub yuav tsum txais lub cim txiav tawv. 11 Nej yuav txiav nej daim tawv noov, qhov no yuav ua ib lub cim qhia tias kuv thiab nej tau cog lus.

12 Thaum nej cov tub yug los tau yim 15 Tswv Ntuj hais rau Has Nplas Has tias :

"Koj tus poj niam Xas Lais, koj yuav tsis hu nws ua Xas Lais ntxiv, koj yuav hu nws ua Xas Las. 16 Kuv yuav foom hmoov zoo rau nws thiab kuv yuav muab ib tug tub yug ntawm nws los rau koj. Kuv yuav foom hmoov zoo rau nws, ntau haiv neeg yuav sawv hauv nws los, ntau tus vaj kav tej haiv neeg yuav sawv hauv nws los."

17 Ces Has Nplas Has pw nthi khwb rwg hauv av, nws tuaj dab ros, vim nws xav hauv nruab siab tias :

"Ib tug tub puas yuav yug tau ntawm ib tug txiv neej muaj ib puas xyoo los ? Thiab Xas Las twb muaj cuaj caum xyo lawm, nws puas tseem yuav muaj taus me nyuam ?"

18 Has Nplas Has hais rau Tswv Ntuj tias :

"Thov kom Is Mas Es ua neej nyob ntawm koj xub ntiag."

19 Tiam sis Tswv Ntuj rov teb tias : "Tsis yog nws, koj poj niam Xas Las yuav yug ib tug tub rau koj, koj yuav tis nws npe hu ua His Xas Has, kuv yuav nrog nws cog lus. Yog ib txog kev cog lus

nyob mus li. Kuv yuav ua nws tus Tswv Ntuj thiab ua nws caj ces tus Tswv Ntuj. 20 Hais txog Is Mas Es los kuv tau hnov koj lo lus thov lawm. Kuv yuav foom hmoov zoo rau nws, kuv yuav ua kom nws tsim noob ntau, yuav ua kom nws huam vam. Nws yuav yug tau kaum ob tug ua hau, thiab kuv yuav ua kom nws yog ib haiv neeg loj. 21 Tus kuv yuav nrog cog lus mas yog His Xas Has uas lwm xyoo rov txog lub zim txwv no, Xas Las yuav yug rau koj."

22 Thaum Tswv Ntuj nrog nws tham li no tas, mas Tswv Ntuj ncaim Has Nplas Has rov mus. 23 Ces Has Nplas Has muab nws tus tub Is Mas Es, tas cov tub uas yug hauv nws tsev, tas cov tub txib uas nws tau xuas nyiaj muas los, tas nrho cov txiv neej hauv nws tsev neeg tib si, nws muab sawv daws ua lub cim txiav tawv tib hnub uas Tswv Ntuj tau nrog nws tham ntawd. 24 Has Nplas Has muaj cuaj caum cuaj xyoos thaum nws ua lub cim txiav tawv rau nws, 25 hos nws tus tub Is Mas Es muaj kaum peb xyoos thaum nws ua lub cim txiav tawv rau.

26 Tib hnub ntawd kiag Has Nplas Has thiab nws tus tub Is Mas Es tau ua lub cim txiav tawv.

27 Thiab tas nrho cov txiv neej hauv nws tsev, cov yug hauv tsev, thiab cov xuas nyiaj muas ntawm luag los huv tib si puav leej tau nrog nws ua lub cim txiav tawv.

**HUAB TAIS yees tawm los rau Has Nplas Has nyob Maas Nples.**

**18 : 1 - 15.**

**18** 1 HUAB TAIS yees tawm los rau  
Has Nplas Has pom nyob hauv  
tsob qab ntoo qhib ntawm Maas Les,  
thaum nws tab tom zaum ntawm nws lub  
qhov rooj tsev ntaub, yog lub sij hawm

uas sov tshaj thaum nruab hnub nrig.

2 Nws tsa muag saib, nws pom peb tug txiv neej tuaj sawv ze ntawm nws. Nws pom dheev lawv, nws cia li sawv tsees ntawm nws lub qhov rooj tsev ntaub mus txais lawv, nws khoov hauv av pe lawv.

3 Nws hais tias :

"Huab Tais, yog koj saib kuv muaj nqis no thov koj tsis txhob hla ntawm koj tus tub txib tsis nres xyuas kuv li. 4 Kuv mam li kom lawv nqa me ntsis dej los rau nej ntxuav ko taw, ces nej thiaj zoo so hauv tsob qab ntoos no. 5 Thiab kuv yuav nrhiav ib qho mov rau nej noj kom nej lub siab muaj zog ces nej mam li mus ntxiv, vim twb yog li no, nej thiaj hla ntawm kuv puas yog ?"

Ces lawv teb nws tias :

"Ua li koj hais."

6 Has Nplas Has thiaj maj nrawm nroos mus hauv nws lub tsev ntaub mus cuag Xas Las thiab hais rau nws tias:

"Koj tsuag tsuag mus luij peb taig hmoov nplej, cov hmoov nplej uas qab qab, koj muab do, muab puab ua ib co ncuav mov."

7 Has Nplas Has tso sas ntws mus xyuas nws pab tsiaj, nws ntes kiag ib tug xyuas nyuj mos tab tom qab, nws muab cob kiag rau nws tus tub txib coj mus ua kom siav sai sai. 8 Ces Has Nplas Has nqa mis nyuj khov thiab mis nyuj haus thiab tus nyuj mos uas twb ua siav lawm coj los rau rau ntawm lawv xub ntiag. Nws sawv ntsguz ze lawv nyob ntawm tsob qab ntoo, cia lawv noj mov.

9 Lawv nug nws tias :

"Koj poj niam Xas Las mus qhov twg lawm ?"

Has Nplas Has teb tias :

"Nws nyob hauv tsev tsam phooj."

10 Ib tug thiaj hais tias :

"Lwm xyoo tav lub zim txwv no, mas kuv

yuav rov tuaj xyuas koj dua, thaum ntawd koj poj niam Xas Las yuav yug tau ib tug tub." Xas Las hnov, vim nws nyob hauv sab qhov rooj tsev tsam phooj, ntawm tus txiv neej nrob qaum mloog. 11 Has Nplas Has thiab Xas Las nkawd twb laus laus thiab muaj hnub nyog nchav heev lawm. Xas Las twb tsis ua li tej poj niam ntxiv lawm. 12 Ces Xas Las tuaj dab ros hauv nws nruab siab tias :

"Zaum no kuv twb laus lawm thiab kuv tus txiv los twb laus laus, kuv tseem yuav rov paub txoj kev zoo siab thiab lod ?"

13 Tab sis HUAB TAIS hais rau Has Nplas Has tias :

"Ua cas Xas Las thiaj luag hais tias : 'Niag laus li kuv, tseem yuav yug tau me nyuam thiab ?'

14 Puas muaj ib yam uas HUAB TAIS ua tsis tau ? Lwm xyoo kuv yuav rov tuaj ntsib koj dua tib lub caij no raws li kuv tau teem, thaum ntawd Xas Las yuav muaj ib tug tub."

15 Xas Las tsis kam lees, nws hais tias :

"Kuv tsis tau luag."

Nws hais li ntawd vim nws ntshai. Tiam sis HUAB TAIS hais tias :

"Koj twb luag tiag."

### **Has Nplas Has thov Ntuj rau Xos Dos Mas, thiab Nkos Mos Las.**

**18 : 16 - 33.**

16 Thaum peb tug txiv neej tab tom sawv kev mus, lawv ntsia pom Xos Dos Mas.

Has Nplas Has kuj nrog lawv mus thiab, nws coj lawv kev. 17 HUAB TAIS hais hauv nruab siab tias :

"Kuv puas yuav zais tsis qhia Has Nplas Has txog qhov uas kuv npaj yuav ua ?

18 Vim hais tias nws yuav yog ib haiv neeg loj thiab muaj hwj chim, nws yuav yog lub chaw ua rau txhua haiv neeg hauv

ntiaj teb tau kev sib foom hmoov zoo.

19 Kuv twb tau xaiv nws, kom nws qhia nws cov tub thiab nws tsev neeg yuav yug yav tom ntej, kom sawv daws ua lub neej raws nraim li HUAB TAIS txoj cai, yog yuav tsum txiav txim thiab coj raws txoj kev ncaj ncees. Yog lawv coj li ntawd mas HUAB TAIS thiaj li yuav pub kom Has Nplas Has tau raws li qhov nws tau cog lus."

20 Ces HUAB TAIS hais tias :

"Muaj ib lub suab cem Xos Dos Mas thiab Nkos Mos Las nrov kawg tuaj txog kuv vim lawv niaj hnub ua txhaum loj.

21 Yog li kuv yuav nqes mus xyuas saib lawv puas tau ua phem npaum li lub suab nrov tuaj los tsis tau, ces kuv thiaj paub."

22 Ob tug txiv neej sawv kev mus rau Xos Dos Mas lawm. Tshuav HUAB TAIS tseem nrog Has Nplas Has nyob.

23 Has Nplas Has txav zog los ze, nws nug tias :

"Koj puas yuav txo cov neeg ncaj nrog cov neeg txhaum ? 24 Tej zaum yuav muaj li tsib caug leej neeg ncaj nyob hauv lub nroog, koj puas yuav muab lawv rhuav, tsis zam rau lub nroog tab yog muaj lawv nyob hauv ? 25 Thov kom zaj tswv yim uas rhuav tus siab ncaj nrog tus txhaum ntawd nyob deb koj. Koj txhob cia tus siab ncaj nrog tus neeg txhaum tuag. Thov kom lub tswv yim ntawd nyob deb koj. Tus txiav txim rau lub ntiaj teb, nws yuav tsis txiav txim ncaj lod ?"

26 HUAB TAIS teb tias :

"Yog kuv nrhiav tau tsib caug leej neeg ncaj nyob hauv lub nroog Xos Dos Mas, kuv yuav zam rau lub nroog tas huv si vim lawv."

27 Has Nplas Has rov hais tias :

"Kuv yog plua av xwb, tsis kav kuv tseem muaj cuab kav nrog kuv tus Huab Tais

hais. 28 Vim tias, tej zaum tsis muaj txog tsib caug leej neeg ncaj, yog tsawg tsib leeg, koj puas yuav rhuav lub nroog tas huv si vim tsawg tsib leeg ntawd ?"  
**HUAB TAIS** teb tias :  
 "Kuv yuav tsis rhuav, yog tias kuv nrhiav tau plaub caug tsib leeg ncaj."  
 29 Has Nplas Has rov hais dua tias : "Tej zaum muaj plaub caug leej ?"  
**HUAB TAIS** teb tias :  
 "Kuv yuav tsis rhuav, vim plaub caug leej ntawd."  
 30 Has Nplas Has hais tias :  
 "Thov kom kuv tus Huab Tais txhob npau taws thiab cia kuv hais lus. Tej zaum muaj peb caug leej xwb ?"  
**HUAB TAIS** teb tias :  
 "Kuv yuav tsis rhuav, yog kuv nrhiav tau peb caug leej."  
 31 Has Nplas Has hais tias :  
 "Kuv ua neeg muaj cuab kav tas zog, kuv thiaj nrog kuv tus Huab Tais hais ntxiv : Tej zaum nrhiav tau nees nkaum leej xwb ?"  
**HUAB TAIS** teb tias :  
 "Kuv yuav tsis rhuav, vim nees nkaum leej ntawd."  
 32 Has Nplas Has hais tias :  
 "Thov kom kuv tus Huab Tais tsis txhob npau taws, kuv tseem yuav hais ib zaug ntxiv yog zaum kawg : Tej zaum yuav nrhiav tau kaum leej xwb ?"  
**HUAB TAIS** teb tias :  
 "Kuv yuav tsis rhuav, vim kaum leej ntawd."  
 33 **HUAB TAIS** nrog Has Nplas Has tham tas, nws mus lawm. Has Nplas Has rov qab mus tsev.

Dos Mas thaum yuav tsaus ntuj, Los zaum ntawm lub rooj vag nkag chaws mus hauv lub nroog. Thaum Los pom dheev nkawd, nws sawv tsees mus txais nkawd, nws khoov ti av hawm nkawd.  
 2 Nws hais tias :  
 "Ob tug txiv hlob, kuv thov neb nkag los hauv neb tus tub txib lub tsev, los pw ib hmos, los ntxuav ko taw, tag kis neb mam li mus ntxiv."  
**Nkawd** teb tias :  
 "Wb tsis los, wb mam mus pw tom tshav puam."  
 3 Tiam sis Los cheem nkawd tas siab nrho. Nkawd yig tsis dhau, thiaj li ua siab nkag mus so hauv Los tsev. Los npaj ib pluag mov rau nkawd, nws ci ib co ncuav mov tsis xyaw poov xab, ces nkawd noj mov.  
 4 Lawv tseem tsis tau pw, cov neeg hauv lub nroog txawm siv tuaj vij Los lub tsev tag. Tas nrho cov neeg hauv Xos Dos Mas tuaj, cov hluas thiab cov laus tuaj huv tib si tsis seem ib tug li.  
 5 Lawv hu Los hais tias :  
 "Ob tug txiv neej uas hmo no tuaj so hauv koj tsev nyob qhov twg lawm ? Koj coj nkawd tawm los cia peb muab nkawd txhom ua dev saib !"  
 6 Los tawm plaws ntawm qhov rooj mus nraum lawv, nws muab qhov rooj kaw nkaus, 7 nws hais tias :  
 "Cov kwv tij, kuv thov nej tsis txhob ua phem li ntawd ! 8 Nej mloog kuv hais : Kuv muaj ob tug ntxhais tseem dawb huv, kuv mam coj nkawd tuaj rau nej. Nej xav ua li cas rau nkawd los nyob ntawm nej siab nyiam. Thov nej tsis txhob ua dab tsi rau ob tug txiv neej, vim nkawd tuaj so hauv kuv lub ru tsev xwb."  
 9 Tiam sis lawv teb zom zaws tias : "Txav kev ! Nej ntsia saib, nws tuaj nyob peb av xwb, nws tseem cav yuav txiav

**Xos Dos Mas thiab Nkos Mos Las  
raug hlawv. 19 : 1 - 29.**

**19** 1 Ob tug Tshiab tuaj txog Xos

txim rau peb thiab ! Peb yuav muab koj tsim kom pov khawv nkaus, kom tshaj qhov peb ua rau nkawd thiab ntag !" Ces lawv sib sib zog muab Los thawb kom lawv tau txav los tsoo lub qhov rooj.

10 Tiam sis ob tug txiv neej cev tes tuaj rub Los rau hauv tsev thiab kaw lub qhov rooj rau. 11 Nkawd ua kom cov neeg nyob nraum zoov qhov muag tsis pom kev, tsis hais cov yau los cov hlob huv tib si, ces lawv nrhiav tsis tau lub qhov rooj lawm.

12 Ob tug txiv neej hais rau Los tias : "Koj puas tseem muaj leej twg nyob ntawm no ntxiv thiab ? Koj cov tub, koj cov ntxhais, tas koj cov neeg nyob hauv lub nroog no, koj yuav tsum hais kom lawv cia li tawm hauv thaj chaw no mus.

13 Vim wb yuav muab thaj chaw no rhuav. Tau muaj ib lub suab qw tuaj rau HUAB TAIS hais txog lawv qhov phem, ces HUAB TAIS thiaj xa wb tuaj muab lawv rhuav kom tu noob."

14 Los thiaj li mus nrog cov uas yuav ua nws vauv tham. Nws hais rau lawv tias : "Nej cia li sawv kev kхиav tawm ntawm thaj chaw no mus, vim HUAB TAIS yuav rhuav lub nroog no."

Tiam sis cov vauv xav hais tias nws dag xwb. 15 Thaum yuav kaj ntug, ob tug Tshiab rov hais rau Los tias :

"Koj cia li sawv ! Coj koj poj niam thiab koj ob tug ntxhais ntawd mus, tsam ib ntsis nej yuav raug xwm txheej li lub nroog thiab."

16 Los tseem ua xyem xyav, ces ob tug txiv neej nthos nkaus Los tes nrog nws poj niam thiab ob tug ntxhais, vim HUAB TAIS khuv leej lawv. Nkawd muab lawv cab tawm plaws rau sab nroog nraud.

17 Thaum lawv tab tom tawm, HUAB TAIS hais rau Los tias :

"Koj cia li kхиav cawm koj txoj sia! Koj

tsis txhob tig ntsia rov tom qab, tsis txhob theem nram tiaj, koj kхиav mus nkaum lawm pem roob ces koj thiaj yuav tsis tuag !"

18 Los teb nkawd tias :

"Ntshai kuv yuav tsis mus ped, kuv thov koj, HUAB TAIS ! 19 Koj twb tau saib koj tus tub txib muaj nqe thiab koj twb tau hlub kuv kawg nkaus koj thiaj cawm kuv kom kuv tseem muaj sia nyob. Yog kuv kхиav mus pem roob ces ntshai tsam kuv kхиav tsis yeej ces kuv xub tuag lawm. 20 Muaj ib lub nroog nyob tsis deb, kхиav kuj yuav txog sai. Thiab yog ib lub nroog me tsis tseem ceeb dab tsi. Thov cia kuv mus nkaum ntawd ; vim tsuas yog ib lub nroog me tsis tseem ceeb dab tsi, ces kuv yuav dim.

21 HUAB TAIS teb rau Los tias :

"Kuv yuav cia koj ua li koj thov, kuv yuav tsis rhuav lub nroog uas koj hais ntawd. 22 Kav tsij maj zeeg kхиav mus rau ntawd. Vim tias yog koj mus tsis tau txog, mas kuv yuav ua tsis tau dab tsi ua ntej li."

Vim li no lub nroog ntawd thiaj muaj lub npe hu ua Xos As. 23 Thaum lub hnub tawm plaws, ces Los kхиav nkag plaws rau hauv Xos As. 24 Ces HUAB TAIS nchuav kiag ib co nag leej faj xyaw hluav taws los hlawv Xos Dos Mas thiab Nkos Mos Las. 25 Nws muab cov nroog thiab lub tiaj rhuav du lug nrog rau cov neeg nyob hauv cov nroog thiab tej nroj tsuag tas huv tib si. 26 Los poj niam tig ntsia rov tom qab, nws cia li khov ua ib tug ncej ntsev lawm.

27 Thaum kaj ntug, Has Nplas Has sawv ntxov mus nyob ntawm thaj chaw uas nws tau nrog HUAB TAIS hais lus.

28 Nws tsa muag ntsia Xos Dos Mas, Nkos Mos Las thiab tas nrho lub tiaj, nws pom pa taws ncho lug cuag li tawm hauv

ib lub qhov txos tuaj. 29 Ces thiaj hais tau tias, thaum Tswv Ntuj rhuav cov nroog nram tiaj, nws tseem nco ntsoov txog Has Nplas Has, thiab nws tau npo Los dim ntawm qhov tuag thaum nws rhuav cov nroog uas Los nyob.

**Cov Muas thiab cov As Moos lub keeb. 19 : 30 - 38.**

30 Los tawm ntawm Xos As, nws nce mus nyob pem roob. Nws ob tug ntxhais kuj nrog nws mus, vim nws ntshai nyob Xos As. Los coj nws ob tug ntxhais mus nrog nws nkaum hauv ib lub qhov tsua. 31 Tus ntxhais hlob hais rau tus yau tias : "Wb txiv laus lawm, thiab teb chaws no tsis muaj neeg rau wb yuav ua txiv xws li sawv daws. 32 Yog li wb muab cawv rau wb txiv haus ces wb nrog nws pw. Wb ua li ntawd wb txiv thiaj li yuav muaj ib tsob noob cia."

33 Hmo ntawd, nkawd muab cawv rau nkawd txiv haus kom qaug. Tus ntxhais hlob mus nrog nws txiv pw. Nws txiv tsis hnov thaum nws los pw los thaum nws sawv li. 34 Tag kid, tus ntxhais hlob hais rau tus yau tias : "Nag hmo, kuv tau nrog kuv txiv pw lawm. Hmo no wb rov qab muab cawv rau nws haus dua, ces koj mus nrog nws pw. Wb ua li ntawd wb txiv thiaj muaj ib tsob noob cia."

35 Hmo ntawd nkawd rov qab muab cawv rau nkawd txiv haus, ces tus ntxhais yau mus nrog nws txiv pw. Nws txiv tsis hnov thaum nws los pw los thaum nws sawv mus li. 36 Los ob tug ntxhais thiaj muaj nkawd txiv me nyuam. 37 Tus hlob yug tau ib tug tub, nws muab tis npe hu ua Mos As. Nws yog cov neeg Muas niaj hnub no tus yawg koob. 38 Tus ntxhais yau kuj yug tau ib tug tub thiab, nws

muab tis npe hu ua Npes Nas Mis. Nws yog cov neeg Npes Nes As Moos niaj hnub no tus yawg koob.

**Has Nplas Has mus nyob Zes Las. 20 : 1 - 18.**

**20** 1 Has Nplas Has sawv kev mus rau lub teb chaws Nes Zes. Nws mus nyob thaj tsam nruab nrab ntawm Kas Des thiab Sus. Ces nws ho mus nyob Zes Las. 2 Has Nplas Has hais txog nws poj niam Xas Las tias:

"Yog kuv tus muam."

Ces tus vaj nyob Zes Las, hu ua As Npis Mes Les, tuaj coj Xas Las mus yuav lawm. 3 Tiam sis, hmo ntuj Tswv Ntuj tuaj xyuas As Npis Mes Les hauv npau suav thiab hais rau nws tias :

"Koj yuav tuag vim tus poj niam uas koj mus yuav los nws muaj txiv lawm."

4 As Npis Mes Les tseem tsis tau chwv tus poj niam li, nws hais tias :

"Kuv tus Huab Tais, koj puas yuav tua ib tug neeg tsis txhaum ? 5 Twb yog nws hais rau kuv tias : 'Yog kuv tus muam'. Tus poj niam kiag los nws twb hais rau kuv tias: 'Yog kuv tus nus', Txawm kuv tau ua li ntawd los kuv lub siab yeej dawb paug thiab kuv tes tseem huv si."

6 Tswv Ntuj teb nws hauv nruab npau suav hais tias :

"Kuv yeej paub hais tias koj muaj lub siab dawb paug tiag, vim li ntawd kuv thiaj li tau cheem kom koj tsis txhob ua txhaum rau kuv, kuv thiaj li ua kom koj txhob mus chwv nws. 7 Zaum no, koj yuav tsum xa tus poj niam rov qab rau tus txiv neej : nws yog ib tug yaj saub, nws yuav thov ntuj zam rau koj ces koj yuav ciaj. Yog koj tsis xa nws rov qab, mas kuv hais tseeb rau koj tias koj yuav tuag xwb, thiab koj tsev neeg yuav tuag tas."

8 As Npis Mes Les sawv ntxov ntxov, nws hu tas nrho nws cov neeg tuaj, nws piav zaj no rau lawv mloog. Cov neeg ntshai kawg. 9 Ces As Npis Mes Les hu Has Nplas Has tuaj, thiab nws hais rau Has Nplas Has tias :

"Koj ua dab tsu li ntawd rau peb ? Kuv tau ua dab tsu txhaum koj, ua cas koj thiab li rub ib lub txim loj tas npaud los rau kuv thiab kuv lub teb chaws ris ? Koj tsis muaj caiyuav ua li ntawd rau kuv."

10 As Npis Mes Les tseem hais rau Has Nplas Has tias :

"Vim li cas koj ua li ntawd rau peb ?"

11 Has Nplas Has teb tias :

"Yog vim kuv xav hais tias ntshai yuav tsis muaj kev hwm Ntuj nyob qhov no li, ces luag yuav muab kuv tua pov tseg kom tau kuv poj niam xwb. 12 Thiab nws yeej yog kuv tus muam tiag thiab ; nws yog kuv txiv tus ntxhais tiam sis tsis yog kuv niam tus ntxhais, nws ho yog kuv poj niam thiab. 13 Thaum Tswv Ntuj tau cia kuv nyob tsis muaj chaw, deb ntawm kuv txiv lub tsev, kuv tau hais rau nws tias : Yog koj hlub kuv mas koj yuav ua li no : Txhua qhov chaw wb mus txog mas koj yuav hais tias kuv yog koj tus nus no."

14 As Npis Mes Les muab yaj muab nyuj, muab tub qhe ntxhais qhev pub rau

Has Nplas Has, thiab xa nws poj niam Xas Las rov qab rau nws.

15 As Npis Mes Les hais rau Has Nplas Has tias :

"Kuv lub teb chaws qhib lug rau koj. Koj xav mus nyob qhov twg los nyob ntawm koj nyiam."

16 Nws hais rau Xas Las tias :

"Ntawm no yog ib txhiab lub txiaj nyiag uas kuv muab rau koj tus nus. Yog muab npog cov neeg uas koj nrog nyob lub qhov muag kom lawv pom tias kuv twb kho koj lawm."

17 Has Nplas Has thov Ntuj rau As Npis Mes Les, ces Tswv Ntuj kho As Npis Mes Les, kho nws poj niam thiab nws cov ntxhais qhev kom lawv muaj taus me nyuam. 18 Vim HUAB TAIS tau ua kom tas nrho cov poj niam nyob hauv As Npis Mes Les lub tsev tsis txhob xeeb tub, vim qhov lawv coj Xas Las uas yog Has Nplas Has poj niam los lawm.

### **His Xas Has Yug los. 21 : 1 - 7.**

**21** 1 HUAB TAIS pub rau Xas Las raws li nws tau hais thiab ua rau Xas Las raws li nws tau cog lus. 2 Ces Xas Las xeeb tub, nws yug ib tug tub rau Has Nplas Has thaum nws laus lawm, yug rau lub caij uas Tswv Ntuj tau teem cia. 3 Has Nplas Has tis npe rau nws tus tub uas Xas Las yug hu ua His Xas Has. 4 Has Nplas Has ua lub cim txiav tawv rau His Xas Has thaum nws muaj yim hnub, raws li Tswv Ntuj tau hais kom ua. 5 Has Nplas Has muaj ib puas xyoo nkaus thaum nws tus tub His Xas Has yug los.

6 Ces Xas Las thiaj hais tias :

"Tswv Ntuj tau pub kom kuv muaj chaw zoo siab luag ntxhi. Txhua leej uas tau hnub txog kuv yuav luag ntxhi thiab."

7 Xas Las tseem hais tias :

"Tsis muaj leej twg yuav hais tau rau Has Nplas Has tias Xas Las yeej yuav yug me nyuam xwb. Tiam sis zaum no, txawm tias nws laus lawm los kuv kuj yug tau ib tug tub rau nws thiab."

### **Xas Las ntib As Nkas thiab Is Mas Es. 21 : 8 - 21.**

8 Thaum tus me nyuam loj txaus lawm, lawv muab nws cais mis. Has Nplas Has ua ib pluag mov loj loj rau His Xas Has hnub cais nws mis ntawd. 9 Xas Las

xauj pom Has Nplas Has tus tub uas yug ntawm tus poj Hais Nkws Tos los, nrog nws tus tub His Xas Has ua si.

10 Xas Las hais rau Has Nplas Has tias: "Ntiab koj niag ntxhais qhev ntawd thiab nws tus tub khiav mus. Tsis pub kom niag ntxhais qhev ntawd tus tub los nrog kuv tus tub His Xas Has sib txeeb lub cuab tam."

11 Cov lus no ua rau Has Nplas Has tsis zoo siab, thiab ntxhov siab rau nws tus tub. 12 Tiam sis Tswv Ntuj hais rau nws tias :

"Koj tsis txhob nyuaj siab txog tus me nyuam thiab koj tus ntxhais txib. Xas Las xav kom koj ua dab tsi mas koj ua raws li ntawd, vim His Xas Has thiaj yog tus yuav ua koj caj ces thiab yuav khaws koj lub npe kom nyob mus li. 13 Hos tus tub ntawm tus ntxhais qhev los kuv kuj yuav muab nws ua ib haiv neeg loj vim nws yog koj roj ntsha."

14 Tag kis tom qab, Has Nplas Has sawv ntxov ntim mov thiab ib hnab tawv dej rau As Nkas, nws muab tus me nyuam tsaws rau saum As Nkas xub pwg, ces nws kom nkawd tawm mus. As Nkas mus poob zoo rau hauv lub tiaj suab puam Npes Xas Npes. 15 Thaum nws lub hnab tawv dej tas lawm, nws muab tus me nyuam tso tseg rau hauv ib tsob qab ntoos, 16 ces nws txav mus zaum deb ntawm tus me nyuam li ib ncua hneev. Nws xav twj ywm hais tias : "Kuv tsis xav pom tus me nyuad tuag." Nws zaum ces nws quaj quaj. 17 Tswv Ntuj hnov tus me nyuam lub suab quaj, ces Tswv Ntuj tus Tshiab hu saum ntuj tuaj rau As Nkas tias :

"As Nkas, koj quaj dab tsi ? Koj tsis txhob txhawj vim Tswv Ntuj tau hnov tus me tub lub suab quaj lawm. 18 Koj cia li mus tsa tus me tub kom sawv los thiab

koj yuav saib nws zoo, vim kuv yuav muab nws tsa ua ib haiv neeg loj."

19 Tswv Ntuj qhib As Nkas qhov muag ces As Nkas pom ib lub qhov dej. Nws thiaj nqa hnab mus ntim dej coj los rau tus me nyuam haus. 20 Tswv Ntuj nrog nraim nws. Nws hlob tiav txuj hauv teb chaws suab puam. Ces nws ua ib tug neeg tua hneev. 21 Nws ua neej nyob hauv lub tiaj suab puam Pas Las. Nws niam muab ib tug nyab Hais Nkws Tos rau nws yuav.

**Has Nplas Has thiab As Npis Mes  
Les nyob Npes Xas Npes.**

**21 : 22 - 34.**

22 Thaum lub caij ntawd, As Npis Mes Les nrog nws tus thawj tub rog Pis Kos tuaj hais rau Has Nplas Has tias :

"Vim Tswv Ntuj pab koj nyob hauv txhua yam uas koj ua. 23 Ua li mas, zaum no koj cog lus rau kuv ntawm Tswv Ntuj xub ntiag tias koj yuav tsis dag kuv, thiab tsis dag kuv caj ces, kuv tsev neeg, thiab koj yuav nrog kuv ntaus phooj ywg, thiab ntaus phooj ywg rau lub teb chaws uas koj tuaj poob no, ib yam li kuv tau nrog koj ntaus phooj ywg."

24 Has Nplas Has teb hais tias :  
"Kuv cog lus li ntawd !"

25 Has Nplas Has hais rau As Npis Mes Les txog lub qhov dej uas As Npis Mes Les cov tub txib tau liam cai siv. 26 As Npis Mes Les teb tias :

"Kuv tsis paub leej twg yog tus tau ua li ntawd. Koj tsis tau hais qhia rau kuv ib zaug li. Kuv nyuam qhuav hnov txog qhov ntawd hnub no xwb."

27 Has Nplas Has muab yaj muab nyuj ua paj tshab pub rau As Npis Mes Les, ces nkawd muaj kev sib cog lus. 28 Has Nplas Has muab xya tus me nyuam yaj

los tso rau ib cag. 29 As Npis Mes Les  
nug nws tias :  
"Cas koj muab xya tus me nyuam yaj los  
tso rau ib cag li no ?"  
30 Has Nplas Has teb tias :  
"Yog muab rau koj, koj yuav tsum yuav  
xya tus me nyuam yaj no los ua puav  
pheej tias kuv yog tus uas tau khawb lub  
qhov dej."  
31 Vim li no thaj chaw ntawd thiaj tau  
lub npe tias Npes Xas Npes, vim nkawd  
ob leeg sib cog lus nyob ntawd.  
32 Thaum nkawd tau cog lus nyob Npes  
Xas Npes tas lawm, As Npis Mes Les  
sawv kev nrog nws tus thawj tub rog rov  
qab mus rau teb chaws Fis Lis Tis.  
33 Has Nplas Has cog ib tsob ntoo rau  
ntawm Npes Xas Npes, ces nws hu txog  
tus HUAB TAIS Tswv Ntuj nyob mus li  
lub npe nyob ntawd.  
34 Has Nplas Has nyob ntev xyoo hauv  
lub teb chaws Fis Lis Tis.

**Has Nplas Has txi Ntuj.**

**22 : 1 - 19.**

**22** 1 Thaum tej xwm no dhau tas  
lawm, Tswv Ntuj sim Has Nplas  
Has siab. Nws hu tias :  
"Has Nplas Has ! Has Nplas Has !"  
Has Nplas Has teb tias :  
"Kuv nyob ntawm no !"  
2 Tswv Ntuj hais tias :  
"Coj koj leej tub twm zeej His Xas Has  
uas koj hlub kawg, koj coj nws mus kom  
txog lub teb chaws Mos Lis Yas. Nyob  
ntawd koj yuav muab nws txi rau kuv  
saum ib lub roob uas kuv yuav qhia rau  
koj."  
3 Tag kis, Has Nplas Has sawv ntxov,  
nws nog nra rau nws tus lui, nws coj ob  
tug tub txib thiab nws tus tub His Xas  
Has nrog nws mus. Nws phua ib co taws  
npaj mus ua thaj txi ntuj, ces nws sawv  
kev mus rau thaj chaw uas Tswv Ntuj  
qhia rau nws.  
4 Hnub peb, Has Nplas Has tsa muag  
ntsia pom thaj chaw ntawd tseem nyob  
deb.  
5 Has Nplas Has hais rau nws ob tug tub  
txib tias :  
"Neb nrog tus luij nyob ntawm no. Kuv  
tus me nyuam wb mus kom txog tid, wb  
yuav hawm Ntuj, wb mam rov los ntawm  
neb."  
6 Has Nplas Has muab cov taws txi Ntuj  
nog rau nws tus tub His Xas Has ris, hos  
nws nqa cov hluav taws thiab rab riam,  
ces nkawd ob leeg ua ke mus.  
7 His Xas Has nug nws txiv Has Nplas  
Has tias :  
"Kuv txiv !"  
Has Nplas Has teb tias :  
"Me tub, koj hais dab tsi !"  
His Xas Has hais ntxiv tias :  
"Ua cas pom hluav taws thiab cov taws  
xwb, ua li tus yaj yuav coj los hlawv txi  
Ntuj nyob qhov twg ?"  
8 Has Nplas Has teb tias :  
"Me tub, Tswv Ntuj mam li muab tus yaj  
uas yuav txi Ntuj rau wb."  
Ces nkawd ob leeg taug kev mus ntxiv.  
9 Thaum nkawd tuaj txog thaj chaw uas  
Tswv Ntuj tau qhia nws, Has Nplas Has  
tsa ib lub thaj rau ntawd thiab nws muab  
cov taws mus teeb rau saud. Nws muab  
nws tus tub His Xas Has pav, ces nws  
muab tso rau saum cov taws saum lub thaj  
txi Ntuj. 10 Has Nplas Has tsa tes mus  
nthos rab riam yuav coj los tua nws tus  
tub. 11 Tiam sis HUAB TAIS tus Tshiab  
hu saum ntuj tuaj rau nws tias :  
"Has Nplas Has ! Has Nplas Has !"  
Has Nplas Has teb tias :  
"Kuv nyob ntawm no !"  
12 Tus Tshiab hais tias :

"Txhob tsa koj txhais tes rau saum tus me nyuad ! Txhob ua dab tsu phem rau nws ! Zaum no kuv paub hais tias koj hwm Tswv Ntuj tiag, vim koj tsis yig, koj tseem muab koj leej tub twm zeej los txi rau kuv."

13 Has Nplas Has tsa muag ntsia pom ib tug laug tthis uas ob tug kub daig hauv ib koog pos. Ces nws mus muab tus laug tthis los hlawv txi Ntuj hloov nws tus tub chaw. 14 Has Nplas Has tis npe rau thaj chaw ntawd hu ua "HUAB TAIS yuav pub." Ces zaum no thiaj muaj lo lus hais kam tias "Saum lub roob HUAB TAIS yuav pub."

15 HUAB TAIS tus Tshiab rov hu zaum ob saum ntuj tuaj rau Has Nplas Has, 16 nws hais tias :

"HUAB TAIS hais tias : Kuv tuav txog kuv lub npe cog lus rau koj tias : vim koj tau ua li ntawd, koj tsis yig, koj tuaj yeem muab koj leej tub twm zeem los txi rau kuv, 17 mas kuv yuav foom hmoov zoo ntau rau koj, kuv yuav ua kom koj tsoom xeeb zeeb ntxwv coob npaum cov hnub qub saum ntuj thiab ntau npaum cov xuab zeb uas nyob ntawm ntug hiav txwv. Koj tsoom xeeb zeeb ntxwv yuav ua tswv kav lawv cov yeeb ncuab tej qhov rooj loog. 18 Tas txhua haiv neeg nyob ntiaj teb yuav tuav txog koj tsoom xeeb ntxwv lub npe los sib foom hmoov zoo, vim koj tau mloog kuv lus."

19 Has Nplas Has rov qab los cuag nws ob tug tub txib, ces lawv sawv kev rov los rau Npes Xas Npes. Has Nplas Has nyob Npes Xas Npes.

**Nas Hos caj ces. 22 : 20 - 24.**

20 Thaum tej xwm no dhau lawm, lawv qhia rau Has Nplas Has tias Mis Las Kas kuj yuav tau ib co tub rau nws tus kwv Nas

Hos thiab. 21 Tus tub hlob hu ua Us, Us tus kwv hu ua Npaws, cov yau tom qab muaj Kes Mus Es uas yog As Las txiv, 22 Kes Xes, Has Xos, Pis Das, Yis Las, Npes Tus Es. 23 Npes Tus Es Yug Les Npes Kas. Cov no yog yim leej tub uas Mis Las Kas Yug rau Nas Hos uas yog Has Nplas Has tus kwv. 24 Nas Hos muaj ib tug niam yau hu ua Les Us Mas. Nws kuj yuav tau ib co tub thiab : yog Tes Npas, Nkas Has, Tas Has, thiab Mas As Kas.

**Cov Poj Yawm Txwv Koob lub toj ntxas. 23 : 1 - 4 + 17 - 19.**

**23** 1 Xas Las ua neej txog ib puas nees nkaum xya xyoo. 2 Ces nws tuag nyob Kis Lias As Npas uas yog Hes Nploos, nyob teb chaws Kas Nas Has. Has Nplas Has muab nws pam thiab quaj nws nyob ntawd. 3 Has Nplas Has mus hais rau Hes cov tub tias :

4 "Kuv yog ib tug qhua tuaj poob rau hauv nej. Kuv thov nej pub ib qho chaw rau kuv kom kuv tau coj kuv tus tuag mus zais."

17 Ces Es Plhoos daim teb uas nyob Mas Pes Las nyob ze ntawm Mas Nples, daim teb thiab lub qhov tsua thiab tas cov ntoo nyob hauv daim teb huv tib si, 18 poob ua Has Nplas Has tug. Hes cov tub ua cov tau nrog paub nrog pom thiab tas nrho cov neeg uas hla ntawm lub qhov rooj vag mus hauv nws lub nroog tau nrog pom. 19 Ces Has Nplas Has coj Xas Las mus los rau hauv lub qhov tsua hauv daim teb Mas Pes Las, nyob ze ntawm Mas Nples, hauv teb chaws Kas Nas Has.

**His Xas Has yuav poj niam.**

**24 : 1 - 34 + 42 - 67.**

**24** 1 Thaum ntawd Has Nplas Has

laus lawm, thiab muaj hnub nyoog nchav. HUAB TAIS tau foom hmoov zoo rau Has Nplas Has nyob hauv txhua yam tib si. 2 Has Nplas Has hais rau nws tus tub txib uas laus dua cov, thiab yog tus saib nws lub cuab tam tias :

3 "Koj cev tes npuab kuv plab hlaub, thiab koj cog lus rau HUAB TAIS uas yog tus Tswv lub ntuj thiab lub ntiaj teb hnov tias koj yuav tsis nrhiav ib tug poj niam Kas Nas Has rau kuv tus tub yuav. 4 Koj yuav mus pem kuv lub teb chaws, mus xaiv ib tug poj niam nyob hauv kuv tsev neeg coj los rau kuv tus tub His Xas Has yuav."

5 Tus tub txib nug tias :

"Ntshai tsam tus poj niam ntawd tsis kam nrog kuv los nyob teb chaws no, kuv puas yuav tsum coj koj tus tub mus lawm pem lub teb chaws uas koj yug los ?"

6 Has Nplas Has teb tias :

"Koj yuav tsis txhob coj kuv tus tub mus. 7 HUAB TAIS, yog tus Tswv lub ntuj thiab lub ntiaj teb, nws tau coj kuv mus deb kuv lub teb chaws thiab nws tau cog lus rau kuv tias nws yuav muab lub teb chaws no rau kuv cov xeeb ntxwv, tus HUAB TAIS ntawd yuav xa nws tus Tshiab mus ua koj ntej, kom koj nrhiav tau ib tug poj niam nyob hauv kuv lub teb chaws rau kuv tus tub. 8 Yog tus poj niam tsis kam nrog koj los, mas koj yuav tsis txhaum dab tsi, tab sis koj yuav tsis txhob coj kuv tus tub mus."

9 Tus tub txib cev tes mus npuab nws tus tswv Has Nplas Has plab hlaub thiab nws cog lus tias nws yuav ua txoj hauj lwm ntawd kom tau. 10 Tus tub txib thauj kaum tus ntxhuav, nws nqa nws tus tswv cov toob xib zoo tib si ces nws sawv kev mus. Nws mus txog lub nroog Nas Hos, nyob As Las Nas Has Las Yis teb.

11 Nws tso cov ntxhuav txhos caug nyob

sab nroog nraud, nyob ze lub qhov tim thaj. Yog thaum tsaus ntuj, lub caij uas cov poj niam yuav tuaj nqa dej. 12 Tus tub txib hais tias :

"Kuv tus tswv Has Nplas Has tus HUAB TAIS ! Hnub no kuv thov koj pab kuv. Koj ua rau kuv pom tias koj hlub kuv tus tswv Has Nplas Has tiag. 13 Kuv sawv nyob ze tus dej uas cov ntxhais nyob hauv nroog yuav tuaj ce dej. 14 Yog kuv hais rau ib tug hluas nkauj hais tias : 'Koj qaij koj lub thoob rau kuv haus dej,' yog nws teb tias : 'Koj haus mas, thiab kuv tseem yuav muab dej rau koj cov ntxhuav haus thiab,' mas tus ntawd yog tus uas koj xaiv rau koj tus tub txib His Xas Has ntag. Kuv thiaj yuav paub tias koj ua rau kuv pom tias koj hlub kuv tus tswv."

15 Tus tub txib tseem hais lus tsis tau tas, Les Npes Kas twb tuaj lawm. Les Npes Kas yog Npes Tus Es, uas yog Mis Las Kas tus tub, tus ntxhais. Mis Las Kas yog Nas Hos uas yog Has Nplas Has tus kwv tus poj niam. Les Npes Kas nqa lub thoob saum xwb pwg. 16 Tus ntxhais ntawd zoo nkauj kawg, nws lub cev nkauj xwb tseem dawb huv, tsis tau muaj dua txiv neej txav ze nws. Nws nqes mus hauv hav dej, nws ce dej puv nws lub thoob ces nws rov qab los. 17 Tus tub txib khiav mus tos nws kev, hais rau nws tias :

"Thov koj pub me ntsis dej hauv koj lub thoob rau kuv haus."

18 Tus ntxhais teb tias :

"Koj haus mas, txiv ntxawm."

Nws txo plhuav lub thoob rau ntawm nws txhais npab thiab muab rau tus tub txib haus. 19 Thaum nws muab dej rau tus tub txib haus tas, nws hais tias :

"Kuv yuav mus nqa dej los rau koj cov ntxhuav haus kom pov khawv thiab."

20 Ces nws nchuav kiag nws thoob dej

rau hauv lub dab thiab nws khiav ntsuj rov mus nram hav dej mus ce dej los rau cov ntxhuav haus huv tib si. 21 Tus tub txib ua twj ywm ntsia tus ntxhais ntawd, nws ua xyem xyav tias HUAB TAIS puas tau qhia tus ntxhais rau nws lawm los tsis tau. 22 Thaum cov ntxhuav haus dej tas lawm, tus tub txib muab ib lub kauj ntswg kub hnyav li kaum txiaj los ntxig rau tus ntxhais taub ntswg thiab nws muab ob lub kauj toog kub ntxig rau tus ntxhais ob sab npab. 23 Nws hais tias:

"Koj yog leej twg tus ntxhais ? Thov koj qhia kuv paub. Puas muaj chaw nyob hauv koj txiv tsev rau peb so ib hmos ?"

24 Tus ntxhais teb tias :

"Kuv yog Npes Tus Es tus ntxhais, Npes Tus Es yog Mis Las Kas tus tub uas nws yug rau Nas Hos."

25 Nws tseem hais ntxiv tias :

"Nyob hauv peb tsev muaj quav nyab thiab muaj zaub ntxhuav ntau, thiab muaj chaw pw."

26 Ces tus tub txib txhos caug pe HUAB TAIS. 27 Nws hais tias:

"Thov kom HUAB TAIS uas yog kuv tus tswv Has Nplas Has tus Tswv Ntuj nto koob meej. Nws hlub thiab ua siab zoo rau kuv tus tswv. HUAB TAIS tau coj kuv txoj hauv kev kom kuv ncaj qha tuaj txog ntua kuv tus tswv tus kwv lub tsev."

28 Tus ntxhais khiav mus pem nws niam lub tsev mus piav tej uas nyuam qhuav muaj ntawd qhia rau lawv. 29 Les Npes Kas muaj ib tug nus hu ua Las Npaas. Las Npaas txawm khiav tawm mus nraum zoov mus ntsib tus tub txib tom hav dej. 30 Thaum nws pom dheev lub kauj ntswg thiab ob lub tooj npab uas nws tus muam coj, thiab hnov nws tus muam Les Npes Kas piav tias :

"Tus txiv neej ntawd hais li no rau kuv," Las Npaas cia li tawm tam sid mus tos tus

tub txib uas tseem sawv ntsug ze ntawm cov ntxhuav nyob tom lub hav dej tos.

31 Las Npaas hais rau tus tub txib tias : "Tus tau txoj hmoov zoo ntawm HUAB TAIS, koj los tsev mog. Ua cas koj yuav nyob nraum zoov ? Kuv twb tu tsev tas lawm thiab npaj tau chaw rau cov ntxhuav nyob lawm."

32 Tus tub txib thiaj chaws mus hauv lawv lub tsev. Las Npaas daws cov ntxhuav tej nra thiab nws muab dej rau tus tub txib thiab rau cov neeg nrrog nws tuaj sawv daws ntxuav taw. 33 Lawv nqa mov los rau nws noj, tiام sis nws hais tias :

"Kuv yuav tsis noj mov, yog kuv tsis xub hais qhov kuv tuaj tas tso."

Las Npaas teb tias :

"Koj hais saib."

34 Tus tub txib hais tias:

"Kuv yog Has Nplas Has tus tub txib. 42 Hnub no thaum kuv tuaj txog ntawm hav dej, kuv hais tias : 'HUAB TAIS uas koj yog kuv tus tswv Has Nplas Has tus Tswv Ntuj, yog koj zoo siab coj kuv mus kom txog qhov zoo chaw mas thov koj ua rau kuv paub. 43 Kuv sawv nyob ze ntawm hav dej no, tus ntxhais twg tuaj kwv dej, yog kuv hais rau tias : 'Thov koj muab me ntsis dej hauv koj lub thoob rau kuv haus.' 44 Yog nws teb tias 'Koj haus mas, thiab kuv yuav ce dej rau koj cov ntxhuav haus thiab.' Mas tus ntawd yuav yog tus poj niam uas HUAB TAIS tau xaiv rau kuv tus tswv tus tub.' 45 Kuv tseem tab tom hais zoo li no hauv siab tsis tau tas, ces Les Npes Kas twb nqa ib lub thoob saum xub pwg tuaj lawm. Les Npes Kas nqes mus hauv hav dej, nws ce tau dej, kuv hais rau nws tias : 'Thov koj muab dej rau kuv haus.' 46 Nws txo plhuav nws lub thoob thiab nws hais tias: 'Koj haus mas, thiab kuv

yuav muab dej rau koj cov ntxhuav haus thiab.' Ces kuv tau haus dej thiab kuv cov ntxhuav kuj tau haus dej. 47 Kuv nug nws tias : 'Koj yog leej twg tus ntxhais ?' Nws teb tias : 'Kuv yog Npes Tus Es tus ntxhais, Npes Tus Es uas yog Mis Las Kas yug rau Nas Hos.' Ces kuv thiaj muab lub kauj no rau nws qhov ntswg thiab cov tooj npab rau nws ob txhais npab. 48 Kuv thiaj li pe HUAB TAIS thiab hawm nws, thiab kuv cav lus zoo txog HUAB TAIS, kuv tus tswv Has Nplas Has tus Tswv Ntuj uas nws lub siab zoo coj kuv kev tuaj yuav kuv tus tswv tus kwv tus ntxhais rau nws tus tub. 49 Zaum no, yog nej xav ua zoo rau kuv tus tswv mas nej hais rau kuv, yog nej tsis xav no los hais rau kuv paub, kuv thiaj paub mus lwm qhov." 50 Las Npaas thiab Npes Tus Es hais tias : "Tej ntawd yog tuaj ntawm HUAB TAIS tuaj, peb tsis paub yuav hais li cas. 51 Les Npes Kas nyob ntawm koj xub ntiag, koj coj nws mus ua koj tus tswv tus tub poj niam raws li HUAB TAIS hais." 52 Thaum Has Nplas Has tus tub txib hnov cov lus ntawd, nws txhos caug hauv av pe HUAB TAIS. 53 Nws thou ib co npauj nyiag npauj kub thiab ib co tsoos tsho los, nws muab pub rau Les Npes Kas. Nws kuj muab tej yam paj tshab muaj nqes pub rau Les Npes Kas tus nus thiab rau nws niam. 54 Ces tus tub txib thiab cov neeg nrog nws tuaj lawv thiaj noj mov thiab haus dej. Lawv pw ib hmos. Tag kis thaum lawv sawv, tus tub txib hais tias : "Nej cia kuv rov mus nram kuv tus tswv lub tsev." 55 Ces Les Npes Kas tus nus thiab nws niam hais tias: "Cia tus ntxhais nrog peb nyob li kaum hnuv tej tso nws mam mus." 56 Tiam sis tus tub txib teb tias : "Nej tsis txhob khuam kuv ntev. Yog HUAB TAIS coj kuv kev, kuv thiaj tuaj txog nej ; cia kuv rov qab mus kom txog kuv tus tswv lub tsev." 57 Nkawd hais tias : "Cia peb hu tus ntxhais los nug saib nws hais li cas." 58 Lawv hu Les Npes Kas los, lawv hais rau nws tias : "Koj puas xav nrog tus txiv neej ntawd mus ?" Les Npes Kas teb tias : "Kuv xav." 59 Ces lawv tso lawv tus muam Les Npes Kas thiab nws tus niam pub mis nrog Has Nplas Has tus tub txib thiab nws cov neeg mus. 60 Lawv foom lus zoo rau Les Npes Kas tias : "Peb leej muam ! koj mus mog. Thov kom koj huam vam mus nto txhiab ! Kom koj tsoom xeeb ntxwv mus txeeb tau lawv cov yeeb ncuab lub rooj loog." 61 Les Npes Kas thiab nws cov ntxhais txib sawv kev, lawv caij cov ntxhuav thiab lawv raws tus txiv neej qab. Tus tub txib thiaj coj Les Npes Kas mus lawm. 62 His Xas Has rov tom lub qhov dej Las Hais Luas los, nws los nyob hauv lub teb chaws Nes Zes. 63 Thaum yav tsaus ntuj, nws tawm mus ncig ua si nraum zoov, nws ntsia pom ib co ntxhuav tuaj yuav txog. 64 Les Npes Kas kuj tsa muag ntsia pom His Xas Has thiab. Nws nqes plhuav saum tus ntxhuav rau hauv av. 65 Nws nug tus tub txib hais tias : "Tus txiv neej uas taug kev tuaj tos peb ntawd yog leej twg ?" Tus tub txib teb tias : "Yog kuv tus tswv." Ces Les Npes Kas thou nws daim ntaub khwb taub hau los vov nws. 66 Tus tub

txib piav tas puas tsav yam txog txoj hauj lwm nws tau ua rau His Xas Has mloog. 67 Ces His Xas Has coj Les Npes Kas los nyob hauv nws lub tsev tsam phooj. Nws yuav Les Npes Kas ua nws poj niam. Nws nyiam Les Npes Kas. Ces nws tsis nco nws niam heev lawm.

**Has Nplas Has tuag. 25 : 7 - 11.**

**25** 7 Has Nplas Has ua neej txog ib puas xya caum tsib xyoo. 8 Ces Has Nplas Has mam tuag. Nws tau ua neej nyob laus nkoos, tau nyob ntev niaj ntau xyoo, nws mam mus cuag nws cov poj yawm txwv koob. 9 His Xas Has thiab Is Mas Es uas yog nws ob tug tub, nkawd muab nws coj mus los rau lub qhov tsua nyob Mas Pes Las, nyob hauv daim teb Es Plhoos, uas nyob ze Mas Nples. 10 Yog daim teb uas Has Nplas Has muas ntawm Hes cov tub los. Has Nplas Has thiab nws poj niam Xas Las nkawd ob lub ntxa nyob ntawd. 11 Has Nplas Has tuag tas, Tswv Ntuj foom hmoov zoo rau nws tus tub His Xas Has. Ces His Xas Has los ua tsev nyob ze ntawm lub qhov dej Las Hais Luas.

**Es Xas Ws thiab Yas Kos Yug los.  
25 : 19 - 28.**

19 Nram no, yog zaj kwv huam hais txog His Xas Has uas yog Has Nplas Has tus tub. Has Nplas Has Yug His Xas Has. 20 His Xas Has muaj plaub caug xyoo nws thiaj yuav Les Npes Kas, uas yog Npes Tus Es tus ntxhais thiab yog Las Npaas tus muam. 21 His Xas Has thov HUAB TAIS rau nws poj niam vim nws poj niam tsis muaj me nyuam. HUAB TAIS mloog His Xas Has zaj thov, ces nws poj niam Les Npes Kas xeeb tub.

22 Ob tug me nyuam sib ntaus nyob hauv Les Npes Kas plab, ces Les Npes Kas hais tias :

"Yog zoo li no xwb mas puas tsim nyog ua neej nyob ntxiv ?"

Ces Les Npes Kas mus nug HUAB TAIS.

23 HUAB TAIS hais rau nws tias :

"Muaj ob haiv neeg nyob hauv koj cev. Ob haiv neeg uas tawm ntawm koj los, yuav sib ncaim. Ib haiv neeg yuav kav ib haiv, tus hlob yuav tsob hwb tus yau."

24 Thaum txog lub caij Les Npes Kas daws cev, nws yug tau ob tug tub ntxaib.

25 Tus hlob tawm los, nws yog neeg liab hau, thiab nws tuaj plaub thoob ib ce, zoo li nws hnav ib lub tsho plaub. Lawv tis nws npe hu ua Es Xas Ws. 26 Es Xas Ws tus kwv tawm los, nws txhais tes tuav rawv Es Xas Ws luij taws. Lawv tis nws npe hu ua Yas Kos. Thaum ob tug me nyuam ntawd yug los, His Xas Has muaj rau caum xyoo. 27 Ob tug tub hlob zuj zus. Es Xas Ws ua ib tug tub tua nqaij, nws nquag mus yos hav zoov. Yas Kos yog ib tug neeg nyob twj ywm, nws zov nws cov tsev tsam phooj. 28 His Xas Has hhub Es Xas Ws dua, vim nws nyiam noj nqaij. Les Npes Kas hhub Yas Kos dua.

**Es Xas Ws muab nws txoj cai ua tub hlob muag. 25 : 29 - 34.**

29 Muaj ib zaug, Yas Kos tab tom ua zaub. Es Xas Ws mus yos rov los txog, nws sab kawg. 30 Es Xas Ws hais rau Yas Kos tias :

"Kuv quaq zog npaum no, thov koj muab cov zaub liab liab ntawd rau kuv noj."

Tim qhov ntawd lawv thiaj hu nws ua Es Doos. 31 Yas Kos hais tias :

"Koj muag koj txoj cai ua tub hlob rau kuv tso mas."

32 Es Xas Ws hais tias :  
 "Kuv twb yuav tuag ! Txoj cai ua tub hlob yuav muaj nqi dab tsu rau kuv ?"  
 33 Yas Kos hais tias :  
 "Yog li no koj xub cog lus rau kuv tso. Ces Es Xas Ws cog lus thiab muag nws txoj cai ua tub hlob rau Yas Kos. 34 Ces Yas Kos muab nws tais noob taum thiab muab mov rau Es Xas Ws noj. Es Xas Ws noj mov haus dej tas ces nws sawv mus lawm. Es Xas Ws saib nws txoj cai ua tub hlob tsim txiaj li ntawd xwb.

**Yas Kos txais nws txiv cov lus foom hmoov zoo. 27 : 1 - 29.**

**27** 1 His Xas Has laus lawm, nws qhov muag tsis pom kev. Nws hu nws tus tub hlob Es Xas Ws los cuag nws, nws hais tias :

"Me tub !"

Tus tub teb tias :

"Kuv txiv !"

2 His Xas Lais hais ntxiv tias :

"Kuv laus lawm, kuv tsis paub hnub kuv yuav tuag. 3 Koj nqa ntaj nqa hmuv, nqa rab hnneev thiab lub raj xub, koj mus yos tua nqaij los rau kuv noj. 4 Koj ua ib roog qav zoo li kuv xis rau kuv noj, ces kuv yuav foom hmoov zoo rau koj tso kuv mam tuag."

5 Tab sis Les Npes Kas hnov His Xas Has hais li ntawd rau Es Xas Ws. Ces Es Xas Ws mus tua nqaij rau nruab tsuag lawm. 6 Les Npes Kas hais rau nws tus tub Yas Kos tias :

"Kuv nyuam qhuav hnov koj txiv hais rau koj tij laug Es Xas Ws tias: 7 'Koj mus tua nqaij los ua ib pluag qav rau kuv noj tso kuv yuav foom hmoov zoo rau koj nyob ntawm HUAB TAIS xub ntiag tso kuv mam tuag no.' 8 Nyem no, me tub, koj yuav tsum mloog kuv hais thiab ua

raws li kuv kom koj ua. 9 Koj mus xyuas cov tthis, koj ntes ob tug me nyuam thav tthis zoo nkauj los rau kuv npaj ib pluag mov rau koj txiv noj raws li koj txiv xis. 10 Koj yuav nqa tais nqaij mus rau koj txiv noj ces nws yuav foom hmoov zoo rau koj tas tso nws mam li tuag."

11 Yas Kos hais rau nws niam Les Npes Kas tias :

"Niad, kuv tij laug Es Xas Ws tuaj tuaj plaub, hos kuv daim tawv du du xwb.

12 Tej zaum ntshai kuv txiv yuav kov kuv, ces nws yuav paub tias kuv thuam nws, ces kuv yuav tau txais nws lo lus foom hmoov phem xwb tsis tau txais nws lo lus foom hmoov zoo."

13 Nws niam teb tias :

"Me tub, kuv mam ris lo lus phem ntawd. Nyem no, koj tsuas mloog kuv xwb. Kav tsij mus ntes ob tug thav tthis los rau kuv."

14 Ces Yas Kos mus ntes ob tug thav tthis los rau nws niam npaj ib taig nqaij raws li nws txiv nyiam noj. 15 Les Npes Kas thiaj li muab Es Xas Ws cov khaub ncaws zoo tshaj rau nws tus tub ntxawg Yas Kos hnay. 16 Nws muab cov tawv tthis los qhwv Yas Kos ob txhais caj npab thiab lub caj dab. 17 Ces nws muab tais nqaij thiab phaj mov uas nws npaj tau rau Yas Kos tuav. 18 Yas Kos mus cuag nws txiv, nws hais tias :

"Kuv txiv."

Nws txiv nug tias :

"Me tub, koj yog leej twg ?"

19 Yas Kos teb nws txiv tias :

"Kuv yog koj tus tub hlob Es Xas Ws. Kuv twb ua tau tas raws li koj hais lawm. Koj sawv los zaum noj cov nqaij kuv tau mus tua, thiab koj foom hmoov zoo rau kuv."

20 His Xas Has hais rau nws tus tub Yas Kos tias :

"Ua cas koj ntsib nqaij sai ua luaj !"

Yas Kos teb tias :

"Yog vim koj tus HUAB TAIS Tswv Ntuj pab kuv."

21 His Xas Has thiaj hais rau Yas Kos tias :

"Txav los ntawm no, kuv xuas koj saib koj puas yog kuv tus tub Es Xas Ws tiag."

22 Yas Kos thiaj txav los rau nws txiv His Xas Has xuas nws. Nws txiv hais tias :

"Lub suab yog Yas Kos lub, tab sis ob sab npab no yog Es Xas Ws ob sab !"

23 His Xas Has zeem tsis tau tias yog Yas Kos vim ob txhais npab tuaj plaub li Es Xas Ws li ces His Xas Has foom hmoov zoo rau Yas Kos. 24 Nws hais tias :

"Koj puas yog kuv tus tub Es Xas Ws tiag ?"

Yas Kos teb tias :

"Yog tiag."

25 Ces His Xas Has hais tias :

"Cev phaj rau kuv noj kuv tus tub cov nqaij saib, kuv yuav foom hmoov zoo rau koj."

Yas Kos cev nqaij rau nws txiv noj, cev cawv rau nws txiv haus tas. 26 Nws txiv hais tias :

"Me tub txav los ntawm no los nwj kuv saib."

27 Yas Kos txav mus nwj nws txiv. Nws

txiv tau hnia nws tus tub cov khaub ncaws tus ntxhiab, ces nws foom hmoov li no :

"Kuv me tub ntxaib, koj zoo li ib daim teb av zoo uas HUAB TAIS tau foom hmoov zoo rau. 28 Thov kom Tswv Ntuj tso lwg los yug koj, thiab pub av zoo rau koj, pub nplej, pub cawv noj tsis tag haus tsis

nqig rau koj. 29 Kom cov haiv neeg tsob hwb koj, kom cov teb chaws pe koj. Koj

yuav yog ib tug thawj coj ntawm koj cov kww tij, koj niam cov tub yuav khoov pe

koj. Leej twg foom phem rau koj, mas nws yuav raug hmoov phem. Leej twg foom hmoov zoo rau koj, mas nws yuav tau txoj hmoov zoo !"

**Yas Kos ua npau suav.**

**28 : 10 - 22.**

**28** 10 Yas Kos tso Npes Xas Npes teb tseg, nws sawv kev mus rau Has Laas teb. 11 Muaj ib hnub nws mus txog ib qho chaw, hnub twb poob qho lawm, nws thiaj pw ib hmos ntawd. Nws khaws ib lub pob zeb nyob ntawd los rau ncoo, nws pw tsaug zog nyob ntawd. 12 Nws ua ib zag npau suav : Nws pom ib tug ntaiv, tus taw txawb rau ntiaj teb, lub ntsis mus nto saum ntuj, hos Tswv Ntuj ib co Tshiab nce thiab nqes mus mus los los ntawm tus ntaiv. 13 Ces Yas Kos pom HUAB TAIS sawv ntawm nws xub ntiaj thiab hais tias :

"Kuv yog HUAB TAIS, kuv yog koj yawg Has Nplas Has tus Tswv Ntuj, thiab yog His Xas Has tus Tswv Ntuj. Thaj av uas koj tau los pw no, kuv muab rau koj thiab rau koj tsoom xeeb ntxwv. 14 Koj tsoom xeeb ntxwv yuav coob npaum li cov hmoov av nyob hauv av. Koj yuav nyob txij xib fab mus rau toob fab, pej fab mus rau naj fab. Txhua haiv neeg hauv ntiaj teb yuav sib foom hmoov zoo vim koj thiab vim koj tsoom xeeb ntxwv. 15 Kuv nrog koj nraim, txawm koj mus qhov twg los kuv yuav saib xyuas koj, thiab kuv yuav coj koj rov los nyob hauv lub teb chaws no, vim kuv yuav tsis tso koj pov tseg thiab yuav ua raws li kuv tau cog lus rau koj."

16 Yas Kos tsim dheev nruab dab ntub los, nws hais tias :

"HUAB TAIS nyob ntawm thaj chaw no tseeb tiag, ua cas kuv tsis paub !"

- 17 Yas Kos ntshai, ces nws hais tias :  
 "Thaj chaw no muaj hwj xyeej kawg !  
 Yeej yog Tswv Ntuj ib lub tsev nyob  
 thiab yog lub rooj ntug ntag !"
- 18 Yas Kos sawv ntxov, nws muab lub  
 pob zeb uas nws siv ua hauv ncoo los teeb  
 ua pej thuam, nws hliv roj ywg lub ntsis.
- 19 Nws tis npe rau thaj chaw ntawd hu  
 ua Npes Thes. Hos yav thaud, mas lub  
 nroog hu ua Lws.
- 20 Yas Kos fiv yeem zoo li no :  
 "Yog Tswv Ntuj nrog nraim kuv thiab  
 saib xyuas kuv ntawm txoj kev uas kuv  
 taug, yog nws pub mov rau kuv noj, pub  
 ris tsho rau kuv hnav, 21 yog kuv rov  
 los txog kuv txiv tsev, tsis raug xwv  
 txheej dab tsi, mas HUAB TAIS yuav ua  
 kuv tus Tswv Ntuj, 22 hos daim pob zeb  
 uas kuv muab teeb ua pej thuam no yuav  
 yog Tswv Ntuj ib lub tsev nyob, thiab tas  
 puas tsav yam uas koj pub rau kuv, mas  
 kuv yuav muab ib feem kaum rov rau koj  
 mus li."
- 6 Nws nug lawv tias :  
 "Nws puas noj qab nyob zoo ?"  
 Lawv teb tias :  
 "Nws nyob zoo thiab. Saib ! nws tus  
 ntxhais Las Ses tab tom coj nws txiv pab  
 yaj tuaj txog ntawd."
- 9 Nws tseem nrog lawv tham, ces Las  
 Ses coj nws txiv pab yaj tuaj txog, vim  
 Las Ses yog ib tug neeg zov yaj. 10 Yas  
 Kos pom dheev Las Ses uas yog nws dab  
 laug Las Npaas tus ntxhais thiab pom nws  
 dab laug pab yaj, nws txav los dov daim  
 txiag zeb vov lub qhov dej thiab muab dej  
 rau nws dab laug Las Npaas cov yaj haus.
- 11 Yas Kos nwj Las Ses, nws quaj kua  
 muag poob dawb vog. 12 Nws thiaj qhia  
 Las Ses tias nws txheeb Las Ses txiv thiab  
 nws yog Les Npes Kas tus tub. Ces Las  
 Ses khiav los hais qhia nws txiv.
- 13 Thaum Las Npaas hnov dheev tias  
 yog Yas Kos, yog nws tus muam tus tub,  
 mas Las Npaas khiav ceev ceev tuaj tos  
 nws, muab nws puag rau hauv xub ntiag,  
 nws nwj Yas Kos, thiab nws coj Yas Kos  
 los tsev. Ces Yas Kos thiaj piav tas puas  
 tsav yam rau Las Npaas mloog. 14 Las  
 Npaas hais rau nws tias :  
 "Koj yog kuv txha thiab kuv nqaij tiag  
 tiag !"
- Ces Yas Kos nrog Las Npaas nyob tau ib  
 hlis nkaus.

**Yas Kos tuaj txog Las Npaas tsev.  
 29 : 1 - 2 + 4 - 6 + 9 - 14**

- 29** 1 Yas Kos sawv kev mus rau lub  
 teb chaws nyob sab hnub tuaj.  
 2 Nws pom ib lub qhov dej nyob ntawm  
 cov nras teb, muaj peb pab yaj pw zom  
 zaws ze ncig ntawd. Vim yog lub qhov  
 dej uas lawv coj cov tsiaj tuaj haus dej  
 ntawd. 4 Yas Kos nug cov tub zov yaj  
 tias :  
 "Cov kww tij, nej tuaj qhov twg tuaj ?"  
 Lawv teb tias :  
 "Peb tuaj Has Laas tuaj."  
 5 Nws hais rau lawv tias :  
 "Nej puas paub Las Npaas, uas yog Nas  
 Hos tus tub ?"  
 Lawv teb tias :  
 "Peb paub."

- 15 Thaum ntawd Las Npaas hais rau Yas  
 Kos tias :  
 "Tsis yog vim koj txheeb ze kuv ces koj  
 txawm yuav ua hauj lwm pub dawb rau  
 kuv. Koj yuav tsum qhia kuv paub tias  
 koj xav tau nqe zog npaum li cas."
- 16 Las Npaas muaj ob tug ntxhais, tus  
 hlob hu ua Les As, tus yau hu ua Las Ses.

17 Les As ob lub qhov muag zoo mos nyos. Hos Las Ses lub cev xeeb tau xwm yeem, thiab lub ntsej muag zoo nkauj. 18 Yas Kos nyiam Las Ses, ces nws teb tias :

"Kuv yuav ua hauj lwm pab koj xya xyoo kom tau koj tus ntxhais ntxawm Las Ses."

19 Las Npaas hais tias :

"Muab nws rau koj zoo dua muab rau ib tug qhua. Ua li mas koj nyob hauv kuv tsev mog."

20 Ces Yas Kos ua hauj lwm tau xya xyoo kom tau Las Ses, tab sis nws mloog zoo li yog ob peb hnub xwb, vim nws nyiam Las Ses kawg. 21 Yas Kos hais rau Las Npaas tias :

"Koj muab kuv poj niam rau kuv, vim kuv twb ua hauj lwm puv sij hawm lawm, kuv thiaj li mus nrog nws nyob tau."

22 Las Npaas thiaj npaj ib rooj mov loj thiab caw tas nrho cov neeg ib cheeb tsam ntawd tuaj noj. 23 Thaum tsaus ntuj lawm, nws coj nws tus ntxhais Les As mus rau Yas Kos. Ces Yas Kos nrog tus ntxhais pw. 24 Las Npaas muab nws tus ntxhais txib Xis Pas pub rau nws tus ntxhais Les As ua ntxhais txib. 25 Tag kis kaj ntug, Yas Kos pom tias yog Les As. Yas Kos thiaj hais rau Las Npaas tias :

"Koj ua dab tsi li ntawd rau kuv ? Kuv ua hauj lwm rau koj kom tau Las Ses. Ua cas koj dag kuv ?"

26 Las Npaas teb tias :

"Nyob peb teb chaws, peb kev cai tsis pub tus niam hluas xub yuav txiv ua ntej tus niam laus. 27 Yog li koj ua ib lis piام tshoob tiav tso, ces kuv yuav muab tus niam hluas pub rau koj yuav thiab, tiam sis koj yuav tsum ua hauj lwm rau kuv xya xyoo ntxiv kom tau nws."

28 Yas Kos thiaj ua raws li ntawd : Nws ua ib lis piام tshoob tiav, ces Las Npaas

muab nws tus ntxhais Las Ses rau Yas Kos yuav ua poj niam. 29 Las Npaas muab nws tus ntxhais txib Npis Has pub rau nws tus ntxhais Las Ses ua ntxhais txib. 30 Yas Kos nrog Las Ses nyob. Nws nyiam Las Ses dua Les As. Nws nyob ua hauj lwm rau nws dab laug Las Npaas xya xyoo ntxiv.

**Yas Kos nrog Tswv Ntuj sib ntsuas zog. 32 : 23 - 33.**

**32** 23 Tib hmos ntawd, Yas Kos sawv, nws coj nws ob tug poj niam, nws ob tug ntxhais txib thiab nws kaum ib tug me nyuam, lawv hla tus dej Yas Npos. 24 Nws coj lawv hla tus dej, thiab coj tas puas tsav yam uas nws muaj nrog lawv hla dej mus rau sab tid. 25 Tshuav Yas Kos tib leeg nyob xwb. Hmo ntawd, muaj ib tug neeg nrog nws sib ntsuas zog ib hmos kaj ntug. 26 Nws kov tsis yeej Yas Kos, ces nws ntaus Yas Kos tus txha ntawm ntsag, tus qij txha ntawd qis lawm. 27 Nws hais rau Yas Kos tias :

"Koj tso kuv, twb kaj ntug lawm."

Tiam sis Yas Kos teb tias :

"Yog koj tsis foom hmoov zoo rau kuv mas kuv tsis tso koj li."

28 Tus neeg ntawd nug tias :

"Koj hu li cas?"

Yas Kos teb tias :

"Kuv hu ua Yas Kos."

29 Nws hais ntxiv tias :

"Koj yuav tsis hu ua Yas Kos ntxiv lawm, koj yuav hu ua His Xas Lais, vim koj muaj zog tiv tau Tswv Ntuj, thiab tiv tau neeg, thiab koj yeej lawm."

30 Yas Kos thov tias :

"Thov koj qhia koj lub npe rau kuv."

Tiam sis tus ntawd teb tias :

"Vim li cas koj thiaj nug kuv lub npe ?"

Ib txhij ntawd nws foom hmoov zoo rau Yas Kos. 31 Yas Kos tis npe rau thaj chaw ntawd hu ua Pas Nws Es, nws hais tias :

"Vim kuv tau pom Tswv Ntuj tim ntsej tim muag, tsis kav kuv txoj sia tseem nyob."

32 Thaum hnub tuaj, Yas Kos twb hla dhaus Pas Nws Es lawm. Nws mus kev qaij ntsag, nws deeg pauv. 33 Yog vim li

no cov His Xas Lais thiaj caiv tsis noj txoj leeg ncej puab ntawm ntsag los txog niaj hnub no, vim Huab Tais ntaus Yas Kos txoj leeg ncej puab ntawm ntsag.

### **Yas Kos mus nyob Npes Thes.**

**35 : 1 - 15.**

**35** 1 Tswv Ntuj hais rau Yas Kos tias:

"Koj sawv, koj mus Npes Thes, koj mus nyob ntawd, koj yuav txhim ib lub thaj txi tus Tswv Ntuj uas thaum koj khiav koj tij laug Es Xas Ws, nws tau yees tawm los rau koj pom."

2 Yas Kos hais rau nws tsev neeg thiab rau tas nrho cov neeg nrog nws tias :

"Nej muab tej pej kum dab uas nyob hauv nej, pov tseg kom tas, nej ntxuav nej kom huv thiab hloov nej tej khaub ncaws.

3 Peb yuav nce mus pem Npes Thes ! Kuv yuav tsa ib lub thaj txi tus Tswv Ntuj uas thaum kuv ntxhov siab nws tau pab kuv, thiab thaum kuv mus kev nws tau pov hwm kuv."

4 Lawv muab tas nrho cov pej kum dab uas lawv muaj thiab hle cov kauj ntseg uas lawv coj ntawm pob ntseg tas huv si rau Yas Kos, ces Yas Kos muab coj mus faus rau hauv tsob qab ntoos qhib uas nyob ze Xis Kes. 5 Ces lawv yaws lawv cov tsev tsam phooj. Ntuj ua kom cov nroog nyob ib ncig sawv daws ntshai :

Tsis muaj neeg caum Yas Kos cov tub qab li. 6 Yas Kos tuaj txog Lws nyob teb chaws Kas Nas Has, uas yog Npes Thes, Yas Kos thiab tas nrho nws cov neeg huv tib si. 7 Nyob ntawd, Yas Kos txhim ib lub thaj txi Ntuj thiab nws tis lub npe Npes Thes rau thaj chaw ntawd, vim thaum nws khiav nws tij laug, Tswv Ntuj ua kom nws paub tias Tswv Ntuj nyob ntawd.

8 Thaum ntawd Des Npos Las uas yog Les Npes Kas tus niam pub mis, tuag nyob ntawd. Lawv muab nws faus rau nram qab Npes Thes, hauv tsob qab ntoo ntseej. Vim li no qhov chaw ntawd thiaj hu ua Tsob Ntoo Ntseej Kua Muag. 9 Tswv Ntuj tseem tau yees tawm los rau Yas Kos pom ntxiv, yog thaum nws rov ntawm Pas Das As Las los. Tswv Ntuj foom hmoov zoo rau nws. 10 Tswv Ntuj hais rau nws tias :

"Koj lub npe yog Yas Kos, tab sis luag yuav tsis hu koj ua Yas Kos ntxiv, koj lub npe yuav hu ua His Xas Lais."

Ces txij ntawd los, luag thiaj hu nws ua His Xas Lais. 11 Tswv Ntuj hais rau Yas Kos tias :

"Kuv yog Es Sas Dais. Koj huam vam mus mog. Ib haiv neeg, thiab ib co haiv neeg yuav yug ntawm koj los, ib co vaj yuav tawm ntawm koj lub cev los.

12 Lub teb chaws uas kuv tau muab rau Has Nplas Has thiab muab rau His Xas Has, kuv muab rau koj, thiab kuv yuav muab rau koj tsoom xeeb ntxwv uas yuav los tom qab koj."

13 Ces Tswv Ntuj rov mus lawm.

14 Yas Kos thiaj tsa ib lub thaj rau qhov chaw uas Tswv Ntuj nrog nws tham, nws muab pob zeb los ua lub thaj, nws txi Ntuj thiab hliv roj rau saum lub thaj. 15 Yas Kos tis lub npe Npes Thes rau thaj chaw uas Tswv Ntuj tau nrog nws hais lus.

**Yos Xes thiab nws cov kww tij.**

**37 : 2 - 11**

**37** 2 Yos Xes zaj kww huam yog  
zoo li no : Thaum Yos Xes muaj  
kaum xya xyoo, mas nws hluas kawg,  
nws mus nrog nws cov tij laug zov yaj,  
yog nrog nws txiv ob tug poj niam Npis  
Las thiab Xis Pas cov tub zov. Yos Xes  
rov los qhia lawv txiv txog tej yam phen  
uas nws cov tij laug ua. 3 His Xas Lais  
hlub Yos Xes tshaj nws cov tub huv si,  
vim Yos Xes yug thaum nws twb laus  
lawm. Ces nws kom lawv xaws ib lub  
tsho ntev txaij zoo nkauj rau Yos Xes  
hnav. 4 Nws cov tij laug pom tias nws  
txiv hlub nws tshaj nws cov tij laug txhua  
tus, mas lawv sawv daws ntxub nws, lawv  
tsis xav nrog nws hais ib lo lus zoo li.  
5 Yos Xes ua ib zag npau suav, ces nws  
piav qhia nws cov tij laug. Ua li mas  
lawv haj yam ntxub nws heev. 6 Nws  
hais rau lawv tias :  
"Nej mloog saib, kuv nyuam qhuav ua ib  
zag npau suav zoo li no : 7 Kuv pom zoo  
li peb tab tom pav nplej ua tej tes nyob  
tom teb. Ua cas kuv tes nplej cia li sawv  
ntseg ntseg, hos nej cov tes nplej los nyob  
ncig kuv tes nplej, ces nej cov tes nplej pe  
kuv tes nplej."  
8 Yos Xes cov tij laug teb nws tias :  
"Puas yog koj xav ua vaj kav peb, los ua  
hau tswj peb ?"  
Yog vim li ntawd, lawv haj yam ntxub  
nws, vim nws zaj npau suav thiab nws  
cov lus. 9 Nws tseem ua dua lwm zaj  
npau suav, uas nws piav rau nws cov tij  
laug. Nws hais tias :  
"Kuv rov ua dua ib zag npau suav : Kuv  
pom zoo li yog lub hnub, lub hli, thiab  
kaum ib lub hnub qub khoov ntawm kuv  
xub ntiag pe kuv."  
10 Nws piav li ntawd rau nws txiv thiab

nws cov tij laug, ces nws txiv cem nws,  
thiab hais rau nws tias :

"Koj ua tej zaj npau suav txawv ua luaj !  
Koj xav tias kuv thiab koj niam thiab koj  
cov tij laug peb, yuav tsum khoov hauv  
av pe koj no ?"

11 Nws cov tij laug khib kawg li, tab sis  
nws txiv nco ntsoov cov lus ntawd cia rau  
nruab siab.

**Yos Xes cov tij laug muab nws  
muag. 37 : 12 - 36.**

12 Yos Xes cov tij laug mus zov lawv  
txiv pab yaj noj zaub nyob Xis Kes.

13 His Xas Lais hais rau Yos Xes tias :  
"Koj cov tij laug mus zov tsiaj dua tom  
lub tshav zaub Xis Kes lawm puas yog ?  
Los, kuv xa koj mus xyuas lawv."

Yos Xes teb tias :

"Kuv zoo siab mus."

14 His Xas Lais hais tias :

"Koj mus xyuas saib koj cov tij laug thiab  
cov tsiaj nyob li cas lawm, koj xa xov  
rov los rau kuv paub."

Nws kom Yos Xes taug lub hav Hes  
Nploos mus. Ces Yos Xes mus txog Xis  
Kes. 15 Muaj ib tug neeg mus yos tom  
cov nrás, nws ntsib Yos Xes. Tus neeg  
nug Yos Xes tias :

"Koj nrhiav dab tsi ?"

16 Yos Xes teb tias :

"Kuv nrhiav kuv cov tij laug. Thov koj  
qhia kuv saib lawv coj lawv cov tsiaj mus  
noj zaub rau qhov twg lawm."

17 Tus neeg ntawd hais tias :

"Lawv twb tshais chaw ntawm no mus  
lawm, kuv hnov lawv tham tias : 'Peb  
mus Dos Tas'."

Ces Yos Xes mus nrhiav nws cov tij laug,  
nws nrhiav tau lawv nyob Dos Tas.

18 Lawv pom nws tseem tuaj txog deb.  
Thaum nws tuaj tsis tau txog, lawv sib

tuav tswv yim tias yuav ua kom nws tuag.  
 19 Lawv sib tham tias :  
 "Nej saib ! Niag ua npau suav tuaj lawm !  
 20 Zaum no, peb muab nws tua kiag thiab muab nws pov rau hauv ib lub qhov tim thaj, ces peb mus hais tias yog ib tug tsiaj qus tom nws lawm. Peb yuav pom tias nws cov npau suav leej tas nrho !"  
 21 Tiam sis Lus Npees hnov lawv tham, nws xav pab kom Yos Xes dim ntawm lawv tes. Nws hais tias :  
 "Peb tsis txhob txo nws txoj sia."  
 22 Lus Npees hais rau lawv tias :  
 "Nej tsis txhob ua ntshav ntws, nej cia li muab nws pov rau hauv lub qhov tim thaj ntawm suab puam no xwb, nej tsis txhob tsa nej txhais tes rau saum nws."  
 Lus Npees hais li no, vim nws xav cawm Yos Xes, nws thiaj li yuav coj tau Yos Xes rov mus rau nws txiv. 23 Ua li mas thaum Yos Xes tuaj txog ntawm nws cov tij laug lawm, lawv muab nws lub tsho ntev txaij zoo nkauj uas nws hnnav hle. 24 Lawv txhom nws thiab muab nws pov rau hauv lub qhov dej. Yog ib lub qhov dej qhuav tsis muaj dej. 25 Ua li tas ces lawv mus zaum noj mov. Lawv tsa muag ntsia pom ib pab neeg Is Mas Es thauj ib co nra, lawv tuaj Nkas Las As tuaj. Lawv cov ntxhuav thauj ib co tshuaj tsw qab uas lawv yuav coj mus muag rau Hais Nkws Tos teb. 26 Ces Yus Das hais rau nws cov kwy tij tias :  
 "Yog peb muab peb tus kwy tua thiab muab nws cov ntshav faus, peb yuav tau dab tsi ? 27 Nej los, peb muab nws muag rau cov neeg Is Mas Es xwb, peb txhob tsa peb txhais tes rau saum nws : vim nws twb yog peb tus kwy, tawm ntawm tib lub cev nqaij los xwb."  
 Ces nws cov kwy tij mloog nws hais. 28 Thaum ntawd muaj ib co neeg tuaj hla ntawd, yog ib co tub luam Mas Dias, ces lawv rub Yos Xes tawm hauv lub qhov tim thaj los. Lawv muab nws muag nees nkaum lub txiaj nyiag, rau cov neeg Is Mas Es. Cov neeg ntawd coj nws mus Hais Nkws Tos teb lawm. 29 Thaum Lus Npees rov mus xyuas tom lub qhov tim thaj, tsis pom Yos Xes nyob hauv lawm ! Nws dua rhe nws cov ris tsho, 30 nws rov los cuag nws cov kwy, nws hais tias : "Tus me nyuam tsis nyob lawm ! Ua li kuv yuav mus nrhiav lawm qhov twg ?"  
 31 Lawv khaws Yos Xes lub tsho ntev, lawv tua ib tug laug tthis, ces lawv muab lub tsho mus raus cov ntshav tthis. 32 Lawv muab lub tsho ntev xa los rau lawv txiv, lawv fi xov li no :  
 "Peb nrhiav tau qhov no. Koj xyuas saib puas yog koj tus tub lub tsho ntev."  
 33 Lawv txiv saib zoj, nws hais tias : "Yog kuv tus tub lub tsho ntev tiag ! Ib tug tsiaj qus muab nws noj lawm. Yos Xes raug muab dua ua daim tas lawm !"  
 34 Yas Kos dua rhe nws lub tsho, nws muab hnab tsaj los npua, thiab nws tu siab ntev kawg. 35 Nws cov tub cov ntxhais sawv daws tuaj nplij nws, tiam sis nws tsis kam lawv nplij nws li, nws hais tias : "Kuv yuav quaj kom kuv tuag, mus nrog kuv tus tub nyob xwb."  
 Ces nws quaj quaj nws tus tub.  
 36 Thaum ntawd cov neeg Mas Dias coj Yos Xes mus muag nyob Hais Nkws Tos teb, mas lawv muab nws muag rau Pos Tis Fas uas yog vaj Fas Las Oos ib tug nom sam. Yog tus thawj tswj Fas Las Oos cov tub rog.

**Pos Tis Fas tso siab rau Yos Xes.  
 39 : 1 - 6.**

**39** 1 Lawv coj Yos Xes mus txog Hais Nkws Tos teb. Pos Tis Fas uas nws yog ib tug Hais Nkws Tos, nws

yog Fas Las Oos ib tug nom sam thiab yog tus tswj Fas Las Oos cov tub rog, nws muas Yos Xes ntawm cov Is Mas Es. 2 HUAB TAIS pab Yos Xes, Yos Xes ua dab tsi los puav leej tau zoo, ces nws tau nyob hauv nws tus tswv Hais Nkws Tos lub tsev. 3 Yos Xes tus tswv pom tias HUAB TAIS pab Yos Xes, thiab nws ua Yam twg mas tau Yam ntawd, 4 ces tus tswv saib Yos Xes tsim txiaj. Tus tswv coj Yos Xes mus ua hauj lwm rau tus tswv, thiab tsa Yos Xes ua tus loj thiab tso tas puas tsav Yam uas yog nws li rau Yos Xes saib xyuas. 5 Txij hnub uas tus Hais Nkws Tos muab nws lub tsev thiab lub cuab tam rau Yos Xes tuav, mas HUAB TAIS foom hmoov zoo rau nws lub tsev vim muaj Yos Xes nyob hauv. HUAB TAIS foom hmoov zoo rau Pos Tis Fas lub tsev thiab rau nws tej liaj teb huv si. 6 Ces nws tso plhuav ib puas tsav Yam rau Yos Xes ua tus saib, nws tsis txob tsis txhawj txog dab tsi li, tsuas xav txog tias nws xav noj dab tsi xwb. Yos Xes yog ib tug neeg xeeb tau zoo, thiab nws lub ntsej muag zoo nraug.

**Yos Xes nyob hauv tsev loj faj.**

**39 : 7 - 23.**

7 Ib ntus tom qab, tus tswv ntawd tus poj niam pom tias Yos Xes zoo nraug, nws hais rau Yos Xes tias :

"Koj nrog kuv pw !"

8 Tab sis Yos Xes tsis kam, nws hais rau tus poj niam tias :

"Vim muaj kuv, mas kuv tus tswv tsis tau ntxhov siab txog tias muaj dab tsi hauv nws tsev li, nws tso tas ib puas tsav Yam rau kuv saib. 9 Txawm yog nws kiag los nws twb tsis muaj hwj chim tshaj kuv nyob hauv lub tsev no : Nws tsis tau txwv kuv dab tsi, tsuas txwv tsis pub kov

koj xwb vim koj yog nws poj niam. Vim li cas kuv yuav ua ib qho phem npaum li ntawd, thiab ua txhaum rau Tswv Ntuj ?"

10 Txawm tias tus poj niam niaj hnub nrog Yos Xes tham los Yos Xes tsis kam nrog nws pw li, tsis kam muab nws lub cev rau tus poj niam li.

11 Muaj ib hnub, Yos Xes los ua nws txoj hauj lwm hauv lub tsev, tsis muaj ib tug tub txib nyob ntawd li. 12 Tus poj niam tuav nkaus Yos Xes lub tsho ces nws hais tias :

"Los nrog kuv pw !"

Tab sis Yos Xes hle hlo lub tsho tso pov tseg rau tus poj niam tes, ces nws tawm plaws khiav lawm. 13 Thaum tus poj niam pom tias Yos Xes tso nws lub tsho tseg rau nws tes, Yos Xes khiav mus nraum zoov lawm, 14 nws hu nws cov tub txib los, nws hais rau lawv tias :

"Nej ntsia saib ! Kuv tus txiv coj ib tug niag Hes Nplaws los zes peb ! Niag ntawd los thab kuv, yuav nrog kuv pw, tiam sis kuv qw ib suab nrov nrov. 15 Nws hnov kuv qw thiab kuv hu ces nws hle nws lub tsho rau kuv tes, nws tawm khiav mus lawm."

16 Tus poj niam muab lub tsho tso ntawm nws ib sab, nws nyob tos kom nws tus txiv los txog tsev. 17 Ces nws rov hais li qub rau tus txiv tias :

"Niag qhev Hes Nplaws uas koj coj los ntawd, txav los ti kuv thiab yuav los zes kuv no, 18 tab sis kuv tsa suab hlo qw, ces nws hle nws lub tsho tso tseg ze ntawm kuv, nws tawm khiav lawm."

19 Thaum tus txiv hnov nws poj niam hais tias : "Koj niag qhev ua li ntawd rau kuv," mas nws npau taws tam sid.

20 Yos Xes tus tswv thiaj tso neeg mus ntes nws thiab coj nws mus kaw hauv tsev loj faj. Lawv coj Yos Xes mus kaw xyaw cov neeg uas tus vaj muab kaw. Ces Yos

Xes nyob hauv tsev loj faj. 21 Tiam sis HUAB TAIS pab Yos Xes, nws hlub Yos Xes, nws ua kom tus tswv saib lub tsev loj faj muab Yos Xes saib rau qhov zoo. 22 Tus tswv saib tsev loj faj tsa Yos Xes ua tus saib xyuas tas nrho cov neeg nyob hauv tsev loj faj, tas puas tsav yam lawv ua nyob hauv, yog Yos Xes tso lus kom ua. 23 Tus tswv tsev loj faj tsis tshuaj txog Yos Xes cov hauj lwm li, vim HUAB TAIS pab Yos Xes thiab ua kom tej yam nws ua pheej mus zoo.

**Vaj Fas Las Oos zaj npau suav.**

**41 : 1- 8 + 14 - 16 + 25 - 36.**

**41** 1 Ob xyoos tom qab, vaj Fas Las Oos ua ib zag npau suav tias : Nws nyob ntawm ntug dej Nis, 2 nws pom xya tus maum nyuj rog rog zoo nkauj tawm hauv tus dej Nis los noj zaub nyob hauv cov hav iav. 3 Ho muaj dua xya tus maum nyuj phem phem yuag yuag tawm hauv tus dej Nis, lawv thawj cov qab, lawv kuj los nrog thawj cov nyob ntawm ntug dej Nis thiab. 4 Ces cov maum nyuj phem phem yuag yuag txawm muab cov maum nyuj rog zoo nkauj noj. Thaum ntawd, Fas Las Oos tsim dheev los. 5 Nws rov qab tsaug zog, ces nws txawm ua dua ib zag npau suav. Nws pom ib tug kav nplej txhawv tau xya hnab nplej loj loj thiab puv zoo nkauj. 6 Ces ho pom tus kav nplej ntawd txhawv dua xya hnab nplej sib sib tsis puv thiab zoo li kub hnyiab tas vim raug cov cua toob fab nplawm. 7 Cov hnab nplej tsis puv ntawd muab cov hnab nplej puv puv nqos tas lawm. Ces Fas Las Oos tsim dheev los, ciav yog npau suav xwb ! 8 Tag kis sawv ntxov, Fas Las Oos lub tswv yim nyob tsis kaj li, nws hu tas nrho

cov txiv khawv koob thiab cov neeg thoob tsib nyob Hais Nkws Tos teb tuaj, nws piav nws zaj npau suav rau lawv, tiam sis tsis muaj ib tug yuav txhais tau rau Fas Las Oos mloog li.

14 Ces Fas Las Oos tso neeg mus hu Yos Xes. Lawv thiaj li tso Yos Xes tawm sai sai hauv tsev loj faj los. Nws chais hwj txwv, hloov ris tsho ces nws tuaj ntsib Fas Las Oos. 15 Fas Las Oos hais rau Yos Xes tias :

"Kuv ua ib zag npau suav, tsis muaj ib tug neeg yuav txawj txhais li. Tab sis kuv hnov lawv hais tias yog koj hnov piav ib zaj npau suav, ces koj yeej txawj txhais no, puas yog ?"

16 Yos Xes teb rau Fas Las Oos tias : "Kuv tsis muaj peev xwm dab tsi li ! Tiam sis yog Tswv Ntuj thiaj yuav teb tau zoo rau Fas Las Oos xwb."

25 Yos Xes hais rau Fas Las Oos hais tias :

"Fas Las Oos ob zaj npau suav no, tsuas yog tib zag xwb. Tswv Ntuj qhia rau Fas Las Oos tias nws yuav npaj ua dab tsi.

26 Xya tus maum nyuj zoo nkauj, yog xya xyoo, xya hnab nplej zoo nkauj, kuj yog xya xyoo. Yog tib zag npau suav xwb. 27 Xya tus maum nyuj yuag yuag phem phem kuj yog xya xyoo, thiab xya hnab nplej sib sib tsis puv, zoo li kub hnyiab vim raug cov cua toob fab nplawm, los kuj yog xya xyoo. Yog Ntuj qhia tias yuav muaj tshaib plab xya xyoo.

28 Raws li kuv nyuam qhuav hais rau Fas Las Oos. Tswv Ntuj tau qhia rau Fas Las Oos tias Tswv Ntuj yuav npaj ua dab tsi. 29 Nyem no mus, yuav muaj xya xyoo uas qoob loo yuav ntsu ntsu nyob tas teb chaws Hais Nkws Tos. 30 Ces yuav muaj xya xyoo lawv qab uas neeg yuav tshaib plab, lawv yuav tsis nco qab txog cov qoob uas ntsu ntsu lawm, vim

kev tshaib twb muab tej qoob ntawd noj tas lawm. 31 Thaum txoj kev tshaib ntawd tuaj mas neeg yuav tsis paub tias yog ib lub teb chaws uas ntsu qoob lawm, vim kev tshaib plab yuav loj kawg.

32 Tos Fas Las Oos tau ua npau suav ob zaug txog, los yog vim tias Tswv Ntuj yeej txiav meej tas lawm tias nws yuav ua qhov ntawd sai. 33 Nyem no, Fas Las Oos yuav tsum nrhiav ib tug neeg ntse thiab thoob tsib, yuav muab nws tsa los tuav lub teb chaws Hais Nkws Tos. 34 Fas Las Oos yuav tsum mob siab, yuav tsa ib co tub tseem hwv saib lub teb chaws. Nws yuav tsum kom lawv qee ib feem tsib ntawm cov qoob cia, yuav ua li ntawd tas xya xyoo uas ntsu qoob. 35 Lub caij xya xyoo uas yuav ntsu qoob, mas sawv daws yuav tsum khaws tej txhiam xws noj cia, yuav tsum ua txhab los rau nplej raws li Fas Las Oos ceeb toom, yuav tsum sau txhiam xws noj cia rau hauv tej nroog. 36 Ces xya xyoo uas yuav tshaib plab mas lub teb chaws no thiaj yuav tau cov qoob khaws cia ntawd los noj, ces lub teb chaws yuav tsis tuag tshaib."

**Fas Las Oos tsa Yos Xes ua nom.  
41 : 37 - 49.**

37 Yos Xes cov lus raug Fas Las Oos siab thiab raug Fas Las Oos cov tub tseem hwv siab. 38 Ces Fas Las Oos hais rau nws cov thawj tub tseem hwv tias :

"Peb puas yuav nrhiav tau ib tug neeg zoo li tus ntawd, uas muaj Tswv Ntuj lub tswv yim nyob hauv nws ?"

39 Ces Fas Las Oos thiaj hais rau Yos Xes tias :

"Tswv Ntuj pub kom koj paub tej ntawd, mas tsis muaj ib tug yuav ntse thiab yuav thoob tsib li koj. 40 Koj yog tus yuav

tuav kuv lub tsev, kom kuv haiv neeg ua raws li koj ceeb toom kom ua, kuv tsuas loj dua koj vim kuv zaum saum lub theej kiab xwb."

41 Fas Las Oos hais rau Yos Xes tias : "Zaum no, kuv tsa koj los tuav lub teb chaws Hais Nkws Tos tas huv tib si."

42 Ces Fas Las Oos hle nws ntiv nplhaib ntawm tes, coj los ntxig rau Yos Xes ntiv tes, nws muab ib co ris tsho ntaub mos rau Yos Xes hnnav thiab muab ib phiaj xauv kub rau nws coj. 43 Nws muab lub tsheb zoo tshaj plaws, yuav luag npaum nws lub, rau Yos Xes caij, lawv qw ua Yos Xes ntej tias : "As Nples!" Ces Yos Xes kav tas nrho Hais Nkws Tos teb.

44 Fas Las Oos hais rau Yos Xes tias : "Kuv yog Fas Las Oos, tiam sis yog koj tsis tso lus mas tsis muaj leej twg yuav tsa tau tes los tsa tau taw nyob hauv lub teb chaws Hais Nkws Tos."

45 Ces Fas Loos tis ib lub npe tshiab rau Yos Xes hu ua Xos Nas Pas Nes As. Fas Las Oos muab As Xas Nas uas yog tus leej choj nyob Oos hu ua Pos Tis Fes Las tus ntxhais rau nws yuav ua poj niam. Ces Yos Xes sawv kev mus ncig teb chaws Hais Nkws Tos. 46 Thaum Yos Xes pib lis dej num rau Fas Las Oos uas yog tus vaj Hais Nkws Tos, mas nws muaj peb caug xyoo. Yos Xes tawm hauv Fas Las Oos mus, nws mus ncig thoob lub teb chaws Hais Nkws Tos. 47 Tas xya xyoo zoo niadj zoo xyoo ntawd, av ntsu qoob kawg. 48 Xya xyoo ntawd, Yos Xes qee tej qoob uas ntsu ntsu nyob Hais Nkws Tos teb cia. Nws muab ntim cia rau hauv cov nroog. Yos Xes sau tej qoob uas nyob ib ncig cov nroog, coj los khaws cia rau hauv lub nroog. 49 Yos Xes ua txhab los ntim nplej, nws sau qoob ntau kawg cia, ntau npaum cov xuab zeb ntawm ntug hiav txwv, ntau tas nrho suav

tsis txheeb luj tsis tas, ces lawv tseg tsis suav ntxiv lawm. Nkws Tos teb, vim tas ntiaj teb tshaib plab loj.

**Yos Xes cov tub. 41 : 50 - 52.**

50 Thaum tsis tau txog xyoo uas yuav tshaib plab, ob tug tub yug los rau Yos Xes, yog As Xas Nas uas yog tus leej choj nyob Oos hu ua Pos Tis Fes Las tus ntxhais yug. 51 Yos Xes tis tus hlob npe hu ua Mas Nas Xes, nws hais tias : "Tswv Ntuj ua kom kuv tsis nco txog kuv txoj kev txom nyem thiab kuv txiv tsev neeg."

52 Tus yau nws tis npe rau hu ua Es Fais, nws hais tias : "Vim Tswv Ntuj ua kom kuv vam meej nyob hauv lub teb chaws uas kuv txom nyem."

**Teb chaws tshaib plab loj.**

**41 : 53 - 57.**

53 Xya xyoo ntsu qoob nyob Hais Nkws Tos teb dhau lawm, 54 ces pib xya xyoo uas sawv daws tshaib plab raws li Yos Xes hais. Tas txhua lub teb chaws puav leej raug kev tshaib loj. Tab sis nyob Hais Nkws Tos teb muaj mov noj. 55 Thaum muaj kev tshaib plab nyob thoob Hais Nkws Tos, cov pej xeem tuaj quaj thov mov noj ntawm Fas Las Oos. Fas Las Oos hais rau cov neeg Hais Nkws Tos tias :

"Nej mus cuag Yos Xes, nws hais dab tsi rau nej, mas nej ua li ntawd."

56 Vim tas teb chaws tshaib plab, ces Yos Xes qhib cov txhab nplej nyob qhov txhia chaw, thiab muag mov rau cov Hais Nkws Tos sawv daws, vim muaj kev tshaib plab loj nyob teb chaws Hais Nkws Tos. 57 Tas ntiaj teb sawv daws kuj tuaj muas nplej ntawm Yos Xes nyob Hais

**Yos Xes cov kwv tij tuaj thawj zaug.  
42 : 1 - 7 + 12 - 24.**

**42** 1 Yas Kos paub tias nyob Hais Nkws Tos teb lawv muaj mov muag, nw s hais rau nws cov tub tias : "Ua cas nej nyob sib ntsia xwb ? 2 Kuv hnov tias nyob Hais Nkws Tos teb lawv muaj mov muag no. Nej mus muas mov nrad los rau peb noj peb thiab li yuav tsis tuag tshaib."

3 Yos Xes kaum leej tij laug thiab tuaj mus muas mov nyob Hais Nkws Tos teb.

4 Npes Yas Mis uas yog Yos Xes tus kwv tsis mus, Yas Kos tsis pub nws nrog lawv mus, nws xav twj ywm tias : "Kuv tsis xav kom nws raug txom nyem thiab."

5 Ces His Xas Lais cov tub thiab mus muas nplej, lawv nrog sawv daws tuaj nplawg ntia sib xyaws ntxaws, vim nyob Kas Nas Has teb, muaj kev tshaib plab loj. 6 Yos Xes yog tus tuav lub teb chaws, nws yog tus muag nplej rau sawv daws. Yos Xes cov tij laug tuaj txog, lawv khoov ti av pe Yos Xes. 7 Thaum Yos Xes pom nws cov tij laug, nws rov paub lawv tam sim ntawd. Tab sis nws ua txuj tsis paub thiab hais lus nchav rau lawv. Nws hais tias :

"Nej tuaj qhov twg tuaj ?"

Lawv hais tias :

"Peb tuaj Kas Nas Has teb tuaj, peb tuaj muas nplej mus noj."

12 Tiam sis Yos Xes hais rau lawv tias : "Tsis yog ! Nej xav tuaj soj xyuas kom pom peb lub teb chaws tej qhov tsis zoo xwb !"

13 Lawv teb tias :

"Koj cov tub txib muaj kaum ob leeg kwv

tij, peb sawv daws koom ib tug txiv xwb, nws tseem nyob teb chaws Kas Nas Has. Peb tus kwv ntxawg nrog peb txiv nyob, hos muaj ib tug tsis nyob lawm."

14 Tsis kav, Yos Xes rov hais rau lawv tias :

"Yeej yog li kuv hais rau nej lawm : Nej yog ib co neeg tuaj soj teb chaws xwb !

15 Mas nej yuav raug sim li no : Tsuav yog Vaj Fas Las Oos tseem muaj txoj sia nyob, mas nej yuav tsis dim ntawm no mus txog thaum nej tus kwv ntxawg tuaj txog thiab tso ! 16 Cia nej ib tug mus coj nej tus kwv tuaj, hos dua li cov, mas nej yuav tsum nyob hauv tsev loj faj tos. Peb yuav sim nej cov lus li no, mas peb thiaj yuav pom tias nej hais tseeb los hais cuav. Yog cuav xwb ces peb paub meej tias nej yog ib co neeg tuaj soj teb chaws, ib yam li peb paub meej tias Fas Las Oos tseem muaj txoj sia nyob !

17 Ces Yos Xes muab lawv sawv daws kaw tau peb hnub hauv tsev loj faj.

18 Hnub peb, nws hais rau lawv tias :

"Kuv hwm Tswv Ntuj. Yog nej xav cawm nej txoj sia mas nej yuav ua li no.

19 Yog nej ncaj tiag, mas nej yuav tso nej ib tug nyob hauv tsev loj faj, hos cov mas nej rov qab mus, nej yuav ris nplej mus rau nej tsev neeg noj. 20 Nej rov mus coj nej tus kwv ntxawg tuaj rau kuv pom, thaum ntawd kuv paub tias nej hais tseeb lawm ces nej yuav tsis tuag."

Ces lawv ua raws li ntawd. 21 Lawv rov sib hais lawv tias :

"Muaj tseeb lawm tiag, yog peb them lub txim txhaum uas thaud peb ua rau peb tus kwv xwb. Peb twb pom nws txoj kev txom nyem, nws thov thov peb, los peb tsis mloog nws li. Vim li ntawd peb thiaj raug kev nyuaj siab li no."

22 Lus Npees thiaj teb lawv tias :

"Kuv twb hais rau nej tias kom nej txhob

ua phem rau tus me nyuam ! Nej tsis xav mloog kuv hais, ces zaum no luag thiaj nug peb txog nws cov ntshav."

23 Lawv sib tham, lawv tsis paub tias Yos Xes to taub lawv xeem lus, vim muaj ib tug neeg nyob ntawd txhais lus rau Yos Xes. 24 Ces Yos Xes txav mus nraim lawv, nws quaj twj ywm. Yos Xes mam rov qab los ntawm lawv, nrog lawv hais lus. Yos Xes muab Xis Mes Oos khuav cia, nws khi Xis Mes Oos rau lawv ntsia.

**Yos Xes cov tij laug rov tuaj zaum ob. 43 : 1 - 2 + 15 - 34.**

**43** 1 Lub teb chaws raug kev tshaib hnyav kawg. 2 Ces thaum lawv noj tas cov nplej uas lawv thauj Hais Nkws Tos teb los lawd, lawv txiv hais rau lawv tias :

"Nej rov mus muas mov los rau peb noj dua."

15 Ces pab kwv tij thiaj nqa ib qho paj tshab, thiab ib npaug nyiaj tshaj qhov qub thiab coj Npes Yas Mis nrog lawv mus. Lawv sawv kev mus, lawv mus txog Hais Nkws Tos teb, ces lawv mus cuag Yos Xes. 16 Thaum Yos Xes pom lawv coj Npes Yas Mis nrog lawv, Yos Xes hais rau nws tus tim xyoob tias :

"Koj coj cov neeg ntawd mus tom kuv tsev. Koj tua ib tug tsiaj thiab npaj ib pluag mov. Ib ntsis tav su cov neeg ntawd yuav nrog kuv noj mov."

17 Tus txiv neej ua li Yos Xes hais, nws coj cov neeg ntawd mus tom Yos Xes tsev. 18 Lawv ntshai rau qhov luag coj lawv mus tom Yos Xes tsev, lawv sib tham tias :

"Ntshai yog vim cov nyiaj uas peb rov nrhiav tau nyob hauv peb cov hnab nplej thawj zaug, ces lawv thiaj coj peb mus, lawv yuav muab peb ntaus, yuav yuam

peb ua lawv qhev, ces lawv yuav yuav  
peb cov luij ntag lauj !"

19 Lawv thiaj txav mus ze Yos Xes tus  
tim xyoob uas nyob ntawm qhov rooj,  
lawv hais rau nws tias :

20 "Thov koj lauj, huab tais ! Peb twb  
tau tuaj muas mov ib zaug lawm.

21 Thaum peb rov mus txog tom chaw  
pw thawj hmos, peb qhib peb cov hnab  
nplej no, ua ciav nyias rov pom nyias cov  
nyiaj nyob ntawm ncauj hnab. Cov nyiaj  
ntawd yeej txaus nkaus tus nqi. Hnub no  
peb nqa rov tuaj. 22 Thiab peb tseem  
nqa dua ib co nyiaj tuaj muas nplej ntxiv.  
Peb tsis paub xyoov yog leej twg muab peb  
cov nyiaj rov rau hauv peb cov hnab  
nplej."

23 Tiam sis tus tim xyoob teb rau lawv  
tias :  
"Nej tso siab, txhob ntshai ! Yog nej tus  
Tswv Ntuj thiab nej txiv tus Tswv Ntuj  
muab ib thooj nyiaj rau hauv nej cov hnab  
nplej xwb. Kuv tau txais nej cov nyiaj  
lawm."

Ces nws coj Xis Mes Oos los rau lawv.  
24 Tus txiv neej coj lawv mus hauv Yos  
Xes tsev, muab dej rau lawv ntxuav taw  
thiab muab zaub rau lawv cov luij noj.  
25 Lawv thiaj li thau lawv qhov paj tshab  
los npaj zoo zoo cia tos Yos Xes. Lawv  
paub tias nws yuav los nrog lawv noj sus.  
26 Thaum Yos Xes los tsev, lawv cev  
qhov paj tshab rau Yos Xes thiab lawv pe  
nws. 27 Yos Xes hais tej lo lus zoo txais  
lawv thiab nws nug lawv tias :  
"Nej txiv laus laus lawm, nws puas nyob  
zoo ? Nej twb tau tham txog nws rau kuv  
lawm : Nws puas tseem muaj txoj sia  
nyob ?"

28 Lawv teb tias :  
"Koj tus tub txib uas yog peb txiv, nws  
noj qab nyob zoo thiab nws tseem muaj  
txoj sia nyob."

Ces lawv txhos caug thiab khoov hauv av  
pe. 29 Yos Xes tsa muag ntsia, nws pom  
nws tus kwv Npes Yas Mis uas yog nws  
niam tus tub, nws nug tias :  
"Tus ntawd puas yog nej tus kwv ntxawg  
uas nej tau tham rau kuv ?"  
Ces Yos Xes hais rau tus kwv ntxawg  
Npes Yas Mis tias:  
"Thov kom Tswv Ntuj pub txiaj ntsim  
ntau rau koj mog, me tub !"  
30 Ces Yos Xes tawm mus sai sai, vim  
nws hlub nws tus kwv, ces nws kua muag  
poob : Nws mus nyob hauv nws chav pw,  
nws quaj. 31 Nws ntxuav nws ntsej  
muag, nws siv zog npo kua muag, ces  
nws ua tiag rov los, nws hu tias :  
"Nej rau mov los !"  
32 Lawv thiaj rau mov rau Yos Xes noj  
ib qho, rau mov rau lawv noj lawv ib qho,  
hos cov Hais Nkws Tos uas noj mov hauv  
Yos Xes tsev lawv kuj noj lawv ib qho,  
vim cov Hais Nkws Tos nrog cov Hes  
Nplaws noj mov ua ke tsis tau : Lawv tsis  
nyiam nrog cov Hes Nplaws noj mov ua  
ke. 33 Lawv muab Yos Xes cov kwv tij  
zaum tuaj ntawm Yos Xes hauv ntej,  
nyias zaum raws nyias lub hnub nyoog  
hlob los yau, lawv xub pib tus hlob los  
mus rau tus yau, lawv sib ntsia zom zaws,  
lawv xav tsis thoob. 34 Ces Yos Xes  
faib tej yam zoo tshaj, qab tshaj ntawm  
nws lub phaj mus rau lawv noj kom txaus  
siab. Npes Yas Mis phaj mas ntau tshaj  
txhua leej txhua tus phaj lawm tsib npaug.  
Lawv kuj nrog Yos Xes haus dej haus  
cawv, ua rau lawv zoo siab.

**Yos Xes lub ntim nyob hauv Npes  
Yas Mis lub hnab.**  
**44 : 1 - 6 + 11 - 17.**

1 Yos Xes hais rau nws tus tim  
xyoob tias :

"Koj ntim nplej rau cov neeg ntawd cov hnab kom puv txaus nkaus lawv thauj, thiab koj rov muab nyias pob nyiaj tso rau hauv nyias lub ncauj hnab. 2 Koj muab kuv lub ntim nyiaj, tso rau hauv tus tub ntxawg lub ncauj hnab nrog nws pob nyiaj."

Ces tus tim xyoob ua raws li Yos Xes hais. 3 Thaum kaj ntug, lawv cia Yos Xes cov kww tij thauj lawv cov luij rov mus tsev. 4 Lawv nyuam qhuav tawm hauv nroog mus tsis deb, Yos Xes hais rau nws tus tim xyoob tias :

"Koj sawv! Koj mus caum cov neeg ntawd, koj hais rau lawv tias : Tim li cas nej ua qhov phem pauj qhov zoo ? 5 Nej nqa lub ntim uas kuv tus tswv siv haus dej thiab siv los saib yav tom ntej lawm puas yog ? Nej ua ib qho phem kawg !"

6 Ces nws mus caum lawv thiab hais cov lus ntawd rau lawv. 11 Lawv maj zeeg nyias thau nyias hnab nplej nqes los tso hauv av, lawv muab qhib. 12 Tus txiv neej pib tshawb ib tog zus tuaj, xub pib ntawm tus hlob mus rau tus yau. Nws thiaj tshawb tau lub ntim nyob hauv Npes Yas Mis lub hnab ! 13 Ces lawv dua rhe lawv tej ris tsho, lawv rov nog nra rau lawv cov luij thiab tig rov los rau hauv lub nroog. 14 Thaum Yus Das thiab nws cov kww tij chaws los hauv Yos Xes tsev, Yos Xes tseem nyob, ces lawv khoov ti av pe nws. 15 Yos Xes nug lawv tias :

"Yog vim li cas nej thiaj tau ua ib yam phem zoo li ntawd ? Nej tsis paub tias ib tug neeg zoo li kuv txawj paub tas txhua yam no lod ?"

16 Yus Das teb tias :

"Peb yuav hais li cas rau huab tais ? Peb tsis paub yuav hais dab tsi, thiab yuav daws peb lub txim li cas. Tswv Ntuj tau ua kom koj cov tub txib qhov txhaum tshwm tawm los lawm. Cia peb sawv

daws nrog tus uas lawv nrhiav tau lub ntim ntawm nws tes los ua huab tais qhev."

17 Tiam sis Yos Xes teb tias :

"Kuv yuav tsis ua li ntawd ! Cia tus uas peb nrhiav tau lub ntim nyob hauv nws lub hnab ua kuv tus qhev xwb, hos dua li cov mas nej tso siab lug rov mus tsev."

### **Yus Das thouv Yos Xes.**

**44 : 18 - 34.**

18 Ces Yus Das txav los ntawm Yos Xes, nws hais rau Yos Xes tias :

"Huab tais, koj tus tub txib thouv koj pub nws hais ib lo lus thiab thouv koj tsis txhob npau taws rau koj tus tub txib, vim koj yeej muaj hwj chim cuag li Fas Las Oos !

19 Huab tais tau nug koj cov tub txib hais tias : 'Nej txiv puas tseem nyob thiab nej puas tseem muaj ib tug kww ?' 20 Peb tau teb huab tais hais tias : 'Peb tseem muaj peb txiv uas nws laus laus lawm thiab peb tshuav ib tug kww ntxawg uas yug thaum nws twb laus lawm. Nws tus tij laug tuag lawm, cov tub uas nws niam yug mas tshuav nws tib leeg xwb, mas peb txiv hhub nws kawg !'

21 Ces koj tau hais rau koj cov tub txib tias : 'Nej mus coj nws tuaj rau kuv, kom kuv pom nws.' 22 Peb tau teb huab tais tias : 'Tus me nyuam ncaim tsis tau ntawm nws txiv : yog nws ncaim mas nws txiv yuav tuag xwb.' 23 Tiam sis koj tsis tseev, koj hais tias : 'Yog nej tus kww ntxawg tsis nrog nej tuaj mas kuv yuav tsis txais nej tuaj ntsib kuv ib zaug ntxiv.'

24 Ces thaum peb rov qab mus txog ntawm koj tus tub txib uas yog kuv txiv, peb tau hais huab tais cov lus rau nws.

25 Thaum peb txiv rov hais rau peb tias : 'Nej rov qab mus muas me ntsis nplej dua.' 26 Peb tau teb nws tias : 'Peb mus

tsis tau, yog peb tus kww ntxawg nrog peb thiab mas peb thiaj mus tau, vim tus txiv neej ntawd tsuas txais peb, yog peb nrog peb tus kww ntxawg xwb.' 27 Ces koj tus tub txib uas yog kuv txiv tau hais rau peb tias : 'Nej twb paub lawm tias kuv poj niam tsuas yug ob tug me nyuam rau kuv xwb. 28 Ib tug ncaim kuv lawm, kuv tau hais tias : Ntshai nws raug muab dua ua daim tas lawm ! ces kuv yeej tsis rov pom nws ib zaug ntxiv los txog tav no li. 29 Yog nej tseem coj tus no mus deb ntawm kuv, yog nws raug dab tsi phem, mas nej yuav ua kuv tu siab tuag, thiab ua kom kuv cov plaub hau dawb mus nkag hauv qhov ntxa xwb.' 30 Zaum no yog kuv mus txog koj tus tub txib uas yog kuv txiv lub tsev, tsis pom tus me nyuam uas nkawd ob tug ntsuj plig yeej nyob ua ke tas mus li, 31 mas txij thaum nws pom tias tus me nyuam tsis nrog peb los mas nws yeej yuav cia li tuag. Ces yog peb ua kom peb txiv tu siab tuag kiag, thiab yog peb muab nws cov plaub hau dawb mus ntsaws rau hauv qhov ntxa ntag. 32 Kuv uas yog koj tus tub txib tau cog lus rau peb txiv txog ntawm tus me nyuam li no : 'Yog kuv coj tsis tau nws rov los rau koj mas cia kuv ris lub txim ntawd tas kuv sim neej.'

33 Yog li, cia kuv uas yog koj tus tub txib nyob ua huab tais qhev hloov tus me nyuam qhov chaw, tso cia nws nrog nws cov tij laug rov mus tsev. 34 Kuv yuav ua li cas rov mus tsev tau, yog tias tus me nyuam tsis nrog kuv mus ? Kuv tsis xav pom kuv txiv txom nyem."

**Yos Xes qhia nws rau nws cov kww tij. 45 : 1 - 15 + 25 - 28.**

**45**

1 Ces Yos Xes nyiaj tsis taus ntxiv, nws nthe rau nws cov

neeg tias : "Nej kom sawv daws tawm mus." Sawv daws tawm tas tib si, ces Yos Xes thiaj qhia nws rau nws cov kww tij. 2 Tab sis nws quaj nrov nrov ces tas cov neeg Hais Nkws Tos hnov, ces lub moo ntawd thiaj nrov mus txog hauv Fas Las Oos tsev. 3 Yos Xes hais rau nws cov kww tij tias : "Kuv yog Yos Xes ! Kuv txiv puas tseem nyob ?" Nws cov kww tij teb tsis taus nws ib los, vim lawv pom nws lawv poob siab tas. 4 Yos Xes hais rau nws cov kww tij tias : "Nej txav los ze ze kuv mog !" Ces lawv txav los. Nws hais tias : "Kuv yog Yos Xes, yog nej tus kww uas nej muab muag rau Hais Nkws Tos teb thaud. 5 Tiam sis zaum no nej tsis txhob tu siab, nej tsis txhob khuv xim tias nej tau muag kuv rau ntawm no. Yog Tswv Ntuj xa kuv tuaj ua nej ntej kom tau cawm nej tkoj sia. 6 Nyem no tas teb chaws tshaib plab tau ob xyoos los lawm, tseem tshuav tsib xyoos ntxiv uas yuav tsis tau kev cog qoob thiab tsis muaj qoob sau li. 7 Tswv Ntuj tau xa kuv ua nej ntej tuaj ntawm no kom tau cawm nej haiv neeg kom tsis txhob tuag tu noob nyob hauv lub teb chaws thiab kom tau cawm nej ntawm no li. 8 Ua li mas, tsis yog nej xa kuv tuaj ntawm no, yog Tswv Ntuj xa, nws tau muab kuv los ua txiv rau Fas Las Oos, thiab muab kuv tsa ua thawj nyob hauv Fas Las Oos lub tsev, thiab ua tus pwm tsav tswj tas nrho lub teb chaws Hais Nkws Tos. 9 Nej rov mus kom txog kuv txiv sai sai, nej hais rau nws tias : 'Koj tus tub Yos Xes hais li no : Tswv Ntuj tau tsa kuv ua tus tswj tas nrho lub teb chaws Hais Nkws Tos. Koj tsis txhob tos ntev, koj cia li nqes los nrog kuv nyob nram no. 10 Koj yuav los nyob

lub teb chaws Nkaus Sees, koj thiab koj cov me nyuam, koj cov xeeb ntxwv, koj cov tsiaj loj tsiaj me, thiab tas puas tsav Yam uas yog koj tug, ces koj yuav tau nyob ze kuv. 11 Koj los nyob ntawd, kuv mam li pub rau koj noj koj haus, vim teb chaws tseem yuav tshaib plab tsib xyoos ntxiv, ces koj thiab koj tsev neeg thiab tas txhia Yam uas yog koj li yuav tsis txom nyem. 12 Nej qhov muag tau ntsiaj ntsoov kuv, hos kuv tus kwv Npes Yas Mis tau pom tias yog kuv lub qhov ncauj hais tej lus no rau nej tiag. 13 Nej piav rau kuv txiv txog kuv lub koob meej nyob Hais Nkws Tos teb, thiab txog tas puas tsav Yam uas nej tau pom, nej tsuag tsuag coj kuv txiv nqes los nyob ntawm no. 14 Ces Yos Xes puag nws tus kwv caj dab, nws quaj, Npes Yas Mis kuj quaj. 15 Nws nwj nws cov tij laug txhua tus tib si, ces sawv daws sib qawg quaj. Ua li ntawd tas ces nws cov tij laug nrog nws sib tham. 25 Ces lawv tawm hauv Hais Nkws Tos teb rov los txog lawv txiv Yas Kos, hauv teb chaws Kas Nas Has. 26 Lawv hais rau lawv txiv tias : "Yos Xes tseem muaj txoj sia nyob ! Nws yog tus loj saib tas nrho lub teb chaws Hais Nkws Tos nttag !" Yas Kos yoob tas, nws tsis ntseeg lawv. 27 Tiam sis thaum lawv qhia rau nws txog Yos Xes cov lus uas Yos Xes hais rau lawv, thiab thaum nws pom cov tsheb uas Yos Xes xa nrog lawv los tos nws, mas lawv txiv Yas Kos rov cus plaws tuaj. 28 His Xas Lais hais tias : "Txhua Yam txaus kuv siab lawm ! Yog kuv tus tub Yos Xes tseem muaj txoj sia nyob tiag, kuv yuav tsum mus kom pom nws tso, kuv mam tuag."

**Yas Kos tsiv los nyob Hais Nkws  
Tos teb. 46 : 1 - 7.**

**46** 1 His Xas Lais sau tas nrho nws lub cuab tam, nws sawv kev mus. Thaum nws tuaj txog Npes Xas Npes, nws cev ib co txim txi nws txiv His Xas Has tus Tswv Ntuj. 2 Hmo ntuj, Tswv Ntuj yees tawm los hais rau His Xas Lais tias :  
 "Yas Kos ! Yas Kos !" His Xas Lais teb hais tias :  
 "Kuv nyob ntawm no !" 3 Tswv Ntuj rov hais tias :  
 "Kuv yog Tswv Ntuj, yog koj txiv tus Tswv Ntuj, koj tsis txhob ntshai mus nyob Hais Nkws Tos teb, vim nyob nrad, kuv yuav tsa koj ua ib haiv neeg loj. 4 Kuv yuav nrog koj mus nyob Hais Nkws Tos teb, thiab kuv yuav coj koj nce rov los pem no. Yos Xes yog tus yuav kaw koj ob lub qhov muag laus."

5 Ces Yas Kos sawv kev ntawm Npes Xas Npes mus. His Xas Lais cov tub muab lawv txiv Yas Kos thiab muab lawv cov poj niam me nyuam nce rau saum cov tsheb uas Fas Las Oos xa tuaj tos lawv. 6 Lawv coj lawv cov tsiaj thiab tas nrho lawv lub cuab tam uas lawv tsim tau nyob teb chaws Kas Nas Has, ces lawv tsiv mus nyob Hais Nkws Tos teb. Yas Kos thiab tas nrho nws cov xeeb ntxwv nrog nws mus: 7 nws coj nws cov tub, thiab nws cov tub cov tub, nws cov ntxhais thiab nws ntxhais cov tub cov ntxhais, tas nrho nws cov xeeb ntxwv huv tib si, nrog nws mus nyob Hais Nkws Tos teb.

**Yos Xes txais nws txiv Yas Kos.  
46 : 28 - 30.**

28 His Xas Lais xub xa Yus Das ua ntej mus hais rau Yos Xes kom Yos Xes tuaj

tos nws nyob Nkaus Sees. Ces lawv tuaj txog Nkaus Sees teb. 29 Yos Xes kom lawv nog nws lub tsheb, ces nws caij tsheb tuaj tos nws txiv His Xas Lais nyob Nkaus Sees. Thaum nws pom nws txiv, nws puag nws txiv caj dab, ces nws quaj ntev puag rawv nws txiv. 30 His Xas Lais hais rau Yos Xes tias : "Zaum no, kuv tuag kuj tau, vim kuv tau pom koj lub ntsej muag lawm, thiab koj tseem muaj txoj sia nyob.

**Yas Kos foom hmoov rau nws cov tub. 49 : 1 + 3 - 28.**

**49** 1 Yas Kos hu nws cov tub los, nws hais tias :

"Nej tuaj sib sau ua ke ntawm no, kuv yuav qhia nej txog tej yam uas yuav tshwm sim tuaj rau nej lub caij tom ntej.

3 Lus Npees, koj yog kuv tus tub hlob, yog kuv lub zog, yog thawj lub txiv txi ntawm kuv lub zog txiv neej, koj yog tus txaus siab rau koj, koj muaj zog puv koj cev, 4 koj zoo li cov dej phwj. Koj yuav tsis tau npaum li lub siab xav, vim koj tau nce saum koj txiv lub txaj, koj tau rhuav kuv chaw pw lub hwj chim.

5 Xis Mes Oos thiab Les Vis yog ob kwv tij, nkawd muaj ib pluaj siab phen.

6 Thov kom kuv tus ntsuj plig tsis txob nrog nkawd koom ib lub tswv yim, thov kom kuv lub siab tsis txob nrog nkawd koom ua ib pab. Vim thaum nkawd npau taws, nkawd tua neeg, thaum nkawd vwm

tuaj, nkawd tau hlais cov tsiaj txhu ua dog ua dig. 7 Kuv foom phen rau nkawd txoj kev npau taws ceev, kuv foom phen rau nkawd lub siab lim hiam siab ceev. Kuv yuav ua kom neb sib ncaim nyob hauv Yas Kos, kuv yuav ua kom neb sib tawg nyob hauv His Xas Lais.

8 Yus Das, koj cov kwv tij yuav cav lus

zoo txog koj, koj txhais tes yuav tuav rawv koj cov yeeb ncuab lub xwb qwb, hos koj txiv cov tub yuav khoov cev hwm koj. 9 Yus Das yog ib tug thav tsov. Me tub, koj twb mus tom nqaij los, nws los so, nws pw zoo li ib tug tsov, nws tsiv li ib tug maum tsov, leej twg yuav muaj cuab kav tsa nws ? 10 Tus cwj ua vaj yuav tsis ncaim ntawm Yus Das txhais tes. Rab cwj tswj luag yuav tsis txav ntawm nws ko taw, mus txog thaum luag tuaj them se tas rau nws, thiab thaum tas txhia haiv neeg mloog nws lus.

13 Xas Npus Loos yuav nyob ntawm ntug hiav txwv, nws yuav ua neeg tsav nkoj nyob hauv tej nkoj, Xis Doos yuav nyob ntawm nws ib sab.

14 Is Xas Kas yog ib tug luj muaj zog, nws pw hauv nkuaj. 15 Nws pom tias txoj kev tau so yog ib qho zoo, nws pom tias lub teb chaws ntxim nyob, nws cev nws lub xub pwg mus cug luag lub nra, nws thiaj li ciaj luag qhev.

16 Daas yuav txiav plaub txiav ntug rau nws haiv neeg ib yam li txiav rau lwm xeem His Xas Lais. 17 Xav kom Daas zoo li ib tug nab nyob ntawm kev, zoo li ib tug nab muaj taug nyob ntawm txoj kab uas tuaj tom kiag tus nees ntawm nws lub qhov raws, ces tus caij nees yuav vau hlo ntxeev tiaj. 18 HUAB TAIS, kuv tso siab rau koj txoj kev cawm neeg !

19 Nkas, mas yuav muaj ib co tub sab tuaj lwg nws, nws kuj yuav caum lawv lwg thiab.

20 As Ses muaj qoob loo ntau, nws txawj ua zaub ua mov qab phim rau tej vaj noj.

21 Nes Tas Lis zoo li ib tug maum kauv khiav nrawm nrawm, nws yug tau tej tus me nyuam kauv zoo nkauj kawg.

22 Yos Xes yog ib tsob ntoo txi txiv ncw nyob ntawm ntug dej, nws cov ceg hlob mus dhau saum qaum phab ntsa. 23 Cov

tua hneev ntxub nws, lawv nta hneev thiab tua xub rau nws. 24 Tiam sis Yas Kos tus Huab Tais muaj hwj huam ob txhais tes ua kom Yos Xes rab hneev nyob khov kho. Tus Tswv Zov Yaj lub Npe, uas yog His Xas Lais lub Pob Zeb ua kom Yos Xes ob sab npab nrawm. Koj txiv tus Tswv Ntuj tuaj pab koj. 25 Kom Es Sas Dais foom hmoov zoo rau koj. Thov kom cuaj txheej ntuj nyob saud foom hmoov zoo rau, kom lub qab thu hiav txwv tob tob foom hmoov zoo rau koj, kom ob lub mis koj ntxais thiab lub txiv mis koj noj foom hmoov zoo rau koj, 26 Koj txiv cov lus foom hmoov zoo muaj zog dua cov roob uas nyob txheej dhau txheej tej lus foom hmoov, muaj zog dua cov roob txwj roob laus tej kev nplua nuj, kom tej koob hmoov zoo ntawd poob rau saum Yos Xes taub hau, poob rau saum nws hauv pliaj, nws uas yog tus Ntuj xaiv hauv tas nws cuab kww tij ! 27 Npes Yas Mis zoo li ib tug hma tom nqaij, thaum sawv ntxov nws noj nws tus nqaij, thaum tsaus ntuj nws muab los faib rau luag. 28 Cov no tas huv tib si yog cov xeem His Xas Lais. Lawv muaj kaum ob xeem. Cov lus no yog lawv txiv hais rau lawv. Nws foom hmoov rau lawv, nws foom rau nyias raws li nyias txoj hmoo.

**Yas Kos tuag. 49 : 29 - 33.**

29 Ces Yas Kos thiaj ceeb toom rau lawv tias : "Txog caij kuv yuav rov mus cuag kuv cov yawg koob lawm. Nej yuav muab kuv coj mus los nrog kuv cov yawg koob nyob hauv lub qhov tsua hauv Es Plhoos uas yog ib tug neeg His Tis daim teb, 30 yog lub qhov tsua nyob hauv daim teb Mas Pes Las, ze Mas Nples, hauv teb

chaws Kas Nas Has, uas Has Nplas Has tau muas ntawm tus His Tis hu ua Es Plhoos los ua toj ntxas. 31 Has Nplas Has thiab nws poj niam Xas Las nkawd ob lub ntxa nyob ntawd, His Xas Has thiab Les Npes Kas nkawd kuj nyob ntawd. Kuv kuj muab Les As faus rau ntawd lawm thiab. 32 Yog daim teb thiab lub qhov tsua uas thaud lawv muas ntawm Hes cov tub los."

33 Thaum Yas Kos hais nws cov lus rau nws cov tub tas, nws tshem nws ob txhais ko taw rov los tso rau saum txaj, ces nws txoj sia tu, nws mus cuag nws cov poj yawm txwv koob.

**Yas Kos lub ntees tuag.**

**50 : 1 - 14.**

**50** 1 Ces Yos Xes khoov mus rau nws txiv lub ntsej muag, nws hnja nws txiv thiab quaj kua muag poob ntub nws txiv lub ntsej muag. 2 Yos Xes hais rau cov kws tshuaj ua hauj lwm rau nws kom lawv muab nws txiv lub cev pleev tshuaj qhvv tuag. Ces lawv muab tshuaj qhvv tuag qhvv His Xas Lais lub cev. 3 Lawv siv plaub caug hnub los qhvv, vim yeej siv sij hawm ntev npaum li ntawd. Cov Hais Nkws Tos muab nws pam thiab nyiav nws tau rau caum hnub. 4 Thaum dhau lub ntees lawm, Yos Xes hais rau cov neeg hauv Fas Las Oos lub tuam tsev tias :

"Yog nej hlub kuv, thov nej mus piav qhia rau Fas Las Oos li no tias : 5 Kuv txiv tau kom kuv cog lus rau nws zoo li no: nws hais tias : 'Kuv yuav tuag, kuv muaj ib lub qhov ntxa uas kuv khawb tau cia nyob teb chaws Kas Nas Has, koj yuav coj kuv mus los rau ntawd.' Yog li thov koj tso kuv mus faus kuv txiv rau ped, tas kuv mam rov los."

6 Fas Las Oos teb tias :

"Koj nce mus faus koj txiv, raws li nws tau kom koj cog lus tseg."

7 Yos Xes thiaj coj nws txiv mus sam sab. Fas Las Oos cov thawj tub rog kuj nrog Yos Xes mus. Cov nom loj nyob hauv Fas Las Oos tsev thiab cov nyob hauv teb chaws Hais Nkws Tos puav leej mus tib si. 8 Tas Yos Xes tsev neeg, nws cov kwv tij, thiab nws txiv tsev neeg sawv daws mus tib si. Lawv tsuas cia cov mus tsis taus kev nyob Nkaus Sees xwb thiab cia cov tsiaj txhu nyob xwb.

9 Tseem muaj cov tsheb thiab cov tsav

tsheb nrog lawv mus : lawv mus ib pab

muaj hwj chim kawg.

10 Thaum lawv tuaj txog Nkos Les As Tas, uas nyob dhau dej Yos Las Das

lawm, lawv quaj ib zaug nyob ntawd.

Yos Xes quaj nws txiv tau xya hnub nyob

ntawd.

11 Cov Kas Nas Has, uas ib txwm nyob

hauv lub teb chaws, pom lub ntees nyob

Nkos Les As Tas, lawv hais tias :

"Nej ntsia saib, cov Hais Nkws Tos lub

ntees tuag loj kawg."

Vim li no qhov chaw ntawd thiaj hu ua

As Npes Mis Khas Yees, nyob ntawm

dej Yos Las Das sab tim ub.

12 Yas Kos cov tub ua raws li nws tau kom lawv ua. 13 Lawv coj nws mus txog Kas Nas Has teb thiab muab nws los rau hauv lub qhov tsua uas nyob hauv daim teb Mas Pes Las, uas thaud Has Nplas Has tau muas ntawm tus neeg His Tis hu ua Es Plhoos los ua toj ntxas, nyob ze Mas Nples.

14 Ces Yos Xes thiab nws cov kwv tij thiab tas nrho cov neeg uas nrog nws tuaj faus nws txiv, sawv daws rov los rau Hais Nkws Tos teb lawm.

**Txij hnub Yas Kos tuag mus txog  
hnub Yos Xes tuag.**

**50 : 15 - 26.**

15 Thaum lawv txiv tuag tas lawm, Yos Xes cov tij laug sib tham tias:

"Tsam Yos Xes saib peb yog nws cov yeeb ncuab, ces nws ua phem rau peb thiab pauj qhov peb tau ua rau nws ?"

16 Ua li mas, lawv xa lus mus rau Yos Xes tias:

"Thaum koj txiv yuav tuag nws tau hais li no cia: 17 'Nej yuav hais rau Yos Xes tias: Koj zam txhaum rau koj cov tij laug, koj zam lawv lub txim thiab lawv qhov txhaum thiab tas puas tsav yam phem uas lawv tau ua rau koj.' Zaum no peb thov koj zam txhaum rau koj txiv tus Tswv Ntuj cov tub txib."

Yos Xes hnov lawv cov lus, nws kua muag poob nthav. 18 Nws cov tij laug tuaj ntsib nws kiag, lawv txhos caug ntawm nws ko taw pe nws tias:

"Thov koj yuav peb ua koj cov qhev."

19 Tiam sis Yos Xes teb rau lawv tias : "Nej tsis txhob ntshai !

Kuv puas yuav txeeb ua Tswv Ntuj ?

20 Qhov phem nej tau ua rau kuv, mas Tswv Ntuj muab hloov ua ib qho zoo lawm, ces thiaj muaj li niaj hnub no: yog cawm ib haiv neeg coob txoj sia. 21 Nyem no nej tsis txhob ntshai kiag li, kuv yog tus yuav yug nej kev noj kev haus thiab yug ib tsoom neeg uas los nrog nej nyob." Yos Xes nplij lawv thiab hais lus mos lus zoo rau lawv.

22 Ces Yos Xes thiab nws txiv tsev neeg thiaj nyob ruaj rau Hais Nkws Tos teb. Yos Xes nyob tau ib puas kaum xyoo.

23 Nws tau pom nws cov xeeb ntxwv cov tub tib si, uas yog Es Fais cov tub.

## **Hauv Paus, Zaj 50**

Nws kuj tau pom Mas Kis uas yog Mas Yas Kos."  
Nas Xes tus tub cov tub yug los rau nws 25 Ces Yos Xes kom His Xas Lais cov  
puag tib si. tub cog lus li no :  
24 Thaum kawg, Yos Xes hais rau nws "Thaum Tswv Ntuj tuaj coj nej mus, mas  
cov kwv tij tias : nej yuav tsum thauj kuv cov pob txha  
"Txog kuv lub caij tuag lawm, kuv tseg ntawm no nrog nej mus."  
nej nyob. Tswv Ntuj yuav tuaj xyuas nej 26 Thaum Yos Xes tuag, nws muaj ib  
thiab yuav coj nej nce rov qab mus hauv puas kaum xyoo. Lawv muab nws lub  
lub teb chaws uas nws tau cog lus muab cev qhwv tshuaj thiab muab nws zwm rau  
rau Has Nplas Has, His Xas Has thiab hauv ib lub hleb nyob Hais Nkws Tos teb.